

NATIONAL ASSEMBLY OF SEYCHELLES

Wednesday 30th June, 2021

The Assembly met at 9am

National Anthem

Moment of Reflection

Mr Speaker in the Chair

MR SPEAKER

Bonjour tou Manm Parlmanter Onorab. E bonzour nou piblik ki swiv nou deor, byenveni pou nou sesyon travay.

Mon ti ava kontan partaz avek zot de mesaz. Fotespere zot in pas en bon lazournen Lafet Nasyonal e nou karant-senkyenm Laniverser Lendepandans.

Zisteman mon 2 mesaz i lo sa size e atraver mon felisitasyon pou Lasanble Nasyonal.

Premye mesaz i sorti kot Speaker *Federal Assembly of the Russian Federation* e i lir koumsa ;

On behalf of the *Federation Council of the Federal Assembly of the Russian Federation* and on my own behalf, I congratulate You on the 45th Anniversary of the declaration of independence of

the Republic of Seychelles - the National Day.

Russia-Seychelles interparliamentary dialogue is traditionally characterised with mutual trust and respect. Diplomatic relations between our countries were established on the following day after Seychelles gained independence, and it is symbolic that in 2021 we celebrate 45 years of our friendship.

The Federation Council reaffirms its readiness for full-scale interparliamentary cooperation in the trade, economic, investment and humanitarian spheres, as well as for coordination on the issues of strengthening peace and security on the African continent.

I am convinced that through joint efforts, we will succeed in utilising the accumulated potential of multifaceted cooperation and partnership for the benefit of our countries' peoples.

I wish you and your colleagues success in the important legislative activity and to the citizens of the Republic of Seychelles - peace and prosperity. Accept the insurances of my highest consideration.

*Signed
Speaker of the Federation Council.*

E lot mesaz i sorti kot Speaker *Federation National Council of the United Arab Emirates.*

Your Excellency, on the auspicious our Excellency, On the auspicious of the 45th Independence Day of the Seychelles Republic, it gives me great pleasure, on behalf of the members of the Federal National Council (FNC) of the United Arab Emirates and myself, to convey my warmest and most sincere congratulations to your Excellency, to the members of the National Assembly, and to the people of Seychelles.

In light of the current global challenges, I sincerely believe that the bilateral relations between our two countries, are most relevant these days than ever.

And seize this opportunity to express my genuine willingness and complete readiness towards fostering and building on the cordial parliamentary relations, that already exist between the Federal National Council and the National Assembly, for the mutual welfare of our people.

In the meantime, please accept, your Excellency, the assurances of my highest consideration.

Signed

Speaker of the Federal National Council.

Mon remersye sa de lenstitisyon Parlamanter pou zot mesaz e lo lapar mon ava anvoy zot en mesaz remersiman e nou sipor pou *Inter-Parliamentary relations.*

E zisteman ozordi le 30 Zen i Lazournen Parlamanter. E sa lazournen i selebre Parlman *Parliamentarism,* mannyer in mete dan rezolisyon *United Nation* ki'n ganny adopte pou sa lazournen e i osi selebre lazournen travay bann Parlamanter.

Alor nou Lasanble ki souvan pran lokazyon pou felisit lezot gro lokazyon zot Lazournen Enternasyonal anyel, nou ozordi pran lokazyon pou nou felisit nou menm lo nou rol e nou travay.

Rol ki Parlman i zwe i kritik dan en sistem demokratik. E nou la akoz nou reprezentant nou pep. Si nou pep ti kapab rasanble ansanm pou fer bann desizyon pou anmenn bann prensip ki pou delivre lo *Government of the people by the people,* zot ti a fer li ansanm.

Me akoz sa pa zanmen pratik se pou sa ki Lepep i elekte son reprezantan, e nou la isi pou fer sa travay lo zot lapar.

E travay Parlamanter dan nou sistem osi i pa touzour

fasil en travay ki demann bokou, bokou letan, bokou zefor e bokou rol differan. Nou tou nou konsyan rol ki bann Manm Parlman in bezwen adopte o kour nou listwar pou ranpli differan bezwen ki nou popilasyon i espekte.

Alor premyerman en mo felisitasyon pou zot travay, e en apresyasyon pou bann zefor ki zot mete ki al petet lwen devan sa ki normal pou en lazournen travay.

Me mon pa dir tou keksoz mon tousel petet mon ti ava envit sa de *Leaders* dan Lasanble pou donn nou en pti refleksyon lo sa lazournen si zot ti a kontan? Premye *LGB* ou ava konmanse.

HON BERNARD GEORGES

Mersi Mr Speaker. Bonzour Mr Speaker, bonzour tou bann Manm, bonzour tou bann dimoun ki pe ekoute e swiv nou dan lakour.

Mr Speaker efektivman mon ti a kontan premyerman avek ou permision lo lapar nou *Caucus*, *wish* tou bann Seselwa en tre zwaye Lafet Nasyonal Lafet nou lendepandans yer. E mon konnen nou espere ki tou dimoun in pas en tre bon lazournen.

Mon ti a kontan osi avek ou permision Mr Speaker, anmenn kondoleans nou *Caucus* anver Minis Jean-

Francois Ferrari *Designated Minister* ki ti en Manm nou Lasanble ziska dernyen eleksyon pou lanmor gran pert ki'n sibir yer ler ansyen Minis Ferrari ti kit nou. Mon ti a kontan lo nou par reasir Minis Ferrari Minis Dezinyen ki li ek son fanmir zot dan nou lapriyer ek nou panse.

E finalman Mr Speaker mon vin lo lenvitasyon pou eksprim detrwa mo, lo Lazournen Enternasyonal Parlmanter, me osi si mon pa tronpe se nou laniverser nou Lasanble non i pa ozordi.

Donk Zournen Enternasyonal Parlmanter ki nou pe selebre ozordi i en zour refleksyon e rekonesans parey ou'n dir Mr Speaker nou rol reprezentatif konman bann Manm Lasanble dan nou pei, kot nou Konstitisyon i prevwar ki nou pa pou kapab annan en reprezentasyon nasyonal lo lapar sak sitwayen.

Me ki regilyerman tou le 5an bann sitwayen, dan bann distrik e lo nivo nasyonal akoz nou Konstitisyon e i prevwar sa. I ganny sans pou elekte zot reprezantan pou vin devan Lasanble pou kapab anmenn zot problem, defann zot drwa e reprezant zot lo en nivo distrik e lo en nivo nasyonal depandan lo lapartenans sa Manm dan Lasanble.

Tro souvan Mr Speaker, dimoun i pa vwar Parlman

konman en zouti esansyel dan en sosyete. E mon krwar se pou sa rezon ki i bon enn fwa par an, ki nou pran nou letan pou nou rapel dimoun ki nou en parti entegral esansyel dan devlopman demokratik en pei.

E nou, nou pa en leksepsyon. Nou annan en demokrasi ki kantmenm i zenn, i ek en pei ki annan ki fet son 45enm Laniverser, nou annan en demokrasi ki'n arriv en staz matirite, tre vit.

E mon krwar nou'n bezwen aplodi nou lekor pou sa gran pa ki nou'n kapab fer, sorti la kot nou ti ete dan en pase kolonyal e dan en pase ase troublan zis apre nou Lendepandans. E pou *achieve* dan en pti peryod letan en matirite politik ki nou'n arive *achieve*.

E mon krwar sa i an gran parti, akoz travay bann Parlmanter, depi 1993 ler nou'n antre dan trwazyenm repiblik. E mon krwar e mon sezi sa loportinite ozordi pou remersi bann ki'n vin avan nou, e pou demann bann ki la ozordi ek bann ki pou vini, pou annan sa kouraz pou konstri lo sa fondasyon ki nou, nou annan ;- pou fer ki nou Lasanble i vin en meyer lenstitisyon dan lefitir.

Avek sa detrwa mo Mr Speaker mon ava remersye ou pou sa loportinite. Mersi.

MR SPEAKER

Mersi Onorab Georges. Onorab *Leader Lopozisyon*.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab e bonzour tou dimoun a lekout.

Premyerman permet mon osi lo lapar mon *Caucus* pou *extend* nou senser kondoleans avek Minis Ferrari, lo perd son pros, son papa. I ti en ansyen Manm Lasanble e nou kit li dan nou lapriyer.

Osi Mr Speaker permet mwan pou swet tou Lepep Seselwa nou pa ti ganny sans konman Lasanble avan nou al *adjourn*. Ki nou'n pas en bon Lazournen Lendepandans yer. E ki nou'n mazin tou bann dimoun, tou bann akter ki'n anmenn nou ver nou lendepandans depi Msye France Albert Rene, rol ki in zwe e bann lezot politisyen Msye Mancham pe enport lo diferan kote sa lalit.

E mon krwar depi *from* bann *leaders* parey Msye Rene ziska sa dimoun ki ti dan semen, tou dimoun ki'n anmenn nou ver nou lendepandans ozordi nou dir zot mersi.

E nou swete ki sa sakrifis se sa travay ki zot in fer i pa ki nou Seselwa, nou kontinyen evolye dan nou demokrasi. E zisteman ler nou pe koz lo

demokrasi nou bezwen konman Parlmanter realize ki nou rol i deplizanpli i pe evolye.

Ozordi nou trouv nou dan en sityasyon kot nou demokrasi pe vin bokou pli for pe ganny ranforsi. Me ki nou bezwen kontinyen ; kontinyen les bann differan lavwa kapab ganny loportinite pou eksprim zot lekor.

E mon krwar Lasanble Nasyonal i annan en rol enportan pou li zwe ladan. Ou'n fer byen kler Mr Speaker. E mon krwar i byen ou'n dir sa bomaten, ki ler i annan en lazournen kelkonk pou lezot size, a tou moman Manm Lasanble i sezi loportinite pou swet bann endividé ki swa dan sa sekter, swa travay dan sa domenn en bonn fet. Pou annan bann bon lankourazman pou zot.

Mon krwar ozordi nou devret annan senser lankourazman pou nou menm osi, sa travay ki nou fer pou sa devouman ki nou mete dan nou travay.

E ki parey nou konnen travay en Manm Lasanble pa zanmen 8er/4er, me ki i kontinyen menm apre ler ki nou telefonn menm nou lakour parfwa i vin nou lofis.

So avek sa Mr Speaker, mon ti a kontan demande ki konman Manm Lasanble nou kontinyen viv sa *ethos* ki

reprezent nou Lasanble e sa se limite dan diversite e ki nou kontinyen fer tou pou nou travay pou nou kapab kontinyen avans bann lobzektif nou Lasanble, e lobzektif nou demokrasi dan nou pei. Mon remersi ou Mr Speaker.

MR SPEAKER

Mersi Onorab *Leader Lopozisyon*. Pou fer zot rapel ki nou pou annan en pti seremoni Vandredi, pou mark sa lokazyon e mon krwar zot tou zot in ganny en lenvitasyon.

Mersi pou sa, e nou ava kontinyen lo *Order Paper* nou annan en *First Reading Public Bill*. Madanm Clerk.

MADAM CLERK

Mersi Mr Speaker. Bonzour a tous. Mr Speaker mon osi mon ti ava kontan swet tou bann Manm en *Happy International of the Parliamentarians*.

Bill ki pe ganny prezante ozordi i *Agency for Social Protection (Amendment) Bill 2021*.

This Act may be cited as the Agency for Social Protection (Amendment) Act, 2021. Mersi Mr Speaker.

MR SPEAKER

Mersi Madanm Clerk. Byen nou a kontinyen lo nou *Order Paper*. Nou annan

prensipalman *Motions* pou ozordi.

Onorab Georges mon ti ava kontan zis ganny ou lide si i konveye ou, mon ti ava kontan pran premye Mosyon ki dan ou non personnel, e dezyenm trwazyenm Mosyon lo lalis ki osi ganny prezante, me i dan en konteks biznes Gouvernman. E trwazyenm Mosyon limero 2 Onorab Waven William.

Rezon akoz mon fer sa lord, se ki mon pe antisipe si zanmen nou pa arive fer li nou ava fer sa de premye, e mon eskiz pou Onorab William ki mon'n met pou ou trwazyenm i pa par mank respe. Me tou senpleman akoz mon pe balans en pe ki mannyer nou *order*. Onorab Georges eski sa i konveye ou?

HON BERNARD GEORGES

Sertenman Mr Speaker. Mersi wi i *ok* avek mwan, mon mazinen ki lo sa de premye Mosyon, pou annan en kantite deba e se pou sa rezon ki ou pe fer sa. Wi Onorab William mon vwar ki i dir i *ok*.

Akoz li menm li ki pou koz en pe plis lo trwazyenm Mosyon dan son kapasite konman *Chair IAC*. Mersi.

MR SPEAKER

Thank you. Byen nou ava prosede Onorab Georges ou

ava konmans avek premye Mosyon.

HON BERNARD GEORGES

Mersi Mr Speaker. Mr Speaker Mosyon ozordi se Mosyon tapaz. E sa Mosyon i lir *comme suite*, vi kontinyasyon e menm logmantasyon lo nivo tapaz, lanmizik, kriye, zannimo, ouswa transpor, dan tou distrik, sa Lasanble i demann avek, premyerman tou sitwayen pou respekte lezot dimoun e evite fer tapaz ki pou deranz vvazinaz;

Dezyenmman, Gouvernman pou asire ki tou Lalwa e regleman i an plas pou *deal* avek bann ki kontinyen deranz lezot dimoun avek tapaz.

E trwazyenmman lafors lord ek lape pou pran tou mezir pou asire ki tapaz i redwir dan kominote e lape i rennyen.

Mr Speaker, pa tro lontan pase, mon ti pas devan laport en dimoun dan mon distrik ki paret mwan en pe fatige. Mon'n demann li si i pa byen, sa madanm i fer mon konpran ki i tre byen mersi me i fatige. Parey mon labitud.

HON SEBASTIEN PILLAY

(Off-Mic)

MR SPEAKER

*Un instant Onorab Georges.
Wi Onorab Pillay mon pa tro
konpran oule dir mwan ?*

HON SEBASTIEN PILLAY

(Off-Mic)

MR SPEAKER

Tre byen. Onorab Georges.

HON BERNARD GEORGES

Mersi. Mr Speaker mon ti pe dir ki mon'n pas devan laport en madanm ki i dir mon i byen me i fatige. E parey mon labitud mon'n fer en *joke* avek li, e mon'n dir li" be dormi ler i ariv aswar !"

Sa madanm i dir mwan "Onorab mon anvi dormi, me la Vandredi ek Sanmdi mon pa kapab dormi avan 2er bomaten, akoz en restoran i zwe lanmizik pou tou vwazinaz tande."

Ler bar i frenmen parti i kontinyen dan *carpark* avek gro, gro lanmizik dan bann loto. Epi dan bann pti 4er ler parti dan *carpark* in fini zot *bang* sa laport loto, konmsi zot anvi lev lanmor.

E ler bann loto in finalman ale, zot demaraz i fer plis travay ki en roket." "Dimans bomaten" sa madanm i dir mwan "mon pa bezwen alim mon radyo pou mwan swiv lanmes, mon ankor dan mon lili e mon ekout lanmes lo radyo mon vwazen."

Li menm li sa vwazen ki'n anmar son lisyen avek en kazo poul, e ki sa lisyen i pas tou lannwit ler lalin i kler pe zape.

Konbyen nou Mr Speaker ki'n viv en pe sa ki sa madanm i viv? Mwan mon enn e se pou sa rezon ki mon'n anmenn sa Mosyon.

Mr Speaker, mon'n konn lanmizik restoran dan mon vwazinaz ki anpes mwan, mon madanm e osi bokou nou vwazen dormi Vandredi ek Sanmdi, ziska ler ki zot donn nou permision dan pti 2er bomaten.

Erezman la avek *COVID* nou'n ganny en repi donk avek tou bann defayans ki *COVID* in anmennen in anmenn osi tanzantan en pti soulazman.

Mon'n konn lanmizik bann parti dan vwazinaz, kot kontan pa kontan mon'n bezwen partisipe kantmenm mwan mon dan mon lili. Mon'n ekout lanmes lo radyo dan vwazinaz.

E mon'n konn sote dan mon sonmey, akoz en pti menn i anvi akseler son travay lo semen La Misere e fer tou dimoun konnen dan pti 3er bomaten, ki se li ki pe monte.

ENN mon kliyan li son problem i diferan. Son pti letablisman touristik i obor en lans, e son kliyan i konplent akoz lisyen zot vwazen i abwaye aswar e dimoun i vin fer piknik lo lans devan son

letablisman, oubyen pa lwen avek son letablisman dan *weekend*.

Ek son kliyan ki'n pey bokou larzan pou zot vakans, i dezapwente. E parfwa zot bezwen kite e al reste dan en lot *guest house* ki pli trankil.

En lot dimoun ki'n koz avek mwan li, set en gran lotel ki fer tapaz avek son diskoplenner. E en lot lotel ankor i konplent akoz bann bato ek *jet ski* dan Dimans avek dimoun i vin mouye devan son laport, pou bwar e zwe lanmizik for. Kliyan i konplent e met post ki negativ lo '*Trip Advisor*'.

Mwan menm Mr Speaker ler mon biro ti *Trinity House* parfwa mon ti bezwen aret koze lo telefon, akoz en *mobile* diskò ti'n park anba e son drayver avek son lanmizik *full blast* ti'n sorti pou li al aste en *pizza*.

Epi i annan tapaz dan flat. Konbyen parmi nou ki'n asize dan en lakaz pe sey *sort out* problemm en dimoun, ouswa pe amenn rekonfor dan en lanmor, zis pou nou bezwen aret koze, akoz en vwazen in deside ki son lanmizik i telman zoli ki tou dimoun in bezwen ekoute.

Legzanp Mr Speaker i annan en kantite. E mon ti a kontan a sa moman, mansyonn de dimoun an partikilye ki'n ed mwan bokou

dan refleksyon pou sa Mosyon.

Enn se ou predeseser, ansyen Speaker MacGregor, ki ti osi ansyen Prezidan Lakour Dapel.

E ki'n ed mwan bokou dan refleksyon sirtou lo bann pwen legal taler ki mon ava met, devan dan sa Mosyon.

E dezyenm se Mr Dubuisson, Dr Poppy parey i ti apel son lekor ki ti tou le semenn dan zournal *Weekly*, fer nou rapel par dan son lartik ki ti ekrir, bann rezulta nefas, ki tapaz i anmennen non selman pou dimoun, non selman pou nou sitwayen, me osi pou bann viziter.

E i ti fer nou konpran ki kot i reste li Anse La Blague se tapaz ki sorti La Digue ki afekte li.

E nou ava vwar donk nou ava vwar donk lanpler sa problemm. Sa detrwa legzanp Mr Speaker in anmenn mwan pou anmenn sa Mosyon devan sa Lasamble, e sa de dimoun in ankouraz mwan pou fer li.

Lontan mon'n anvi anmenn sa Mosyon. Me la dan sa detrwa dernyen mwan, bokou plis dimoun in vin devan mwan e in dir mwan "Onorab ou pa ti pe koz lo en ou pa ti anvi anmenn en Mosyon tapaz zour dan Lasamble en lepok ?" Mon dir wi i dir be nou krwar ki la i en moman pou ou fer li akoz la

problem pe vin bokou pli grav.

Konpran mwan byen Mr Speaker. Mon pa pe dir ki nou pa devret fer tapaz an ekse ditou.

Me tapaz i annan son plas. I annan son letan. Parey liv Eklezyas dan Labib i fer nou konpran, "I annan en tan pou tou." Nou tou nou'n zenn e serten nou, nou ankor zenn dan sa Lasamble nou tou nou anvi diverti sa i normal. E menm nou Konstitisyon i ankouraz nou pou pourswiv en lavi ki anmenn lakontantman.

Akoz lakontantman *happiness* an *Anglais*. I rezon ki nou viv. Lavi pa devret tris i devret gou. Ekse i dan natir imen. Tanzantan nou tou nou pou fer ekse e nou bezwen aksepte ki sa sete dan nou natir e ki nou pou fer li.

Me nou Konstitisyon i osi fer nou rapel, ki ou drwa oubyen mon drwa i aret kot drwa mon vwazen i konmanse. Ou, ou annan en drwa fer tapaz, me mwan mon annan en drwa pou viv san tapaz.

An ferm kont alor se pa en zafer forse lo en kote e sibir lo lot kote, me sete en zafer annan en balans dan sa ki nou fer pou ki tou dimoun i kapab zouir zot lavi an konfor, e aksepte ki tanzantan en *disturbance* pou arive.

Sa ki pa devret se ki menm group dimoun i fer tapaz toulstan, e menm lot group dimoun i bezwen sibir toulstan. Se sa ki mon Mosyon pe target ozordi.

Alor mon Mosyon Mr Speaker, i demann 3 seri dimoun pou fer 3 diferan keksoz. Premyerman nou sitwayen ;- mon pe demande dan mon Mosyon ki tou sitwayen pou respekte lezot dimoun e evite fer tapaz ki pou deranz vwazinaz.

I annan 3 parol kle ladan. Respekte lezot, evite fer tapaz, pa deranz vwazinaz.

E dezyenmman mon pe demann Gouvernman fer en keksoz. Mon pe dir Gouvernman asire ki tou Lalwa ek regleman i an plas, pou *deal* avek bann ki kontinyen deranz lezot dimoun avek tapaz.

Bann parol kle la se Lalwa ek regleman met sa an plas. Pou *deal* avek dimoun ki pa anvi ekoute.

E trwazyenmman mon pe demann avek lafors lord ek lape, pou pran tou mezir pou asire ki tapaz i redwir dan kominate e ki lape i rennyen. E bann parol kle la se pran tou mezir redwir tapaz pou ki lape i rennyen.

Mon'n striktir sa Mosyon dan sa fason pou en rezon senp Mr Speaker. Sitwayen i vin an premye. Se nou ki fer

tapaz. Se nou ki sibir tapaz. Alor solisyon i bezwen komans avek nou.

En pti zefor lo lapar tou dimoun, pou ede sa problem tapaz ganny kontrole.

Mr Speaker tou dimoun pou fer en parti lanniverser tanzantan, ouswa en parti Konfirmasyon oubyen premyer Konmisyon. E lanmizik pou zwe en pe for e en pe tar. Sa i pou arive akoz imen i imen, e nou Seselwa nou kontan lanmizman.

Me nou kapab fer li avek respe pou nou vwazen. E pa fer li an ekse ouswa fer li toulezour. Zwe ou lanmizik pou ou, ou vwazen pa neseserman annan menm gou ki ou, ou vwazen pa neseserman anvi ekout sa ki ou krwar i byen.

Ou vwazen i kapab malad e i kapab i bezwen repoze an trankilite. Si ou'n modifye ou loto pa akseler li ler ou mont montanny dan milye lannwit. Dray en pe pli dousman.

Si ou al lo lans pou fer en pti lafet mazinen ki bann dimoun ki viv dan sa vwazinaz kot ou lans i ete sa *nurse* ouswa sa Zofisyen Lapolis ou drayver *SPTC*, sa travayer *Airport*, sa *waitress* ki'n travay tar ouswa tou lannwit, e ki pe repoze pou al travay ankor i bezwen kapab repoze zot osi.

Epi annou pa blyie, ki Sesel i en destinasyon touristik, e ki lendistri tourizm i premye e pli gran pilye nou lekonomi parey nou fek aprann atraver sa kriz *COVID*.

Mr Speaker touris pa vin Sesel akoz nou en pei tapazer. Zot pa sorti dan zot pei akoz laba i tro trankil e zot oule en pe tapaz dan zot lavi.

Zot pa pey en tiket avyon akoz zot kontan ler zot lo lans ki i annan en "zim boum boum" a kote zot. Zot pa vin Sesel akoz zot kontan pa dormi aswar akoz lisyen zot vwazen i abwaye. Touris i vin Sesel pou *relax*. Annou konpran sa silvouple.

Travay Minister Touris pandan plizer lannen pou ankouraz touris vin Sesel i kapab ganny efase dan en segonn.

COVID in montre nou ki mannyer en move nouvel, i kapab detourn lespri en vwayazer e fer li sanz son lide. Lemoman ki ou ganny en repitasyon negativ, *goodbye* touris.

I pou pran en kantite letan pou refer viziter ganny konfyans dan ou pei. Annou pa blyie ki nou pa sel zil e sel zoli pei dan lemonn. Minis Touris fek fer nou mazin sa semenn pase.

Konpetisyon i la. E si nou pa fer atansyon, e k i nou ganny tro bokou move nouvel

rapor lo *Trip Advisor*, lo *booking.com* lo sa bann lezot platform sosyal se nou ki pou regrete.

Alor mon lapel se avek nou bann sitwayen, pran zot responsabilite silvouple.

Dan en blok lakaz akoz ki fodre ou zwe ou lanmizik pou ki tou lakaz ek tou vwazinaz i ekoute? Lo en lans annou respe pou bann zabitan sa landrwa.

Mwan pase Onorab Lemiel isi menm dan sa Lasanble oubyen lo televizyon, mon pa rapel Onorab, me mon konnen ou ti fer sorti sa pwen tre kler e mon felisit ou pou sa. Akoz plis nou, nou bezwen koz for lo sa size.

Si ou'n modife en loto pou li fer tapaz ler ou akseler-e, akoz fodre ou mont dan semen La Misère ouswa dan semen kan Plaisance vitman dan milye lannwit, pou fer en maksimonm tapaz e pou revey lanmor?

La mon annan en mesaz dezapwentan Mr Speaker. Si ou permet mwan, mon'n demande plizyer fwa pou ganny en *speed bump* obor laboutik Mohan dan kan Plaisance, pou fer ki loto pa akselere e bann zabitan flat Ste Thérèse me anven.

mon espere ki kekfwa atraver sa Mosyon nou ava kapab ganny en solisyon.

Si ou annan en lisyen ki zape, larg li donn li manze, donn li lafeksyon. Aret donn ou vwazen sa ki ou vwazen napa. Andotmo Mr Speaker annou sakenn parmi nou annan respe pou nou vwazen, e pou nou viziter. Annou tret zot parey nou, nou ti a kontan ganny tete si nou, nou ti dan zot plas.

Dezyenm vole mon Mosyon, i demann Gouvernman pou fer keksoz dan sa problem tapaz. Gouvernman li tousel pa pou aret nou fer tapaz. Me Gouvernman i kapab met an plas bann striktir ki pou fors nou obeir ler nou pa anvi. Sa se prensipalman pou asire ki Lalwa i o nivo sa problem tapaz.

Lalwa Mr Speaker, i annan en kantite. Dan Kod Penal anba seksyon 173, i dir ki okenn dimoun dan en plas piblik ki kondwir son lekor dan en fason ki kapab fer en *breach of the peace* en (*bres*) lape, i pou kapab ganny konsidere konman en dimoun *idle and disorderly* e ganny anmase e pourswiv.

E i kapab al prizon pou sa pou 2 mwan. Oubyen i kapab pey en *fine* malerezman *fine* pa'n bokou sanze i ankor en *fine* R100, ki pa pou fer okenn sanzman me nou fek pas en Lalwa semenn pase oubyen de semenn pase kot

nou'n dir ki tou sa bann pti *fine* i pou al prezan ziska R10 mil. Alor nou annan en sanzman la sa se *idle and disorderly*.

Kod Penal li menm anba seksyon 183 i kapab i annan en lofans ki apel Nwizans Piblik. E sa se targete sa bann dimoun ki fer nwizans dan en landrwa piblik e tapaz set en nwizans. Li osi pou kapab ganny en *fine* oubyen al prizon.

Apre ou annan sa Lalwa kosyon, ki nou tou nou konnen akoz nou tou dan nou distrik i annan enn ou plizer dimoun ki'n ganny met lo kosyon. E sa se anba seksyon 31 *Criminal Procedure Code (CPC)* parey nou apel li.

E la se pa gard ki pou vin *deal* avek ou, se ki ou konman en dimoun ki'n ganny afekte ou kapab al Ankour ranpli en form met sa devan en Ziz, Ziz i ava somonn sa dimoun ki pe afekte ou, ki pe fer tapaz or *whatever*.

E si i krwar i merite i ava met li lo en kosyon. I ava dir li mon met ou lo en kosyon. Si ou repet sa ki ou'n fer dan en peryod 1an oubyen 2an ou pou bezwen pey en *fine*.

Si ou pa komet, okenn lofans ou pa bezwen pey en *fine*. E sa donk i en pti pe parey en lisyen mesan. Lisyen pa pou mord ou me i la i pou vey ou pou fer sir ki ou *behave*.

Anba Road Transport Regulations i annan en regilasyon ki dir ki okenn dimoun ki zwe oubyen i les zwe lanmizik for dan son loto dan en fason ki i pou fer nwizans piblik i komet en lofans e i kapab li bezwen pey en *fixed penalty*.

Epi ou annan seksyon 9 *EPA Environment Protection Act* ki dir menm zafer. Si tapaz i al plis ki en serten tarif, sa i vin en lofans e bann mezir i kapab ganny pran pou prezerv lanvironnman.

Alor Lalwa i la. Lalwa i la me kekfwa i pa pe ganny aplike dan lafason ki i devret e sa nou ava gete dan trwazyenm vole mon Mosyon bomaten.

Me ki Gouvernman i kapab fer an plis ki sa Lalwa ki la? Mr Speaker Gouvernman in fer, annefe pa Gouvernman nou ki'n fer. E la mon devret mon krwar i moman pou nou felisit nou lekor lo lefet ki nou fek fer en sanzman dan *Civil Code*, Kod Sivil ki pou vin an fors demen le 01 Zilyet dapre mon konpran Prezidan in siny en *Commencement Notice* swivan bann Lalwa ki nou'n fer pase semenn pase, e ki Kod Sivil pou vin an operasyon semenn prosen.

E zot ava rapel bann zot ki ti la, me pou bann ki pa ti la les mon edik zot en pti pe. Nou'n pas en Lartik ki nouveau

dan nou *Civil Code*, Lartik 1389 ki sa Lartik ki *deal avek* sa ki nou apel *Trouble de voisilage*.

E se presizeman pou target sa kalite keksoz. E la i dir ki si en dimoun i atraver son fot oubyen son neglizans, i *disturb* son vwazen, par lefet ki son vwazen nepli kapab *enjoy* son propriete mannyer i ti kapab, akoz sa enn ki an tor in fer en keksoz an ekse, Lalwa pou kapab *deal avek* li.

E nou'n pas en Lalwa ki dir, menm si ou'n pran tou prekosyon neseser, me ki sa *disturbance* in vin akoz sa aksyon ki ou pe fer ou pou responsab.

E la mon ava fer zot rapel sa ki *CEO Planning Authority* ti dir nou, ler i ti dan Lasanble dernyen fwa. Sa i aplik non selman pou lanmizik, me pou okenn keksoz ki *disturb* en vwazinaz atraver tapaz, atraver lafimen, atraver loder okenn keksoz ki ou fer ki trouble ou vwazinaz ou pou responsab.

E i pa en enportan si ou'n fer tou keksoz pou ou minimiz sa zafer, si ou vwazen i ganny afekte ou pou responsab.

Alor legzanp ki nou donnen se si ou'n ganny en *License* pou ou fer en garaz, dan en landrwa rezidansyel, ou pa kapab dir be mon annan *License*, alor *spray* ou loto en Dimans apre midi oubyen fer

en *panel meeting* ki pou fer tapaz 10er diswar. Ou pa kapab fye lo sa *License* akoz Lalwa i dir ou pa kapab fye lo la.

Oubyen si ou'n ganny en *License* pou ou vin en sarpanye, ou pa kapab servi ou *power saw* Dimans apre midi ler ou vwazen pe sey repoze pou ou sye dibwa, oubyen *chainsaw or whatever*.

Se sa Lalwa ki nou nou'n pase e la i pou bezwen ganny *apply* e mon krwar nou tou ler nou ti anmenn sa Lalwa *trouble de voisilage* nou ti koz lo la nou tou nou ti annan dan nou lespri, bann *disturbance* ki arive dan vwazinaz, e ki nou ti anvi en lot kapasite olye depann lo Lapolis, ek bann lafors lord ek lape, ki nou menm nou, nou kapab pran en aksyon kont sa dimoun ki pe *disturb* nou.

Sa ki fodre fer prezan se fodre bann regilasyon i ganny met an plas, pou ki nou kapab *fast track*. Akoz i pa fer okenn sans si nou annan en Lalwa *Trouble de voisilage*, e i pou pran nou 1an atraver Avoka pou fayle en plent devan Lakour, eksitera e akoz *by then* kabri in fini manz salad.

Me apre nou annan nou bann zizman Lakour li menm, la mon annan en zoli *case* anfen mon kapab mansyonn bann non, akoz sa 2 dimoun tou le de nepli avek nou.

E set en *case* ki ti arive dan distrik dan *constituency* Onorab Esparon Glacis ant 2 dimoun byen koni dan sa landrwa Mr Andre Brouchereau avek Mr Perin Francois, ki toultan ti regilyerman Ankour akoz enn ti *disturb* lot, lot ti *disturb* sa enn. Sa enn ti *disturb* lot.

E Lakour ti dir e sa ti an 1980 donk bann zizman in la depi en bann letan pase, Lakour ti dir "*there is more than one remedy which a person can pursue when a neighbour is creating so much noise, apart from an action and nuisance.*"

E la i liste tou sa bann Lalwa ki mon'n mansyonnen. Me in mansyonn enn ankor. E sa se en Lalwa en regilasyon ki apel *Amplification of Sound and Playing of Music Control Regulations*, ki'n ganny fer an 1976, menm lannen ek nou lendepandans.

E i dir ki en lofans pou zwe lanmizik for ant 11er edmi diswar ek 6er bomaten, donk i la, i annan en regilasyon. Alor pa les gard dir ler zot arriv dan en landrwa minwi ki sa dimoun in ganny son *license* alor i kapab zwe son lanmizik regilasyon i dir ou pa kapab. 11er edmi dimoun i bezwen dormi.

Si ou anvi zwe ou lanmizik for napa problem si

ou en bar oubyen en restoran, *Air condition* ou landrwa fer li *soundproof* napa okenn problem ou ava zwe ziska bomaten si ou anvi. Me ou napa drwa afekte ou vwazinaz.

Epi mon krwar i sa Gouvernman i kapab fer Mr Speaker nou pe demann zot atraver sa Mosyon, ki si i pase e mon espekte i pase, nou pou fer sir lo nou kote ki Gouvernman i reazir lo sa Mosyon e i pa zis soud lo nou.

Gouvernman i kapab pa donn *Planning permission*. Oubyen pa donn en *License* pou bann aktivite ki pou trouble en landrwa rezidansyel.

Ou pa devret donn *Planning permission* oubyen en *License* pou en dimoun fer en garaz dan en landrwa rezidansyel oubyen fer en laferm, oubyen en *quarry*, oubyen fer en pti lendistri sarpantye, ou pa devret. Mon krwar se a sa nivo ki Gouvernman i kapab vin proaktif.

E dezyenmman Gouvernman i kapab met en pe plis resours a dispozisyon bann lafors lord ek lape, pou zot kapab entervenir.

Par egzanp nou *Environmental Protection Act* e nou ki ti dan sa Lasanble dan sizyenm Lasanble nou ava rappel, *Environmental Protection Act* i dir ki i annan

en nivo tapaz ki ou pa devret depase.

E pou sa ou bezwen en *decibel counter*. E Minis Loustau-Lalanne ti vini e i ti eksplik nou ki zot annan bann *decibel counter* eksetera e ki e ki sa i fasil, alor pou nou kapab pou bann lafors lord ek lape bann lafors lanvironnman pou konnen si tapaz i an ekse.

Me eski okenn nou, nou'n deza vvar okenn dimoun dan nou vwazinaz avek en *decibel counter* pe sey kont tapaz? Mon pa krwar mwan mon pa'n vvar. Pourtan nou'n fer konplent bokou fwa ler sa keksoz in arive.

E finalman Gouvernman i kapab fer en keksoz ki Gouvernman i tre bon lo la. Pa solman sa enn me bann Gouvernman avan e sa fasilit ledikasyon dan lekol ek lo medya. Akoz ledikasyon i marse. Ledikasyon, ledikasyon, ledikasyon i marse.

E ler dimoun depi en tre zenn az i ganny edike, parey nou'n vvar dan bann Klib lLvironnman, parey nou'n vvar dan bann Klib Anti-Drog, parey nou'n vvar avek *HIV/AIDS* programm *HIV/AIDS* dimoun i ekoute.

E kantmenm ou pa pou ganny 100poursan rezulta, ou ava ganny en pe rezulta e en pe

i toulstan bokou mye ki nanryen ditou.

E finalman Mr Speaker, lafors lord ek lape trwazyenm vole mon Mosyon i demann lafors lord ek lape ki enkli Lakour. Akoz Lakour se dernyen *stop* ki en dimoun i annan pou anpes en defayans, pou anpes en defayans legal arive.

Sa i dernyen faz en prosedir. Nou pa devret fye lo Lapolis ek Lakour pou adres problem ki nou konman sitwayen nou pa anvi adrese oubyen nou les arive.

Me ler nou pa azir responsab dan en fason responsab, e ler nou napa okenn respe pou nou vwazen, nou pei ek nou viziter Lapolis ek Lakour i bezwen mele. E sa i enportan. Nou bezwen konnen ki annan sa possibilite ki lafors lord ek lape pou entervenir.

Nou'n vvar bann Lalwa ki an plas. La nou'n vvar ki mannyer sa bann Lalwa i ganny aplike. Premyerman lafors lord ek lape zot bezwen konnen ki zot annan sa bann pouvwar.

E mon krwar ki en bann keksoz ki nou'n vvar par lepase se ki pa'n annan ase ledikasyon bann gard zot menm ler zot vin lo en sin zot pa tro konnen anba ki Lalwa ki zot pe ki zot kapab entervenir, zot pa konnen ki pouvwar zot

annan, mon krwar la i devret annan en ledikasyon ki mon espere ki nouvo Komisyoner Lapolis i ava antreprann atraver avek son bann zofisye.

Zot bezwen konnen ki zot drwa anba ki Lalwa e ki zot kapab fer. Epi zot bezwen annan resours. *Boots on the ground* parey nou dir. I pa vo lapenn Mr Speaker si ou pou call en Kordgard ler i annan en problemm ki arive dan distrik ki ou anvi antreprann la, e ki gard i dir ou *sorry* nou napa loto oubyen transpor i lo en *scene* e ki ler transpor in fini lo sa *scene*, problemm li osi in fini rezourd. Alor nou pa kapab fer nanryen.

Mon krwar nou bezwen nou *deserve* koman en Nasyon en pe plis lasistans. Me gard mon pa kapab blanm zot akoz zot osi zot pe travay avek pti gin resours. E zot pa toultan kapab ariv lo tou bann *scene* ler zot ti ava kontan.

Alor kekfwa i letan pou nou parey nou ti dir avek Komisyoner Lapolis ler nou ti pe *interview* li 2 semenn pase, annan en pe plis *community policing*.

E mwan mon'n fer en propozisyon ki dan bann sou distrik ou annan en pti Kordgard, en pti *container* Kordgard avek en zofisye Lapolis ladan ki kapab entervenir dan en fason vit.

Lo bann lans, si tapaz i arive lo lans e ki zanmen i annan en zofisye Lapolis oubyen en zofisye lanvironnman ki in fer anpeste, nou pa pou kapab zanmen arive anpes tapaz lo lans.

Alor nou bezwen annan bann dimoun ki pou pran ki pou *monitor*, i pou pran bann aksyon, e zot kapab fer. Nou'n vvar avek bann *Public Health Regulation* depi COVID-19, prezans Lapolis lo bann lans pou *enforce Public Health Regulations*. Sa i devret osi arive a tou moman dan lavi e pa zis ler nou annan en lepidemi COVID.

E parey mon'n dir lafors lord ek lape i bezwen annan en pe plis lekipman. Zot bezwen annan plis transpor, nou konpran problemm ekonomik me mon krwar nou devret met devan bann Lotorite, ki ler zot kapab donn en pe plis resours donn en pe plis lekipman, pou sa bann gard kapab fer zot travay.

Apre Mr Speaker mon krwar nou devret donn bann lafors lord ek lape, en pe plis ledan. Zot devret kapab parey zot ti fer en lepok annan pouvwar pou sezi en lanmizik.

E anmenn li Kordgard pran sa lanmizik an kontravansyon e les sa dimoun vini apre enn de semenn pou li reklanm son lanmizik. Enn de fwa ler sa in

arive mon asire ki i pa pou arriv ankor.

Zot devret kapab *tackle* modifikasyon loto. *I mean* ki mannyer ki mannyer eski bann Lotorite *Land Transport* pa kapab *tackle* modifikasyon loto ki son modifikasyon i annan en sel bi e sa se fer tapaz. Nou devret kapab annan en sistem kot ou ava tir pwen lo *License* parey fek propoze isi menm dan sa Lasanble, oubyen met en *notice "not to use"* lo sa loto.

Apre enn de fwa sa dimoun i ava konnen ki ler in modifye son loto, dray li dousman ler i al dan en *race* e sa ou napa okenn problem la i ava fer tou son tapaz ,akoz sa i akseptab, me i pa pou fer li 3er bomaten ler i pe mont La Misère zis pou fer tou dimoun leve konnen ki se li ki pe monte.

Nou kapab annan osi en *notice "not to use"* ler en dimoun pe zwe en lanmizik tro for dan son loto. I pe pase anvil i pe *drown-out* tou bann lezot tapaz. Donn li en *notice "not to use,"* oubyen donn li oubyen tir detrwa pwen lo son *License* oubyen donn li en *fixed penalty* e i ava konnen ki pou fer.

E la mon profite pou dir ki mon pa konpran en swadizan politisyen lotrozour lo televizyon ki ti pe dir ki avek kriz lekonomi, i krwar ki *fixed*

penalty pa ti'n devret sorti R200 pou arriv R1000.

Ti devret mont R300 akoz en dimoun pa kapab *afford*. E i pa'n zanmen mazinen poudir avek bann dimoun be si zot obeir Lalwa e zot met zot *seat belt* ni R200 zot pa pou bezwen peye. Me sa ki ou a fer, se sa bann pti lenthavansyon ki retard nou progre dan nou pei.

Tousala alor Mr Speaker, se bann mezir kapab ganny met an plas, pou fer dimoun respekte lezot.

An konklizyon alor annou pa kay lo dernyen faz sa problem, sa se vye fason fer. Annou tir en paz silvouple dan *play book* ladministrasyon LDS ki o pouvvar.

Mr Speaker konpran byen sa size tapaz pa en size politik. E mon pa anvi ki mon fini lo en not politik, akoz sa problem i en problem pou nou tou. Sak Seselwa i fer fas a sa problem sak Seselwa i annan en responsabilite.

Si mon'n fer referans a ladministrasyon aktyel, se akoz ladministrasyon aktyel i annan en filozofi politik ki kapab osi aplik lo sa problem tapaz.

Sa se responsabilite endividyle. Nou pei i bezwen vin enn kot sak sitwayen i pran son responsabilite li menm. Pou travay, pou pey *tax*, pou sonny son fanmir, me

osi pou pa ankouraz tapaz pou viv an armoni, avek son vwazen, pou respekte tou dimoun ki pe partaz sa morso ros dan Losean Endyen ki nou apel nou pei Sesel.

Enkli bann ki vin depans zot Dolar ek zot Ero kot nou. Si sakenn parmi nou, nou fer sa nou pa pou bezwen fye ni lo Gouvernman, ni lo lafors lord ek lape. Nou pou rezourd nou problemm nou menm, e problemm tapaz i ava en problemm ki nou ava dir i en problemm lepase.

Ozordi Mr Speaker 45an apre nou Lendepandans nou ava kapab viv parol nou Konstitisyon e egzers nou drwa ek nou laliberte endividiyel avek respe pou drwa e laliberte lezot dimoun tousala dan lentere Nasyonal. Mr Speaker *I beg to move.* Mersi.

(APPLAUSE)

MR SPEAKER

Mersi Onorab. Mon ava envit en secondment pou Mosyon Onorab Georges.

HON ANDY LABONTE

Mr Speaker mon segonn Mosyon e mon a demann permisyon pou mon entervenir lo sa Mosyon.

MR SPEAKER

Onorab Labonte wi ou annan laparol. Mosyon in ganny segonde.

HON ANDY LABONTE

Bonzour Mr Speaker. Bonzour tou Manm koleg Onorab. E bonzour tou dimoun ki a lekout, spesyalman bann zabitan La Rivière Anglaise mon ti a kontan ki zot vreman ekoute.

Akoz sa Mosyon ki Onorab Bernard Georges in met devan, i en Mosyon ki vreman enportan e mon ti a kontan ki zot pran kont akoz i konsern nou tou.

Mr Speaker, Mosyon anmennen par Onorab Bernard Georges i fer nou tonm dan en gran refleksyon e fer nou reflesir nesesite e lesansyel pou nou viv an armoni e respe dan nou kominate.

Pep Seselwa i en Nasyon ki vreman spirityel e krwar dan bann bon valer parey respe ek larmoni. Mr Speaker, la spirityalte i labaz en sossyete e i osi vedir annan respe ek larmoni, dan nou kominate.

E i vedir ki nou bezwen viv an konminyon avek kanmarad. E sa Mosyon pe demann nou pou respe nou kominate.

Premye parti sa Mosyon, pe koz lo respekte lezot dimoun e envite fer tapaz ki

pou deranz vwazinaz. Ler nou respe lezot i vedir ki nou pe respe nou prop lekor. Alor i enportan ki nou respekte lezot e respe nou lekor.

Laba Mosyon ki'n anmennen par *LGB* i osi koz lo logmantasyon lo nivo tapaz, lanmizik, kriye zannimo ouswa transpor dan tou distrik. Nou fek vwar en pe letan pase lo televizyon nasyonal, kot *LWMA* in vin lo televizyon pou koz lo ler ki bann kontrakter i merit koup zerb e servi *blower* dan kominate.

E sa Mosyon pe osi pe adres sa konsern. Akoz i pa akseptab ler ki en dimoun en zabitan li i dir poudir i pe debourye, me selman i vin en lenkonvenyan pou son prosen.

Alor i enportan ki nou annan respe ankor enn fwa. Kisisa oubyen kwa tapaz li menm? Mon demann sa kestyon, akoz i pa kler anba Lalwa pou kan pou definir ki lanmizik, kriye, zannimo, ouswa transpor i vin en tapaz.

Mr Speaker, lanmizik pa sipoze en tapaz, si i ganny zwe dan son landrwa ki apropiye e lo en nivo ki apropiye e pa pe kree en lenkonvenyan pou son prosen.

La i fer mon mazin en batiman, ki'n depans sitan kantite larzan lo la ki'n ganny konstri dan distrik La Rivière Anglaise ki nou pe apel li

konman Stad Lanmizik, ki definitivman i pou en *disturbance* pou nou distrik.

Alor sa Mosyon i pou ede pou fer Gouvernman pou re pans lo la vi ki i annan bokou larzan ki'n ganny envestir dan sa batiman, eski i vreman en batiman ki nou merit servi li pou fer bann spektak lanmizik or petet nou kapab itiliz li pou en keksoz pli apropriye?

Mon osi mazin sa bann vwazen parey loter Mosyon in dir, ki zot deside pou zot zwe lanmizik, zot pa zwe lanmizik pou zot lekor zot, me zot prefer zwe lanmizik pou zot vwazen ekoute, me dan lesans kot vwazen pa enterese pou ekout sa kalite lanmizik ki zot, zot anvi tande.

E ler ki en vwazen i sey vini pou koz avek zot poudir ki sa i en *disturbance* zot prefere ensilte oubyen zour sa lot vwazen. Ankor enn fwa i montre ou ki annan en mank respe.

Mr Speaker, dezyenm se kriye. La ankor mon mazinen ler ki en dimoun li i pe zwe lanmizik kot li, me an menm tan i pa ni pe sante li, i plizoumwen pe kriye, e ankor enn fwa i pe kre en lenkonvenyan pou son vwazen. Alor i enportan ki ou reflekte nou reflesir lo tousala.

Zannimo Mr Speaker zannimo pa sipoze en tapaz. Me zannimo i kapab vin en

problem an term tapaz ler ou nepli annan kontrol lo li, or i an deor kontrol son met.

Loter Mosyon in osi koz lo transpor. Eski transpor i sipoze vin en tapaz? Larepons i non. Me parkont i kapab vin en tapaz. Loter Mosyon in koz lo modifikasyon transpor.

E la nou kapab vwar poudir menm Lalwa i pa vreman kler lo tousala. Mr Speaker sa i fer mwan mazin en group zabitant Seselwa ki'n deside pou zot *invest* dan zot transpor akoz pou zot, zot annan en group endividé ki'n zwenn ansanm e zot in ekrir en let annefe Mr Speaker.

(Pardon mwan) zot in ekrir en let ki ti'n sinyen par Mr Joseph Pillay, kot zot in fer en demann pou annan en landrwa apropiye kot zot konman en sitwayen ki i annan en pasyon pou lanmizik, zot kapab park zot transpor e ale kot zot kapab defoule e santi zot pe kree en *disturbance* pou lezot dimoun. Akoz zot tou zot annan menm pasyon.

E la kot Lotorite i kapab anmas petet en reveni lo la. E tousala i bann keksoz ki Gouvernman i kapab pran kont. Mon krwar ki tou sitwayen ki annan diferan lentere, i merit kapab groupe e fer keksoz ki zot tou zot krwar i enportan pou zot.

Trwazyenm parti sa Mosyon, i koz lo lafors lord ek lape, pou pran tou mezir pou asire ki tapaz i redwir dan kominote. E lape i renye.

Alor i enportan ki bann madanm ek zomn dan liniform, i ganny zouti lekipman ek resours apropiye pou ki zot kapab desarz zot responsabilite avek dignite ek respe.

La mon pe mazin sa lenstriman ki Onorab Georges fek koz lo la, servi pou detekte mezir nivo tapaz. Ziska preznan nou pa ankor zanmen vwar sa lo nou later Sesel.

Mr Speaker, avek sa de parol mon pou siport sa Mosyon e mon demande ki Gouvernman i pran kont sa Mosyon. Mersi.

MR SPEAKER

Mersi Onorab. Bon nou ava kontinyen avek lezot lenthervansyon, mon ava envit bann Manm pou gard zot entervansyon otour 6 minit. Pa blyie i annan en kantite dimoun i anvi koze e bann pwen pou ganny sorti anmezir deba i kontinyen. E avek sa petet mon ava envit Onorab Lemiel *Chief Whip* Lopozisyon pou kontinyen, Onorab.

HON SYLVANNE LEMIEL

Mersi Mr Speaker. Bonzour tou mon bann koleg Manm

Onorab. Bonzour tou dimoun ki a lekout.

Mr Speaker, size sa Mosyon ki'n ganny anmennen devan nou Lasanble ozordi, i enn ki'n ganny koz lo la dan sizyem Lasanble letan ki nou ti pe diskit *Civil Code* Sesel.

Problenn tapaz Sesel i enn ki'n vin tre alarman. E pou note nou annan Lalwa ki *deal* avek sa problenn ki apel tapaz. Petet i bezwen ganny ranforsi par Lotorite konsernen.

Mr Speaker tapaz li menm, i en kalite polisyon. Ou pa kapab vvar li, be i la preznan. E i afekte imen konman zannimo.

Ozordi nou pe konsantre lo tapaz ki afekte imen. Loter Mosyon i koz lo differan kalite tapaz ki pe afekte tou dimoun dan tou distrik. Mon distrik osi pa'n ganny eparnyen.

In koz lo tapaz lanmizik ki ganny zwe dan lakaz konman dan loto. Tapaz zannimo parey lisyen, dimoun ki kriy e fer tapaz tou lazournen, parey i annan ki pran plezir pou zoure depi bomaten ziska aswar.

Sa ki donn lanmen sante e kriye byen for, letan lanmizik pe zwe par lao 60 *decibel* dan zot lakaz oubyen ou kapab dir zot pe zwe lanmizik pou en kominate antye tande.

La ler i annan sanson pou sifok zot vwazen, zot

ogmant *volume*. Sa ki le koup zerb devan son laport 6er diswar dan Sanmdi, oubyen Dimans 4er apre midi, letan en dimoun pe repoze e i pe sey rod en pti sonm repoze pou li al travay son Lendi.

Kontrakter ki netway semen, i servi en *blower*. Me selman la nou vvar Lalwa ki'n vini, ki'n ganny dir i bezwen annan en ler pou li servi sa *blower*. Ki byen e i dir ou i bezwen fer sa dan en ler ki nou apel li konvenab.

Mr Speaker tapaz i annan en lenpak negativ lo lasante imen. Petet bann ka pa ganny rapporte, me tapaz i kapab fer dimoun vin soud, ganny tansyon, malad latet, ganny latak leker, ganny problenn dormi e stres osi.

Menm si i annan de nou la nou dir lanmizik i tir stres me i donn stres tou. Sirtou ou pe sey rod en sonmey ou malad ou pa pe kapab dormi, akoz mon vwazen pe tro kriye, pe tro sante ek son lanmizik kot li.

Mr Speaker mon konsyan ki dimoun sirtou bann zenn, zot bezwen landrwa pou zot defoule. Ler i dir ou in ariv Vandredi swar e *weekend*, me tou sa i bezwen vin avek responsabilite.

Ou pa kapab pe zwe lanmizik, for dan en landrwa rezidansyel. Sirtou aswar kot lamazorite dimoun pe sey

dormi. I bezwen annan en ler ki sa lanmizik i tennyen. Menm ou sa dimoun ki pe *disturb* ou kominote i bezwen al repoze a en serten ler – non?

Tou dimoun i bezwen vin responsab dan sa sosyete. I annan Lalwa ki an plas. Me mon santi i bezwen ganny enplimante en pe pli for. I bezwen pli morde.

Mon pran en legzanp mon distrik Anse Royale Mr Speaker. I annan en landrwa kot *Land Transport* in fek aranze akoz nou semen Fairy Land ti pe degrengole ti pe al dan lanmer, so nou'n fer en *rock armouring*, nou'n aranze dimoun in batiz sa konman *jetty*. *Ok?*

Bann dimoun i vini, nou ganny dimoun sorti diferan landrwa otour Mahé. Lotrozour mon asize mon pe get Lasamble semenn pase lo televizyon, mon'n tann Onorab Arissol nonmen. I annan dimoun i sorti Anse Royale sorti partou i vin Bel Ombre i dir, i vin *disturb* son bann dimoun.

Me parkont osi i annan ki sorti Bel Ombre, ki sorti partou ki vin lo *jetty* Mr Speaker. E zot vin ek bann gro *speaker*, zot vin deranz nou bann dimoun dan Fairy Land. E nou konn byen poudir dan Fairy Land i en landrwa kot i annan bokou, bokou

lenstitisyon oubyen bokou landrwa touristik.

Kot bann dimoun i vin rod en pti landrwa pou zot repoze. Sa landrwa i en *parking* sa. I pa en landrwa kot nou vini pou nou vin donn bal, pou nou vin fer tapaz, pou nou vin deranz sa bann dimoun dan sa vwazinaz ki la.

E la mon'n dir dimoun i servi sa landrwa zot pou zot defoule zot. Preski toulezour zot la. Pandan bann dernyen mwan nou kapab dir lannen pase, avan ki petet nou ti'n met en pe restriksyon en pe pli for lo kote *COVID* Mr Speaker, ou ti ganny dimoun ki vin dan sa landrwa avek latab domino! *Ce gens* i zwe domino ziska granmaten.

Anmenn latab parey dan zot salon pou fer parti *barbeque* nou griye, nou kriye nou fer tapaz. Me zot nou bezwen mazinen nou kanmarad ki pe pas atraver serten problem osi dan en kominote. Nou pa kapab zis vini ou pe konsonm bwar ou pe zwe lanmizik for, e ou pe fatig lezot dimoun. La i vedir ki ou pe mazin zis ou prop lekor la.

E Mr Speaker, touris li menm nou ganny bann touris dan sa landrwa ki'n dir nou poudir Sesel nou'n fer bokou devlopman, Sesel nou'n ariv lwen, me i annan en keksoz ki

Sesel Seselwa nou'n blye, se nou trankilite.

Se i dir parey i annan serten dimoun ki'n koz ek mon i dir nou dakor Seselwa zot annan sa lazwa de viv, zot kontan anmize.

Me i bezwen annan en fason fer. I bezwen ganny fer avek respe. I bezwen ganny fer dan en fason kot ek responsabilite. E sa i paret mwan nou bann dimoun in konmans bly en pti pe sa. Ler nou'n konmanse nou le ale menm.

Distrik Anse Royale osi mon pou kontan petet lo sa kote dir ki nou lo kote Lotorite Distrik e Lapolis. Nou'n ganny pa mal konplent lo sa *issue* tapaz nou pe koz la sa landrwa kot mon'n koze, akoz li la mon pe met lanfaz lo li Mr Speaker konman nou dan Lasamble. Akoz i pli gro problem pou lemoman pou Anse Royal li. *Ok?* I pli gro problem.

Nou annan bann lezot problem dan bann lezot sou distrik, me sa enn la i pe afekte pli bokou dimoun, mon kapab dir. So Lapolis li menm Anse Royale letan zot in ganny sa bann konplent, nou annan pa mal arrestasyon ki'n ganny fer.

Nou annan pa mal lo kote bann dimoun ki'n ganny met dan kaso. I annan dimoun ki'n ganny sarze. Akoz? Zot ti pe konsonm lalkol dan sa landrwa e an menm tan pou

bann tapaz petet ki ti pe ganny fer ki konplent in sorti dan bann dan sa kominate li menm.

Pou lemoman travay ki nou'n ganny fer dan sa landrwa, i se ki Minister Lasante in bezwen met en notis, pou donn *warning* dimoun, lo kote ki pou arive si tapaz i kontinyen dan sa landrwa. Me mon panse la ek letan *curfew* petet dimoun pa pe sitan vin dan sa landrwa, pou zot fer parey zot ti pe fer avan.

E mwan mon ti ava profit la ki mon lans en lapel, menm si nou pa pou dan en letan *curfew*, nou vini nou servi landrwa me annou servi li byen.

Akoz menm si zot ti pe servi li salte tousala zot kit deryer. Nou bezwen servi en landrwa byen e ki ou mazinen demen ou pou tourn la ankor la, ou pou vin asize pou ou vin respir sa ler fre ki sorti dan delo sale, e nou bezwen en lanvironnman e en landrwa prop.

E ou bezwen fer sir ler ou'n vin asiz la ou zwe ou lanmizik dan ou loto pou ou tandé, me non pa pou kominate Fairy Land antye tandé. Akoz sa i vreman mal.

Pou mwan kontinyen letan mon regard lezot sou distrik Mr Speaker dan Anse Royale, nou ganny konplent

lanmizik ki zwe for sirtou dan bann *flats*. Tapaz lisyen kot vwazen oubyen lisyen vwazen ki vin dan lakour en lot ki lager ek kanmarad. E sa i kree bokou nwizans. Sa ki zoure depi bomaten ziska aswar toulezour sa. Tou sa i bezwen ganny rezourd.

Mr Speaker mon pou pran en size *sorry* si mon'n sot 6 minit akoz sa i en konsern, mon annan dimoun dan mon distrik, wi zot lakaz in toulstan la obor semen. Ozordi i annan devlopman ki pe devlope partou.

Sa dimoun ki'n dir mon koz lo sa size, enn i en dimoun ki pe viv avek serten problem lasante, i dezabilite li menm, e mazorite dimoun ki la obor semen nou pe koz semen Les Canelles mazorite dimoun ki dan sa landrwa zot annan laz, mon kapab dir.

Sa ki mon'n ganny dir se ki dimoun pa kont - nou pa kont okenn devlopman ou konstriksyon ki pe deroule. Meton li in servi sa legzanp Anse La Mouche.

Me ler ou annan ou bann *trucks* UCPS 30 tonn ki pe monte 8er diswar ziska 10er diswar ek materyo. E kote ki i pou vin pas son gir li, lanmenm la anba sa msye i fek dir mwan. I dir mwan, "Mrs Lemiel ou fini konnen letan en drayver Seselwa pe *drive* avek en etranze. Sa drayver

Seselwa i konnen kot i pe al pas son gir anler laba konmsi i pa tro fatig ou. Me sa drayver etranze i pas sa lanmenm la anba kot ou lakaz nek i 'voom 'anvoy tou sa bann lafimen."

I dir "mon pe sey ekout Nouvel 8er Mrs Lemiel, mon pa tann nanryen." Ou konnen e sa la sa dimoun si ou vwar ozordi i pe plenny sa la in ganny ase.

E i annan Lalwa pou sa, sa bann gro *truck* UCPS ki mannyer 8er diswar ou ankor pe saroy materyo pou anmenn laba lo *site*? E ou pe fatig dimoun ou pe *disturb* dimoun. E sa bann dimoun i vye zot bezwen repoze dan sa ler. I anvi sey ekout Nouvel lo televizyon i pa tann naryen.

So mon krwar sa osi Lalwa i bezwen ganny enplimante, Lotorite konsernen petet nou bezwen vin en pti pe vizilan, nou bezwen vin regard en kou. Keler ou komanse keler ou sipoze fini akoz tou dimoun i sipoze annan en ler ki i kapab repoze.

Nou bezwen annou en kominate kot tou dimoun i vin an armoni avek kanmarad Mr Speaker. Kot tou vwazen i annan sa respe pou enn a lot. Tapaz i kree dezord antre vwazen.

I drwa tou dimoun pou viv dan trankilite. I pa defann amize zwe en lanmizik avek

moderasyon, e mazin lezot. Mazinen ler ou pe zwe lanmizik for dan ou lakaz, i kapab annan en vwazen ki pe kriy rod sekour li, me personn pa pe tann li akoz ou, ou lanmizik i tro for.

E la i annan risk kot i perdi lavi. Parske personn pa'n tann li pou sey vin sekour li. Annou mazin lezot dimoun dan nou zalon trou ki malad, ki'n fek perdi en pros dan son fanmir e ki bezwen sa silans.

An terminan Mr Speaker mon ti a kontan anmenn mon sipor a tou zofisyen Lapolis Anse Royale. Sa bann dimoun pe vreman seye, sa dimoun i vreman pe debourye sirtou kot i konsern letan i annan en rapor ki ganny fer zot seye rod zot mye pou zot rezourd sityasyon tapaz.

Me parkont in toultan annan dimoun ki pa pou satisfe. I toultan dimoun ki vwar poudir zot pa pe fer ase. Me selman mon sipor a zot i la. Mon dir zot annou travay ansanm pou nou kapab konbat sa problem ki apel tapaz dan nou distrik.

Bann dimoun osi dan tou kominate zot bezwen mazinen, ki sa ki zot pa kontan zot kanmarad fer avek zot, zot pa kapab fer li avek zot kanmarad. In plis ki ler ki tou Lotorite konsernen i zwenn ansanm. E met Lalwa an aplikasyon.

Pran aksyon kot i neseser, tou dimoun i annan drwa pou li zouir lape e frankilite. Alors sakenn de nou annou pran nou responsabilite. Mersi Mr Speaker.

(APPLAUSE)

MR SPEAKER

Mersi Onorab, tre byen. Nou ava ekout Onorab Philip Monthy.

HON PHILIP MONTHY

Mersi Mr Speaker. Mr Speaker Mosyon anmennen par Onorab Georges i enn ki mon kapab konsidere konman brav lo son par. An vi ki sa Mosyon i kapab annan potansyel pro ofans serten kous nou popilasyon.

Swivan deba ki'n deza pran plas lo sa size lo SBC, mon'n kapab temwanny reaksyon plizyer dimoun lo rezo sosyal. Menm si in annan plizyer ki ti apresye ki sa size tapaz, pe finalman ganny adrese, in annan en serten group nou popilasyon ki'n montre zot mekontantman.

E mon asire ki sa i pou ankor leka swivan deba lo sa Mosyon dan Lasamble ozordi. Sa group nou popilasyon ki pe reakte dan sa fason, zot panse ki nou pe sey vin sanz lafason ki Seselwa i abitye viv. Lafason ki nou abitye detann

nou lekor. Andotmo se vin sanz nou tradisyon.

Mr Speaker sa Mosyon anmennen par Onorab Georges, pa pe vin fer sa. Ler nou pe abord sa size tapaz nou pa pe vin dir avek Seselwa aret zwe zot lanmizik kot zot lakour. Nou pa pe dir ek Seselwa aret zwe lanmizik dan zot transpor, e menm aret zwe lanmizik ler zot al fer en piknik an fanmir lo nou bann lans.

Sa ki sa Mosyon pe demande, se ki nou tou senpleman fer sa bann aktivite dan en fason ki responsab, e ki pa pou vin en nwizans e sityasyon enkonfortab pou sa ki dan nou lantouraz o moman ki nou pe angaz nou dan sa bann aktivite.

Ler sa pa ganny respekte, Mosyon pe tou senpleman demande ki Lotorite konsernen i entervenir e fer sir ki respe i rennyen e Lalwa i ganny aplike pou sofgard byennet lezot Seselwa ki pe ganny afekte.

Polisyon koze par tapaz, i kapab afekte en dimoun fizikman e psikolozikman. I enport note ki tapaz koze par trafik an partikilye, i ganny konsidere par *WHO* konman dezyenm sours lakoz prensipal *stress* lo imen par deryer *air pollution*.

E Mr Speaker se egzakteman sa ki enn mon pli gro defi e sours plizyer

konplent ki mon pe resevwar sorti kot plizyer zabitan mon distrik.

Menm si mon'n ganny detrwa rapor lo serten endividé ki pe kontinyelman deranz zot vwazen avek lanmizik, pe ganny zwe for ziska tar dan lannwit ;- tapaz okazyonnen par sa bann loto lo sa morso semen sorti Providence pou al *Airport* i reste fristrasyon nimo en parmi mon bann zabitan Petit Paris ziska Talbot.

An dizan sa Mr Speaker, mon pa pe dir ki tapaz lanmizik pa en problem. E mon pou profite pou lans en lapel avek sa bann ki pe kontinyelman deranz zot prosen avek lanmizik, pou silvouple arete.

E mon enplor Lotorite pou ki ler bann tel rapor i ganny fer, zot pran li o serye e fer sir ki sa ki pe fer tel pratik i ganny *deal* avek.

Mr Speaker dan mon demars pou sey trouv en solisyon pou sa sityasyon tapaz okazyonnen par sa bann transpor lo *highway*, mon'n ganny sans diskrit avek serten endividé ki direkteman enplike avek sa bann aktivite *racing* ki deroule lo sa parti semen.

Mon'n osi diskrit personnelman lo sa size avek Minis Fonseka. E mon'n ganny dir ki sa solisyon i pou

devret enn ki byen mezire e kalkile.

Vi ki annan sa group endividé ki pasyonnen par sa kalite aktivite oubyen spor parey zot dekrire li, menm si ou sey pran aksyon kont zot i pou difisil pou elimin sa pratik. Akoz zot pou tou senpleman swazir en lot landrwa pou zot fer sa. E Lapolis pou pe vwar li pe kontinyelman pe tay deryer sa group dimoun.

Solisyon alor se pou ki en diskisyon i ganny *entamer* avek sa group endividé, pou ki en lapros pli konpreansiv an ver sa problem i ganny fer.

Dan mon diskisyon avek serten sa bann dimoun ki pe angaz zot dan sa bann aktivite, e menm atraver let ki mon'n resevwar, in ganny fer resorti ki sa group dimoun ki pe pratik sa spor i enn ki tre byen organize e ki aktyelman pe fer demars pou anrezistre zot lasosyasyon.

Loter sa let in fer degre dan *Motosport Technology* kot Liniversite *Oxford* spesyalize dan regilasyon e *motosport safety*. Zot demann se ki zot tou senpleman ganny en landrwa kot enn ou de fwa par mwan, zot a kapab fer zot *race* tout an respektan bann mezir sekirite e lasante.

Mon'n ganny met okouran ki sa spor ti enn fwa legal Sesel dan bann lannen

'70 e ki ti ganny fer arete apre koudeta an '77.

Mon konsern lo nivo tapaz ki sa bann loto i fer mon'n ganny dir sa, e permet mwan Mr Speaker li en ekstre let ki mon'n resevwar ;

"In regards to noise pollution I will first like to say that is not necessarily the same group of people creating unnecessarily noise. Most of the time these individuals who have nothing to do with the sport.

Most aggressive events from my knowledge are short, so as to not draw any unwanted attention as this is illegal and the race is only 400 metres long.

You must understand that the noise from these vehicles is not the but rather product of what the owners are trying to achieve which is power.

Most of the owners of these vehicles, also do not use their cars for daily commutes. E sa i enportan Mr Speaker.

Dan demars pou trouv en solisyon pou mon bann zabitan mon pe donk lans en lapel avek Lotorite pou alors zwenn avek sa bann endividé pou sey propoz en solisyon.

Pwen enportan ki'n ganny fer sorti dan sa ki mon fek lir. Se ki sa bann transpor ki pe partisip dan sa bann *race* pa bann transpor ki pe sipoze

pe roule lo semen me ki ganny servi spesifikman pou sa aktivite.

Sa pti menn ki pe alors pe monte desann dan aswar lo *highway* e ki pe *disturb* mon distrik an antye, e sa enn ki pe akseler son loto 3er bomaten La Misère ki pe deranz Onorab Georges, ek Onorab Lemiel Anse Royale. I devret pe ganny *deal* avek,

Lotorite konsernen i devret pe eksplor tou opsyon pou fer sir ki sa bann tel transpor pa pe sirkile lo semen. Serten zofisyen Lapolis ki monn koz avek in sizere ki bann *camera* avek en *decibel metre* i ganny entrodwir. Sa i ava fer ki *License plate* sa bann transpor i ava ganny idantifye e aksyon avek sa ki responsab ava ganny pran.

Mr Speaker konman lavwa mon zabitan dan Lasanble, mon pou aport tou mon sipor pou sa Mosyon avek lespwar ki sa bann aktivite anti-sosyal ki pe afekte mon bann zabitan, i a enn fwa pou tou ganny *deal* avek e non pa vvar nou zis pe tourn an ron lannen ale lannen vini. Mersi Speaker.

MR SPEAKER

Mersi. Mon ava pran Onorab Michel Roucou.

HON MICHEL ROUCOU

Mersi Mr Speaker. Mersi. Bonzour tou zabitan Mont Fleuri, Mr Speaker mosyon anmenn par Onorab Georges i lo kote tapaz. Mon oule tous de pwen an term tapaz dan vwazinaz.

Bokou nou ozordi nou vvar nou pe esper en lozman avek Gouvernman akoz nou merite. E ki nou vvar poudir *Housing* atraver *PMC* ler en group dimoun pe ganny asiste ek en lakaz, *PMC* i anmenn souvandfwa pli gro batay lo kote *noise pollution*.

E nou vvar kot bokou zefor i ganny mete ki bann zabitan dan sa novo *housing estate* oubyen pe ganny *allocate* ek en lakaz i ganny dir e menm dan zot Lagreman i koz lo la.

E ki nou vvar Mr Speaker apre ki bann sa bann *tenants* i ganny asiste avek en lakaz zot deside pou zot kas sa Lagreman. Kot la nou vvar souvandfwa menm dimoun menm ki pe fer *disturbance* avek lanmizik dan bann flat.

E parey ou konnen dan bann *housing estate* bann lakaz souvandfwa i pros. Kot la nou vvar tou sord laz dimoun ki reste dan sa kominate, oubyen dimoun ki pe travay dan diferan seksyon.

Mr Speaker *PMC* li menm li in demande souvandfwa kot zot in menm fer bann vizit aswar ki zot ankor pe fer, kot

zot pe sey rod en fason pou *deal* ek sa problem tapaz.

E sanmenm sa souvandfwa zot vwar dan zot bann Lagreman, kot i ganny mete ki dir ki ou napa drwa menm pou sonny zannimo dan en *housing estate*.

Mon pe swete ki ek letan ki bokou *housing estate* pe vin bokou plis, kot *PMC* li menm li i ava kapab mete lo son bann *housing estate* en bord dan son larantre kot i ava edik bann dimoun ki pa reste dan bann *estate* ki mannyer pou konport zot lo en *housing estate*.

E sa i ava ede pou ed bann zabitan pou demen pou zot kapab *deal* ek sa sityasyon zot menm.

Mr Speaker semenn pase mon'n vwar kot mon'n bezwen raport kot kouvan anler Hermitage akoz sa bann lesor in donn en bout zot propriete pou fer en semen pou ed bann zabitan.

Me la nou vwar dan sa letan difisil kot i annan *COVID*, tou dimoun pe rod en pti landrwa pou zot kapab kasyet pou zot zwe lanmizik e menm servi lalkol.

E nou'n vwar poudir sa landrwa i ganny servi kot dimoun i vini i groupe, e zwe lanmizik for ki deranz sa bann zabitan dan sa kouvan. Kot la nou'n alert Lotorite pou zot fer plis patrol dan sa landrwa.

Dan mon vizit osi mon'n kapab koz avek en propriyeter en propriete ki in met dan mon latansyon poudir i regrete ki i donn son propriete pou ede kot semen i pas la, akoz i ganny zoure ler i sorti aswar pou li dir avek bann *owner* bann loto bes zot lanmizik. E sa i pa normal Mr Speaker.

Kot nou pe demande ki Lapolis i return sa seksyon dan son lafors ki *deal* avek *antisocial*. Kot nou pe demande ki annan plis vizit dan bann kominote, pou *deal* avek bann tel aksyon ki deranz kominote.

Mr Speaker, avan mon fini mon le zis dir avek bann zabitan poudir i annan ankor nou bann frer ek ser ki pe esper en lozman. E ler zot ganny asiste ek enn silvouple respekte zot Lagreman ki zot in sinyen. Mersi.

(APPLAUSE)

MR SPEAKER

Mersi Onorab. Avek sa nou ava pran en poz. E nou a repran travay 11er.

(BREAK)

MR SPEAKER

Onorab Pillay pare pou konmanse?

HON SEBASTIEN PILLAY

Mersi Mr Speaker. Mr Speaker avan mon konmanse, mon ti ava demann ou permisyon, mon ti le zis enform bann Manm FPAC ki nou pou zwenn demen, apre ki nou ti zwenn sa semenn *regarding* bann regilasyon ki'n ganny fer lo *Air Seychelles*, spesifikman bann deklarasyon in fer par Minis an *regardant* sa (\$142milyon) oubyen depans (R2.5bilyon) ki pa ganny *accounted for*.

FPAC nou pran sa tre serye e mon'n zwenn bann Manm e bann Manm in eksprim zot konsern osi e nou pou pran sa size. E demen mon ti a kontan ki bann Manm FPAC i fer zot lekor *available* 9er, pou nou konsider bann endividé e lezot klarifikasiyon oubyen lenformasyon, ki pou vin pou nou ekrir bann dimoun pou fer zot konnen ki zot bezwen vin devan FPAC, pou nou rod leklersisman lo sa size.

Avek sa Mr Speaker mon remersye ou pou donn mwan loportinite pou enform bann Manm FPAC e manm piblik an zeneral, ki FPAC pe al regard dan en fason serye dan sa size *Air Seychelles* sa R142milyon oubyen \$2.5 ki pa'n ganny *accounted for*. Mersi Mr Speaker.

Mr Speaker mon pran laparol lo sa Mosyon ki en Mosyon tre enteresan, e i en

Mosyon ki anmenn nou pou fer diskisyon lo en size ki si oule parfwa i vin dan en fason difisil pou nou koz lo la, akoz nou tou nou reste dan en kominote, e nou tou a en moman donneen nou'n rankontre bann sityasyon ki sa Mosyon pe fer referans avek.

E mon'n ekout avek atantivman avek bokou latansyon si ou le bann Manm ki'n koze oparavan. E bann konsern ki zot in eksprimen pou bann zot bann *constituents*; bann dimoun ki reste dan zot distrik.

E mon krwar sa i en keksoz tre enportan, akoz i pou annan toulstan de kote sa size. E an menm tan ki nou pe koz lo sa bann dimoun ki si oule koz en serten nou pou servi sa term nwizans pou lezot dimoun.

Me nou osi bezwen osi mazinen ki lot kote osi pou annan dimoun ki pou annan en lot lopinyon diferan.

Alors difikilte i vin kote ou pozisyonn ou vizavi en tel Mosyon? Ki mannyer ou kapab regard sa size lo kote bann dimoun ki pou vin dir ek ou poudir "be gete mwan mon napa landrwa pou defoule. Nou travay depi Lendi ziska Vandredi, e parfwa dan weekend."

Apre bann presyon travay li ek son bann koleg

oubyen lezot dimoun i le rod en moman pou li al detann, al defoul son lekor.

Lo en lot kote, osi annan sa konsern ki, "me mwan mon reste dan en landrwa kot dimoun i souvandfwa vin detann, e ler zot vin detann zot koz en nwizans par lefe ki zot fer tapaz, zot koz bann *disturbance* ki afekte e ki anpes mon zouir mon landrwa parey mon ti ava devret."

So vwala en pti pe *l'enjeu* ki nou annan ler nou regard sa Mosyon ki devan nou. Me i enportan ki nou osi konman politisyen, nou fer fas avek en lot realite.

E sa realite i ki parfwa konman politisyen, bokou nou osi nou'n ankouraz sa bann kalite aktivite. Fodre nou admet sa. Nou'n ankouraz sa bann kalite aktivite akoz par egzanp parfwa lo bann *housing estate* a nenport ki ler, ou pou vvar i annan dimoun ki vini i groupe e zot konmans zwe lanmizik e fer tapaz.

E pou nou vin dan Lasanble koz lo lezot dimoun ki fer sa, nou bezwen osi aksepte ki parfwa i annan nou menm politisyen ki ede pou poz sa bann *disturbance*.

So sa balans ki nou pe rode, se ki mannyer ki tou Seselwa i kapab zouir en trankilite ? I kapab osi defoul son lekor, san ki enn oubyen en lot i pa depas sa baryer kot

ou drwa i fini pou mon i konmanse? Oubyen kot mon drwa i fini pou ou rekomanse?

E sa pou mwan i en keksoz ki enportan ki nou fer en deba konsyansye lo la. San ki nou met en kote poudir be ou ki responsab, e san ki nou dir anfen kont tou Seselwa i parey e tou Seselwa i pas partou ,pou nou nwir oubyen *disturb* trankilite lezot.

Mon pou servi mon leksperyans personnel pou kapab ilistre serten bann pwen ki mon pe fer.

Mon'n fortinen, an gran disan ki mon'n reste pa lwen avek en lans. E pandan letan ki mon'n reste la, nou'n pas atraver plizyer letap kot nou vvar o konmansman ti napa bokou dimoun ki ti frekant sa landrwa, me avek letan bokou plis dimoun i konmans frekant sa landrwa.

E nou'n rankontre plizyer sityasyon par egzanp kot dimoun ozordi dan plas fer en Premyer Kominyon kot lakaz, la nou pe koz avan *COVID* kot en dimoun ti pou fer en lakonfirmasyon en parti en *beach party*, zot in konmans fer li dan sa landrwa.

E ler zot vin fer li dan sa landrwa, zot vin avek zot bann *speaker*, zot bann lekipman pou zot zwe lanmizik pou zot kapab *enjoy* zot lekor parey zot dir, e zot zwe sa lanmizik. E

sa lanmizik prezant li i poz en nwizans.

I poz en nwizans, akoz i annan dimoun ki reste dan sa kominate otour sa landrwa. E mon krwar sa ki mon pe dir, pou annan bokou lezot dimoun ki pou idantifye avek sa ki zot osi zot reste pa lwen avek lans, bann landrwa piblik, kot dimoun in vin fer sa bann kalite aktivite.

Me mon osi bezwen realiz lefe mwan menm mon personnelman ki mon annan vwazen ki *own* zot propriete obor lanmer. E ki zot osi zot pou sey zouir zot propriete par kree bann loportinite biznes ki zot kapab kree.

E zisteman enn bann keksoz la mon pe koz lo en propriete prive. Be mon pou depouy sa propriete domenn piblik, ki zot pou fer en servis kot dimoun i kapab vini dan sa landrwa *enjoy* zot landrwa. E fer bann aktivite.

Lekel ki byen lekel ki mal la ki pou reste lo en fe. Kwa ki ou kapab fer san ki ou fer en nwizans pou lezot? E sa i retourn lo sa kestyon balans ki mon ti pe koz lo la.

Akoz mwan si i annan en keksoz ki mwan mon deplore ki mon'n vvar dan sa landrwa, se lefe ki ou vvar plizyer dimoun ki vini ki fer son aktivite, me apre i kit tou sa ki'n servi deryer.

E ler in kit tou sa ki in servi deryer, se bann dimoun ki reste dan sa landrwa, oubyen ki annan bann propriete pre avek sa landrwa, ki bezwen prezant fer netwayaz pou sa bann lezot dimoun ki'n vini.

E parkont i annan lezot wi ki anmas tou zot keksoz zot al avek zot kit landrwa prop. Me i annan nou Seselwa konmsi koze nou Kreol ki fer li koumsa.

So ou pou vvar lasyet papye, ou pou vvar bann bout *foil*, ou pou vvar plizyer keksoz ki reste lanmenm. Parfwa ou pou vvar plastik e san realize sa bann plastik ler mare i monte i pran sa bann plastik i anmenn dan delo sale. Sa bann plastik i poz en danze pou bann lanvironnman maren.

So sa i annan pou fer tout avek en stil konportman. I annan sa lot laspe Mr Speaker transpor. Kot monn tan plizyer dimoun koz lo bann *decibel metre*, pou idantifye ki kalite ki nivo tapaz bann egzos, bann transpor i kapab *release*.

E in annan bokou konsern, bokou kestyon ki'n leve otour sa, akoz i annan dimoun ki aste en transpor ki naturelman vin avek sa kalite teknolozi, si oule zot apel en, me i annan lezot dimoun ki mete lo zot transpor.

E ler i al kot *vehicle testing station*, menm sa enn ki'n aste son transpor ki'n fer vini son transpor avek sa teknolozi, i ganny problem pou li ganny en ganny son tes akoz swadizan i pa pe *meet requirements*.

Me sa dimoun i dir ou lezot dimoun in mete apre ki in ganny tes e zot pase lo semen e personn pa aret zot.

So ou vwar ki i annan en deba pli aprofondi oubyen en konsiderasyon pli aprofondi ki nou bezwen anmennen pou ki nou kapab vreman met lanfaz lo kwa ki nou le vwar egzakteman?

E ler mon lo sa size transpor par egzant mon'n tann bann dimoun koz lo bann transpor ki fer tapaz, dan Glacis pa lwen avek kot mon reste mon krwar Onorab Esparon in osi eksperyans sa.

Mon annan en dimoun en sak fwa bann moter i pase mon pa konnen si sa enn i fer ekspre, me ler i pase sa tapaz ki son veikil i fer, i koz tou bann lisyen dan sa rezyon pou konmans kriye e ile.

Me sa ki enteresan i se ki sa dimoun i pas en fwa, mon krwar i pe al son destinasyon, me i retournen ankor enn fwa e refer ankor enn fwa, ou a dir i fer detrwa ale/vini mon krwar i pe rod sa reaksyon.

E la nou riye, me mon krwar bokou dimoun in vwar,

sa, e lamazorite landrwa prezan ou tann sa bann zannimo i konmans fer tapaz. E *obviously* prezan vwazen i konplent, akoz i dir ou poudir lisyen sa vwazen pe annwiy son trankilite.

So ankor enn fwa i retourne lo konportman. Kwa ki mwan mon fer ki koz en reaksyon ki sa reaksyon apre i anmenn en aksyon ki anmenn en problem dan kominate

Ou annan en lot sityasyon e sanmenm sa ki mon'n dir nou bezwen pran sa size lo diferan ou annan en lot sityasyon par egzant kot mwan mon konnen i annan dimoun ki sonny zot lisyen, pou proteksyon zot lakour, byensir.

E ki ou annan ou en lot group dimoun ki sak fwa ler sa dimoun in plant swa en pye bannann, swa detrwa pye zironmon, swa okenn plant kelkonk li vin rekolte.

E zot pas ase souvan sa group dimoun. Ennler zot pas ase souvan kot sa dimoun *obviously* son bann gardyen ki'n met la, i reakte i zape i fer tapaz e son vwazen i pou dir ek zot poudir be ou bann zannimo pe *disturb*.

So i annan parey mon'n dir de kote sa size, ki nou bezwen regarde konsidere. E ki bezwen anmenn nou fondamantalman lo kwa ki

nou pe rode? Kwa ki nou oule sa Mosyon i *achieve*?

Eski nou le servi sa Mosyon konman en loportinite pou nou koz lo konportman ki nou tou nou annan, eski nou le servi sa Mosyon pou koz lo ou konportman konman sa endividé ki pou vin zouir *enjoy* sa landrwa an konsidérasyon, an konsidérasyon trankilite e drwa sa lot dimoun ki li i reste dan sa landrwa?

Eski nou pou anmenn en deba lo sa dimoun ki le sa trankilite osi konsidere ki pou annan lezot aktivite ki lezot dimoun i bezwen fer, ki nou tou nou bezwen kou egziste ?

So sa kou egzistans ki nou pe rode, vi ki nou reste dan en pti pei ek bann lespas ki limite, lespas publik i limite e otour bann lespas publik kot i annan plizyer dimoun ki frekante, ki mannyer nou kapab rod sa balans?

Ou konnen Mr Speaker mon servi sa pou eksplike ki i annan en analozi par egzant ki en dimoun in toultan dir mon, li i en fermye, e i rapel ler detrwa dimoun i vin fer lakaz obor son laferm e ki li konman en fermye son aktivite ki' toultan fer se ki i *spray* son bann plant oubyen i servi son bann *fertilisers*.

Me la sa bann dimoun i vin reste obor li i pe ganny difikilte, akoz bann dimoun i met li Ankour akoz sa.

So eski sa lekspektasyon ki mwan mon abitye fer en aktivite dan en fason ki ler i annan lezot dimoun eski mwan mon drwa i *supersede* sa lezot sa bann dimoun?

E i bann kestyon fondamantal ki nou bezwen reponn e Onorab Georges konman en Avoka mon asire in rankontre plizyer sityasyon bann *case* kot dimoun in met sa bann konsern devan li.

E se sa ki fer li difisil pou nou konman Lezislater adres sa size. Lekel kote ki nou pran? Lekel kote ki nou tom lo la e dir sa enn i annan rezon a enn i annan tor?

Me i annan keksoz ki nou kapab vwar e ki nou kapab dir i fer sans. Par egzant ou pa kapab 1er bomaten apre ki ou'n deside bwar ou 2 gines, ou ouver ou lanmizik *full blast* e *disturb* tou dimoun dan ou kanton. Sa i pa fer sans.

I pa fer sans, akoz si avan 1er bomaten ou pa'n ganny okenn lentere pou ou zwe sa lanmizik, me apre 1er bomaten ou'n bwar ou 2 gines ou deside pou fer li la mon krwar ou annan en problem.

Ou pa kapab deside ki tou le 6er bomaten, Dimans ou pou avek ou masin koup zerb obor lakaz ou vwazen, son loto in park lanmenm oubyen son transpor son fanmir ou byen en dimoun in park lanmenm, akoz ou bezwen sey demann

zot *at least* omwen pou tire akoz en *windscreen* pou en transpor i kout konbyen ? *Around* R21mil pou serten transpor R14mil pou lezot. E dan sa letan difisil ki nou ladan la avek *COVID*, personn pa oule al fer en gro depans koumsa.

So i annan serten konportman ki nou dir nou bezwen kapab konman imen antre imen, nou bezwen kapab konpran. Sa mon krwar i fer sans.

E mon krwar se sa ki nou bezwen konman Manm Lasanble ozordi regarde otour sa Mosyon ki mannyer nou rod sa balans e nou trouv sa balans. E ki mannyer konman Manm Lasanble nou parfwa pa sey fer sa problem vin pli grav.

Kot nou konnen i annan en flat dan nou distrik kot nou konnen nou bann aktivis i kontan vini fer tapaz par egzanp, i annan en madanm i dir mon zot kontan vin zwe "Pillo li" zis obor son laport. Annou *advise* nou bann siporter pou arete.

Mon'n servi sa legzanp i pa vedir zis siporter LDSki zwe lanmizik pa sa. Me sa madanm li in dir mwan spesifikman sa enn. So pa pran sa mal.

So mon krwar nou bezwen onnet avek nou lekor ki nou bezwen sey rod en

fason pou nou *deal* ek sa sityasyon.

E mwan mon en keksoz k i mon sagrinen mon e parfwa kot mon' vwar bann dimoun par egzanp mon vwar i annan en madanm ki reste *around* zis ant balizaz Anse Etoile avek Glacis *around* sa *area*, ki bezwen tir portre en lans kot dimoun in fer en piknik e tou zot bann keksoz in reste lanmenm.

Kwa ki pas dan ou lespri ki ou pa kapab anmase? Akoz i pou ou sa, i ou landrwa.

Akoz demen ou pou bezwen revin la ankor, e se sa ki nou Seselwa nou bezwen realize. Annou tret nou bann lespas ki nou gannyen pou nou *enjoy*, dan en fason pou ki demen nou kapab vini vin *enjoy* li.

E pou mwan mon krwar se sa ki si i annan en lesion ki nou'n aprann avek *COVID*, se nou bezwen rod en fason pou kou egziste avek bann Lalwa ki la. Pou ki nou kapab kontinyen zouir nou lavi dan en serten fason.

E so Mr Speaker mon krwar ki mesaz ki mwan mon annan avek sa Mosyon se ki pou mon i en Mosyon tre konpleks. I paret fasil pou koz lo la i paret fasil pou ou tonm lo en kote tonm lo en konklizyon me i pa sitan fasil.

Akoz parey Onorab en Onorab in koz lo la, se ou

annan par egzant bann zenn ki pe devlop en serten tandans lo serten aktivite.

Eski petet dan plas lezot al fer sa bann aktivite lo en semen piblik kot apre i annan bann aksidan ki arive, kot zot vol moman pou zot kapab fer li.

Ler mon dir vol moman *I mean* zot sey rod en pti letan en landrwa, en lespas, me apre ou vwar i filmen ou vwar en gro aksidan ;- eski nou pou kapab anpes zenn *be zenn* dan en lanvironnman dan en evolisyon? Pou difisil.

Me lo lot kote ou pou ganny ou en dimoun pli tradisyonne,l i pou dir ou be kote ou pou ganny landrwa pou donn zot en *speedway or something like that*.

Mon krwar nou pou bezwen sey rod bann solisyon pou ki tou sa bann group i kapab kou egziste. E bann group pou bezwen konpran ki pa zot tou ki pou ganny sa ki zot anvi gannyen. Se sa ki nou bezwen konpran.

E nou konman Lezislater ler nou pe get sa Mosyon, nou pa zis get sa Mosyon avek lo en pwennvi emosyonnel.

Me annou get li *from* en pwennvi nou responsabilite konman Lezislater. Ki mannyer nou kapab sey anmenn sa kou eggistans an tou bann endividé ek tou bann group san ki enn i nwir lot.

Akoz se nou *at the end of the day* ki pou *end up* pas sa bann Lalwa. E se nou ki pou fer demann avek Gouvernman pou sa bann Lalwa e se nou ki nou bezwen pran konsiderasyon tou nou bann constituents.

So pou mwan se sa ki mon annan konman kontribisyon atraver sa Mosyon. Mon bezwen dir ki depi bomaten mon'n mon pe mon bezwen servi sa mo *enjoy*, mon'n *enjoy* en kantite bann deba ki mon krwar i kler ki sak dimoun i annan en pwennvi personnelman.

Me parfwa nou pe servi nou leksperyans personnel parey mwan menm mon'n fer pou koz lo sa Mosyon.

Me sa ki enportan i se ki apre ki nou'n met sa bann leksperyans personnel, apar e sa bann konsiderasyon emosyonnel apar, se ki vreman nou oule *achieve* ek sa Mosyon?

Ki nou plan? Ki nou oule anmennen? Eski nou pou konsider n *Private Members Bill* otour sa Mosyon? Akoz mon konnen Gouvernman osi i konplekse i pou vwar li an difikilte pou anmenn Lalwa lo sa Mosyon.

E lefe ki en Mosyon i pa *legally binding* lo en Gouvernman, nenport ki Gouvernman so nou, nou bezwen fer sir poudir konman

Lasanble lefe ki nou pe koz lo la i pa zis en legzersis dan koz lo la.

Me osi vin en legzersis dan rod en solisyon oubyen konmans rod en solisyon, pou en sityasyon, ki ozordi reelman bokou Seselwa pe eksprim zot lekor lo la.

So Mr Speaker avek sa mon pou termin mon lentervansyon la. E mon'n apresye loportinite pou kapab kontribye lo sa Mosyon. E mon pou kontinyen swiv avek bokou latansyon lezot entervenan e deba ki tournen otour sa Mosyon. Mersi Mr Speaker.

MR SPEAKER

Mersi Onorab. Mon ava apel Onorab Naidu.

HON SATHYA NAIDU

Bonzour Mr Speaker. Bonzour tou koleg Onorab e tou dimoun ki a lekout e ki pe swiv sa sesyon. Polisyon tapaz in persiste pou reste en pwen konsern, e ozordi in vin en problem Nasyonal.

Ou ti pou krwar ki tou dimoun i konpran ki savedir tapaz e ki nivo an term tapaz i kapab ganny dekrir konmkwa i akseptab ouswa en nivo ki toleran, me baze lo bann lentervansyon avan pou mon i kler ki en bon poursantaz nou pep pa pe sezi sa.

Annefe rapor ki WHO ti pibliye an 2018 ki aplik pou *L'Europe* e menm *L'Afrique*, infer resorti ki nivo tapaz ki sot 80 a 85 *decibels* pou en dirasyon ase regilye, i kapab annan en lenpak advers lo lasante sa resipyan. Resipyan i kapab direkteman swa endirekteman.

Direkteman i pou afekte ou abilite pou tann byen avek en nivo klarite. Annefe ler en dimoun i pran sa parkour pou vin soud i pa pou neseserman santi sa douler, alors se pourtan pou sa rezon zot tant pou azir dan en fason inyoran o firamezir ki zot fer monte zot *volume*.

San realize endirekteman i kapab afekte lasante lezot dimoun otour zot. Kot i pou annan stres. Kot sa dimoun ki pe tann sa menm son toulezour, i pou parey i pe ganny tortire, i pa oblige ekout son sanson, me i ganny forse pou ekoute.

E i annan lezot laspe lo kote lasante ki antre ladan. E mon santi ki lo kote bann *elderly* ki reste dan bann lakaz zot napa sa mwayen pou deplase zot ganny afekte en kantite. E nanryen in ganny fer ziska preznan. I pa fer premye fwa ki nou pe adres tapaz.

Annefe trwazyenm Lasanble Nasyonal Cohort Onorab Ramkalawan konman

dirizan Lopozisyon ti'n poz en kestyon avek Minis pou lanvironnman sa letan. E i ti'n fer resorti poudir Minis ti'n dir ki i annan *noise emission standards*, ki annan bann regilasyon dan Kod Penal ki adres sa size.

E sa letan i ti'n fer resorti, ki laplipar bann problemm otour tapaz i sorti kot bann *night clubs* e i afekte bann landrwa rezidansyel.

Me 17an pli tar kot nou'n vwar en mankman an term *enforcement*, sa problemm in sap an deor nou kontrol. Mon krwar pa si piblik an zeneral i konnen ki i annan *noise emission standards*.

E annefe dan programm SBC Dyalog an direk an 2019 i ti'n ganny fer resorti ki nou annan 7 *noise metres*, e dan sa letap dan sa letan kot nou'n arive kot in annan en *technological boom* pou nou annan zis 7 *noise metres* mon krwar pa i ase. E an menm tan sa zofisyel Lapolis ki ti pe partisip dan sa diskisyon in fer resorti ki i pa okouran lo bann Lalwa ki an plas.

Annefe an 2018 (*CEPS*) avek *Sustainability for Seychelles*, zot ti soumet en demann avek ansyen Prezidan Msye Faure. E atraver (*ETF Environmental Trust Fund* zot in prodwir en rapor en rapor byen detaye me 2an in fini pase nanryen ki'n ganny dir

dan sa rapor in ganny met an aplikasyon.

Mon swe se ki nou *Cabinet* i pran sa rapor an konsiderasyon e zot fer tou sa ki in ganny dir pou fer ladan, akoz tou sa ki bann lezot Onorab in dir i dan sa rapor osi. Alors nou bezwen pran konsiderasyon avek sa.

Lo kote tapaz in ganny fer resorti ki i kapab sorti dan diferan landrwa, lo en lans, dan en lakaz, atraver en transpor, e plizyer lezot. E i annan diferan Lalwa pou sa sours sa tapaz.

Ou annan *Beach Control Act*, ou annan *Environment Protection Act Noisy Missions* pou adres nwizans ou annan bann provizyon anba Kod Penal. E parey Onorab Georges in fer resorti, en konsep nouveau in ganny entrodwir dan nou Kod Sivil, tousala i an plas me bann gard zot pa okouran lo bann Lalwa ki la.

Alors i enportan pou etablir en *taskforce*, met en trantenn zot edik zot lo sa bann Lalwa ki an plas pou asire ki i annan liniformite vizavi lapros ki zot, zot pou adopte konman Lafors Lapolis.

E annefe ler *Compol* ti'n vini nou tou nou ti'n met nou konsern. E ozordi nou pe soumet plizyer lezot konsern ankor. I enportan ki bann zofisyel Lapolis zot apresye ki

ler en dimoun i vin en konplent ki devret annan konfidansyalite. Ou pa pou kapab al kot sa dimoun ki pe kree sa dezord poudir entel in vin fer en konplent lo mwan.

E apre i annan plizyer lezot problemm ki swiv, kot Lapolis li menm i pe vin en problemm dan li menm pou kapab adres sa size.

E ler ou pe regard konpleksite sa *issue*, i kler ki nou bezwen pran kont, avek bann endividé ki annan en pasyon pou swa ekout lanmizik, kot zot *lifestyle* in sanz en pe, ouswa lo kote transpor li menm.

Mon rapel ki Prezidan dan en programm *News Extra* ti'n fer resorti ki pou bann zenn ki enterese vin devan form en lasosyasyon, e nou va trouv en solisyon parey Onorab Labonte in fer resorti in annan en group ki'n vin devan Onorab Monthy osi in fer resorti ki i annan en group.

So i enportan ki sa bann zenn ki enterese i vin devan, e zot form parti sa solisyon pou sey adres sa problemm. Sa i tonm lo en laspe Nasional.

Dan mon distrik dan St Louis mon kapab dir ki Lodge Street, Harrison Street i annan en pake dezord ki' arive tou resaman, e mwan mon pe dir tou resaman akoz mon'n ganny sans pou reste laba e

mon'n vwar soufrans mon bann zabitan.

E apre ki desizyon ti'n ganny pran konmkwa pou napa okenn lavan lalkol dan Market Street, nou'n remarke ki en boutikye in ouver en laboutik Lodge Street pou vann lalkol avan ler. E sa i ankouraz bann group.

I am sorry mon pa pe stigmatiz zot me se zot ki lo sibstans lo *methadone*, napa nanryen ki pe ganny fer pou ankadre zot ozordi. E alors *they loiter around*. E zot bwar, zot konsonm lalkol, zot konsonm zot drog, zot fer tou sord kalite dezord e mon'n fer resorti avek bann zofisyé Lapolis pou azir lo la. E nanryen in ganny fer.

E i enportan ki Minis pou Zafer Entern osi i pran ka avek sa. E ler nou vwar en marsan pe vann lalkol lavan ler *suspend these license*. In plis ki ler pou adres sa size en fwa pou tou. E mon swe se ki tou sa bann pwen ki mon'n fer resorti i ganny pran an kont e i ganny adrese. Mersi.

MR SPEAKER

Mersi Onorab Naidu. Onorab Vidot.

HON AUDREY VIDOT

Mersi Mr Speaker. Bonzour tou mon koleg Onorab, zabitan Roche Caiman e tou dimoun ki a lekout.

Mr Speaker mon pou konmans mon lenthervansyon lo sa Mosyon avek en mesaz par ansyen Minis Pamela Charlette pandan Lazournen Labita Oktob lannen 2018. E mon *quote* " Konportman enportan pou en labita tre an bonn sante i konmans avek responsabilite ek latitud sak endividé an ver son lakour, ek son lanvironnman." Mon *unquote*.

Mr Speaker Leta i rekonnet drwa tou dimoun. Pou viv e zouir en lanvironnman prop sen e ekolozikman balanse e avek bi asir realizasyon efektiv sa drwa.

Konstitisyon i osi fer resorti ki Leta i antreprann pou pran mezir promouwwar proteksyon, prezervasyon e amelyorasyon lanvironnman, e asir en developman sosyoekonomik soustabilite nou pei.

Alors i drwa tou sitwayen Sesel pou soutenir e defann sa Konstitisyon ek Lalwa. I responsabilite tou dimoun pou kontribye an ver byennet nou kominote, e fer tou posib travay ver lakonplisman bann laspirasyon ki annan dan preanbil nou Konstitisyon.

Mr Speaker malgre ansyen Gouvernman in konstri plizyer *housing estate*, met dispozisyon later pou Seselwa konstri son prop

lozman e bann propriete prive ki'n konstrir zot letablisman dan bann landrwa rezidansyel, i responsabilite tou sitwayen avek langazman e siport novo Gouvernman, pou montre kontinite dan kouraz tou dimoun pran zot responsabilite. E respekte pa zis otour zot lakour me osi byen lezot dimoun dan lanvironnman kot zot viv ladan.

Se sa ki pou asir respe, lapropte e bon lasante pou nou kominote.

Mr Speaker bann vwazinaz i konmans dan lakour e dan lafanmir si i annan bon relasyon ant lezot manm dan fanmir, alors sa i pou egalman bon relasyon avek vwazen.

Si tou vwazen i tret kanmarad avek respe e ofer letan kan i dan bezwen pa mazin selman zot prop lekor akoz dan bann moman difisil e en bon vazen i pou toultan en dimoun ki ou kapab kont lo la pou ed kanmarad.

Ozordi i annan bokou fanmir ki pe viv avek bann vye paran, dan nou bann kominote, pou rezon lasante ouswa akoz zot laz retret sa bann vye paran i pas laplipar zot letan kot lakour pou repoze.

I tris poudir ki mon distrik Roche Caiman pa ganny eparnye avek sa

problem tapaz, ki deranz trankilite vwazinaz. A plizyer repriz mon lofis e Ladministrasyon Distrik in ganny bokou konplent e rapor dan logmantasyon lo nivo tapaz, lanmizik for, kriye, zannimo ouswa transpor lizour konman aswar dan distrik.

Zabitan Roche Caiman in ganny ase avek sa tapaz, e zot in fatige fer rapor avek bann diferan Lotorite. I annan menm i dir mwan ki zot in fatige kont biro pou al fer rapor akoz nanryen pa ganny fer e sa bann ki'n komet sa bann tel dezord, ki parfwa menm bann endividé ki dan lafors pa zanmen ganny reprimen, selman zot ganny dir ki i annan Lalwa ki egziste.

Mr Speaker Departman Lapolis, *Property Management Company (PMC)*, Departman Lanvironnman e Lotorite Lasante Piblik, i sa 4 lazans kle ki Lotorite distrik i travay tre pros avek, zisteman pou rod rekour pou enplimant bann Lalwa dan zot manda, pou asire ki tou dimoun i viv e zouir en lanvironnman prop sen ekolozikman balanse.

Se zot ki'n ganny bann diferan manda pou pran mezir promouvwar proteksyon e prezervasyon e enplimant Lalwa pou asir lape ek sekirite dan nou bann kominote.

Dan Bidze Gouvernman tou le lannen Lasanble i vot lo saler bann *enforcement officers*, e resours pou enplimant bann programm zisteman pou adres sa bann konsern ki nou bann Manm Lasanble i fer resorti, e ki ozordi dan sa Mosyon pe ganny fer resorti ankor.

Me mon partaz konsern mon bann zabitan dan mon distrik, ki prezans sa bann zofisyé e lenplimantasyon sa bann programm, pa pe adres sa bann nivo konsern e konplent ki pe ganny raporte kot nou bann dirizan distrik.

Mr Speaker i pli tris pou fer resorti, se ler bann manm fanmir i soutir zot bann pros, ki deranz trankilite zot vwazen e kot dimoun ki sorti dan bann lezot balizaz avek Roche Caiman, pou vin zet bann bin site met dan milye semen, met dife ladan, apre zot zis *cross border* lo pti pon pou travers pou al Mamelles.

Stasyon Lapolis Mont Fleuri i kapab konfirmen kantite rapor ki zot in gannyen lo sa bann loto, sa bann moter avek *scooter* ki antre sorti *full vites* dan vilaz Roche Caiman, san pran kot traka ek lafatig sa bann prop dimoun dan nou kominote ki pe rod sa pti moman trankilite.

Mr Speaker sak endividé i bezwen mazinen laz ki nou bann dimoun aze in arive, i fer

zot vin pli vilnerab e laplipar ditan pa kapab defann zot lopinyon ler zot koze.

E dan kominote nou bezwen pran kont ki pa tou dimoun ki annan menm ler travay. I annan ki travay aswar, i annan dimoun ki annan son problemm lasante. E menm bann ki i annan zot zanfan avek problemm *autism*. E zot bezwen repoze dan lazournen zot bezwen sa trankilite.

Ankor nou bezwen konsyantiz lezot manm bann fanmir, pou ki zot pa zwe lanmizik tro for pou fer bann tapaz eksesiv pou fatig sa bann dimoun pandan lazournen.

I bezwen annan en sel landrwa kot piblik i kapab ale fer zot konplent e vvar aksyon ganny pran, avek bann ki deranz trankilite son kanmarad.

Nou bezwen annan plis ledikasyon, pou ankouraz sitwayen pou zwenn ansanm pou konteste kont bann diferan lobstak negativ, e anmenn bann bon valer e fason viv dan nou vwazinaz.

Nouvo ladministrasyon in koz fortman lo reform e nouvo plan pou elev bann bon valer e fason viv dan nou bann fanmir Seselwa.

Nou swete ki zot bann Dirizan pe swiv byen nou bann pwen konsern ki pe ganny fer

resorti dan sa Mosyon ozordi e ki zot bann reform, e zot bann nouvo plan i kapab adres vreman sa ki pe pase lo teren, e non pa zis dir nou bann zoli parol ki pa reflekte realite ozordi.

Mr Speaker menm si responsabilite sak endividé, pou met zefor kolektiv pou elimin okenn aktivite ilegal, polisyon loder e tapaz ki deranz vwazinaz, Gouvernman i annan sa lobligasyon pou asire ki tou Lalwa ki an plas i ganny aplike pou ki lafors lord ek lape i rennyen dan nou bann distrik. E ki nou bann kominote i kapab viv byen.

Nou vvar kot (PMC) pe seye pou sensibiliz son bann lokater e rezidan dan bann landrwa rezidansyel pou respekte bann Lagreman. Mon profite pou dir mersi.

E felisit ansyen CEO PMC Mrs Evelina Antat, ki'n fer bokou avek son lekip pou reponn bann konsern nou bann distrik, espesyalman nou Roche Caiman, a en tre profesyonnel. E nou swete ki nouvo *management* PMC i fer bokou plis ankor pou adres bann konsern e bezwen nou distrik.

Me toudmenm (PMC) li tousel pa ase pou konbat sa problemm tapaz. Zabitan Roche Caiman i senpleman anvi vvar lafors pe fer patrol, e larestasyon bann ki ankor pe

groupe tar dan lannwit pe bwar fimen e vann zot bann drog, menm dan landrwa piblik tel parey ;- obor semen obor laboutik, dan *parking housing estate* e *playground* pe zwe lanmizik for dan transpor ek zot pti *speaker* lanmizik afekte trankilite lezot e mank respe pou bann fasilité piblik.

Mr Speaker mon pou termin mon lentervansyon, par fer resorti ki loter Mosyon konman Dirizan Zafer Gouvernman dan Lasanble i annan en responsabilite enportan, pou asire ki son ladministrasyon ki pe *run border* i vin pli efektiv e efikas, lo lenplimantasyon sa bann Lalwa ki sak sa bann Lotorite i annan pou asir lape trankilite dan nou bann kominote.

E mon pou zwenn li pou siport son Mosyon pou montre sipor mon zabitan Roche Caiman, ki ganny afekte avek sa bann problem tapaz dan bann distrik lizour konman aswar. Mersi Mr Speaker.

MR SPEAKER

Mersi Onorab. Onorab Esparon.

HON REGINA ESPARON

Mersi Mr Speaker. Bonzour tou dimoun a lekout. Mr Speaker les mwan aport mon sipor pou sa Mosyon ki devan nou lo tapaz dan vwazinaz. Mon pe pran laparol lo lapar

Onorab Deshiela Bastienne ki pa kapab avek nou ozordi e ki MNA Perseverance en distrik ki fer fas ek bokou problem tapaz.

E mon'n aksepte pou met son bann pen devan. Mr Speaker bokou nou k0man nou tann tapaz dan vwazinaz nou pou dir lala pe al anpes nou zwen nou lanmizik, fer nou tou pti parti ouswa detann an fanmir. Mr Speaker dapre sa ki mon konpran napa en Lalwa ki anpes dimoun zwe lanmizik.

Nou tou nou a dakor ki lanmizik i annan, i anmenn en form lazwa e egey en popilasyon e osi fer gou dan serten sirkonstans dan labi imen. I osi pas en kantite mesaz. Nou osi bezwen pran kont ki i annan nou frer ek ser Sesselwa ki ganny zot dipen e arive met manze lo latab zot fanmir atraver lanmizik kot sa i zot travay e osi zot pasyon.

Mr Speaker ozordi i osi vre ki tapaz dan vwazinaz in vin en gro konsern, akoz i annan serten dimoun ki tapaz in vin par zot lavi toulezour.

Parey nou'n toultan pe fer rezon lo ki nou pou kwi ozordi, i paret i annan dimoun ki rode ki kalite tapaz zot pou fer ozordi, ki mannyer zot pou atake, e ki mannyer zot pou reakte si okenn vwazen i konplent.

Mr Speaker parfwa ler ou telefonn i sonnen Vandredi 9er diswar Onorab Bastienne i dir, ou'n fini konnen ki ou pe al tande. Me ozordi pli ale ou ganny rapor nenport zour e nenport ler, akoz bokou dimoun lanmizman nepli annan en zour spesifik.

Mr Speaker parey i annan dimoun i kontan dir, pou mwan Nwel ek Lannen i toulezour. Toulezour mon ganny en laz. Lanmor i voler nou bezwen anmize. Ouswa i menm dir ou mon pa bezwen esper en lafet pou mwan fete. Tousala se bann leskiz letan zot anvi fer tapaz ek zot lanmizik dan vwazinaz.

I annan ki fer paryaz poli gro *speaker*, met anba lavarang e zwe sanson kontrer pou son vwazen ki i pa tro lo bon term avek. Pou li sa i normal, me pour son vwazen a kote li i ne problem e en soufrans.

Sirtou dan sirkonstans kot sa dimoun in travay en zournen e letan i ariv kot lakour pou li ganny en sans repoze, son vwazen i deside zwe son lanmizik *full blast* parey nou dir an kreol kot lanmwatye distrik i tande ziska tar aswar.

Oubyen kot sa enn ki'n travay aswar kan i pe sey repoze tapaz i anpes li, sa enn ki annan pti zanfan ki koman i met sa pti baba ater, pov piti

i leve, akoz tapaz lanmizik a kote i tro for pou son pti zorey.

I annan ki pa oze koze, me i manz anndan malgre zot soufer. I annan ki kit lakaz i al rod trankilite aryer. Eski tousala i normal?

Mr Speaker kestyion ki ou demann ou lekor parfwa, eski li menm li ki pe zwe i ganny en konpran ki a pe zwe? Parfwa zis lanmizik, san konpran parol dan sanson ki fer tapaz. Eski i a pe vreman *enjoy* sa lanmizik? Ouswa i a pe zis zwe lanmizik demonstre pou lezot dimoun tande.

Mr Speaker dan Sesel ozordi la mazorite dimoun i annan en lanmizik, me nou pa pe dir zot pa aste en lanmizik ouswa pa zwe lanmizik ditou, akoz nou tou nou konnen ki lanmizik i ganny fer pou zwe, pou anmenn en zwa de viv e egey nou.

I annan ki fer dimoun *relax* en pi nostalzi, en pti enstrimantal. I zot drwa pou zot annan e osi zwe zot lanmizik. Me nou pou bezwen aksepte ki sirtou letan ou pe reste dan en vilaz, la mon pe refer ek Perseverance Onorab Bastienne i dir, kot flat i enn lo lot, en senp pti tapaz i *disturb* dan son prop fason, Onorab Bastienne i dir.

Mr Speaker ankor mon fer tre kler ki tou dimoun i annan drwa annan zot lanmizik, zot groser lanmizik

me letan ou zwe ou bezwen azir konsyansye, e mazin en pe sa enn ki akote ou, ki son kondisyon lasante pa tro lo la, si i annan pti baba ouswa en dimoun aze ki pe rod en pti repo.

Apre en serten letan ou fer ou *volume* desann e ou zwe pou ou tande e donn sans sa dimoun akote pou li repoze. Mr Speaker mon fer sorti ki nou tou a en moman nou annan en pti lafet kot nou, e nou fer en pti rankont antre fanmir avek enn de zanmi. Me sa pa donn nou okenn drwa pou fatig nou prosen nenport ler e nenport zour.

Nou bezwen fer tou keksoz avek respe e i normal ki nou averti nou vwazen, e fer li konnen ki nou pe annan en pti lafet e omwen i a prepar li akoz nou tou nou annan nou drwa anba Lalwa.

Mr Speaker i annan bann loto ki pas zot letan fer *race* monte desann dan vilaz, lanmizik *full blast* ankor. Zot menm annan drwa aret zot loto devan laport en dimoun zot lanmizik i kontinyen zwe for, zot debarke al fer sa ki zot anvi fer, lanmizik pe kontinyen zwe for dan loto drwat devan laport sa dimoun. Sa kalite keksoz i apel pirman mank respe pour lezot.

Mr Speaker tapaz dan vwazinaz i en lot form osi, annou pa blyie sa enn ki li in

deside leve 5er 30 bomaten e komans koup son zerb, san pran kont sa dimoun akote li ki'n antre 1er bomaten sorti travay ki li i ankor pe dormi en pti pe.

Li i koup son zerb i son priyorite e tanpi si ou bezwen sibir sa tapaz. Mon krwar pou en Dimans ou en nenport konze piblik, en travay koumsa i a kapab esper dan 8er. Akoz sa dimoun osi ki pe sey repoze ankor en pti pe i pey son lakaz e i annan son drwa parey ou ki pe koup ou zerb 5er bomaten Onorab Bastienne i kontinyen.

Mr Speaker sa ki zwe domino dan kwen lakaz zot vwazen ziska 4er bomaten, pe tap domino for pe kas gran, gran riye, pe zoure ler zot in tap zot pti topet.

Bann group ki asiz dan bann *staircase* dan bann *block flats* koudpye dan laport zot vwazen apre taye.

Blok larantre kot bann flat e servi sa landrwa koman en landrwa pou vann zot drog. Tousala i bann form labi e i anmenn tapaz e i mars avek serten kalite tapaz ki pa akseptab.

Ozordi atraver sa Mosyon mon pou osi donn mon sipor sa novo tim lafors Lapolis dan distrik Perseverance, ki pe pran zot travay vreman serye e pe fer tou pou anmenn lord

dan Perseverance Onorab Bastienne i kontinyen.

Mon pou remersi zot tou pou sa bon travay ki zot in komanse avek tou konviksyon pou anmenn trankilite, respe e tolerans dan vwazinaz kot tou dimoun ava viv anpe.

Mr Speaker mon pou donn mon sipor sa Mosyon e mon pou osi demann tou Manm Onorab pou zot osi aport zot sipor pou sa Mosyon, pou nou arive vwar nou distrik vin pli *friendly*, toleran e annan respe pour enn a lot Onorab Bastienne i dir an terminan.

Lo mon kote Mr Speaker mon ti anvi fer resorti ki i annan bokou konplent ki'n vin kot mon lofis lo sa size tapaz. Me pa akoz lanmizik oubyen lisyen nou vwazen, me sirtou sorti lo bann sit konstriksyon.

Mon krwar ki la osi ler Minister Lanplwa pe donn bann lakonpannyen GOP pou fer vini travayer etranze, kot zot kiltir pa parey pou nou, i osi en portan pou fer zot konpran ki i annan serten paramet ki zot bezwen ganny respekte.

Akoz sa bann travayer Endyen ek bann *Bangladeshi* Mr Speaker, zot napa lasemenn e zot napa wikenn zot. Pou zot toulezour i parey. Zot pa konnen si dan wikenn dimoun i repoze ziska en pe pli tar. Kantmenm Dimans 7er

bomaten zot met tou zot masin on, fer tapaz.

Alor lo sa kote i osi enportan pou fer konsyantizasyon lo sa zafer tapaz dan vwazinaz par bann group konstriksyon. Mr Speaker enn mon *constituent* pa tro lontan mwan pase, in anvoy mwan en *text*, mon ava lir pou zot konpran egzakteman kwa ki sa bann dimoun pe rode ;

“Bonzour Onorab eskize pou deranz ou la bomaten, dapre konpran sipoze annan en deba lo *disturbance* ek lanmizik dan transpor. Nou tou nou pe rod sipor pou nou ganny en landrwa kot nou kapab ale pou nou zwe nou lanmizik, si nou zwe dan semen pran aksyon ek nou.

E landrwa kot nou kapab detann, annan en ta zenn in depans en kantite larzan dan plas al dan move lenfliyans zot in depans dan lanmizik. E zot pe demann en landrwa sa group dimoun kot zot kapab park zot transpor, zwe zot lanmizik *full blast* san ganny sarze par Lapolis.”

Sa i sorti kot en zenn dan mon distrik ;- en zenn ki pe demann ki dir fer demann ek Gouvernman pou zot ganny en landrwa dezinyen pou bann ki'n met bann *subwoofer* ek bann gro *speaker* dan zot loto.

Pou zot kapab park en landrwa dekonprese e *enjoy*

zot lanmizik. En pe parey Onorab Labonte ti pe dir sa group dimoun pe demande. Mr Speaker mon poz sa la e mon remersye ou. Mersi.

MR SPEAKER

Mersi Onorab. Onorab Porice.

HON DOYACE PORICE

Mersi Mr Speaker. Bonzour Mr Speaker. Bonzour tou mon bann koleg. Mr Speaker pou en pti group zil parey Sesel nou sipoze pe konpran kanmarad, viv byen ansanm e annan respe pou lezot. Akoz mon komans koumsa, set akoz tou Sesselwa i viv obor kanmarad.

Menm si ou reste dan nor, santral, was e sid me ou zwenn dan nenport ki kwen. E nou bezwen konpran ki nou tou nou imen e nou bezwen viv byen dan trankilite. Alor tapaz pa zis lo nivo aktivite kiltirel kot mon pe koz lanmizik.

Me nou annan tapaz lo nivo transpor pa zis pou bann ki reste obor semen i konsern nou tou. I annan dimoun ki aste en transpor zis pou modife li pou met plis tapaz dan masin e osi pli gro *speaker* ladan.

Nou konnen i zot swa, e zot lanmizman ki koumsa, me annou mazin nou pti kanmarad osi ki pe mars lo semen, ouswa ki malad dan lakaz, ki lopital. Akoz sa tapaz

lanmizik ouswa lanmizik dan masin loto li menm, i bokou pou nou piblik la ater. E ki i afekte trankilite nou pep.

En lot keksoz ankor se bann dimoun ki netway semen ek masin *blower*. Wi Mr Speaker nou tou nou konnen ki lavi in evolye e sakenn i rod son fason viv, me nou bezwen fer dan en fason ki pa pou afekte nou vwazen, ouswa piblik an zeneral.

Tapaz ek masin *blower* i bann ki komans 5er a 5er edmi bomaten. Sirtou lo bann semen segonder kot i annan bokou lakaz, ki annan bokou lakaz la kot petet i annan dimoun ki malad, dimoun ki'n travay aswar. E pe lev dormi, e osi i annan nou bann dimoun aze ki pa neseserman lev granmaten, e zot anvi repoze.

Menm bann etidyan ki bezwen etidye, kot zot osi zot bezwen sa trankilite. Lapropte i enportan dan nou pei. Me nou bezwen fer li ek proteksyon, san ki nou fatig ouswa anbaras nou zabitan. E touris osi zot vin isi pou zot ganny en pti trankilite.

Mon pa pe anpes nou pti kanmarad ki servi masin *blower* pou pa servi. Non, Mr Speaker i zis ki nou servi li dan en fason e en ler ki apropriye.

Mon konnen zot pe rod zot lavi zot osi, alor *chapeau* pou bann ki fer li dan en ler ki byen e konvenab. Tapaz ek

bann *speed boat* lo lanmer osi i *disturb* en kantite sirtou dan Dimans apre midi.

Alor mon'n koz lo sa Mosyon tapaz, akoz mon santi ki i annan bokou keksoz ankor en kantite tapaz dan nou lanvironnman. Me letan pa permet, Mr Speaker mon pare pou vot pou sa Mosyon tapaz akoz nou Seselwa nou bezwen konpran respe kanmarad e amelyor nou lavi dan vwazinaz, distrik, e pei an zeneral. Mersi.

MR SPEAKER

Mersi Onorab. Onorab Gabriel.

HON CONRAD GABRIEL

Mersi Mr Speaker. Bonzour tou Manm. Bonzour zabitan Pointe Larue. I fer mwan gran loner pou dir 2 pti mo lo sa *issue* tapaz. E mon krwar i apropriye vi ki *Civil Code* osi nou'n fek amande pou tonm an plas, tonm ansanm.

Mr Speaker atraver ou, tapaz i en keksoz ki nou'n erite. Pointe Larue si nou pou koz tapaz avyon premyerman. Dan nou distrik nou pou viv en pe letan ek sa size tapaz. Menm pou lavi or petet i annan zabitan ki pou deside sanz landrwa reste *still* i pou tann en lot kalite tapaz kot i pou ale.

Lo sa pwen i fer mon mazin en pti pe bann fanmir

dan lakot tel parey lafanmir Franchette, Rouillon, Gabriel, Hoareau, Joseph, Uzice e bokou lezot ankor, ki pe pas dan en sityasyon tapaz enorm.

Espesyalman ler i konsern avyon ki pou *IDC*, ler pe *run* en pti git zot masin pe *rev* zot masin petet sa i ale pou detrwa erdtan. Petet dimoun *IDC* ki pe ekout mwan petet ti a zis *tackle* en pti pe sa *issue*, mon pa konnen ki mannyer selman nou a rod fason ansanm.

Sa Mosyon petet i a remet lanfaz lo Lalwa ki deza an plas e mon swete ki nouveau Konmisyoner i ava *tackle* serten *issue* e sa i a ede dan kominate. Nou bezwen rekonnert pou dir tapaz nou pa pou kapab elimin li konpletman antyerman.

Me nou kapab met li anba kontrol, si nou tou nou zwe nou rol efektivman. E lo sa note mon ti a kontan demann tou zabitan Pointe Larue, pou respekte lezot dimoun e evite fer tapaz ki pou deranz zot vwazinaz.

Sa i en lapel ki mon krwar bokou Manm Onorab pe fer ozordi. Mon krwar pa si nou devret per pou rapport okenn lensidan dan nou vwazinaz, kot dimoun pe *disturb* lezot e pe anpes dimoun repoze e menm fer lezot aktivite.

Mon zis swete ki dimoun pa kre lennmi atraver sa deba ki nou pe annan la. Annou reste solider. Annou vin vini nou pei i a viv dan lape. Parey Loter Mosyon in dir, Gouvernman i devret asire ki tou Lalwa i regleman an plas pou *deal* avek sa bann tel sityasyon tapaz.

E avan mon terminen petet nou bezwen rekonnnet poudir i annan dimoun ki ganny zot lavi atraver tapaz, akoz i annan pe esper *relocation* petet, re sanz landrwa zot biznes zot ankor pe espere. Be selman *in the meantime* zot pou bezwen kontinyen fer en pti pe tapaz sa nou agree. Me solman zot bezwen swazir ler ki konvenab.

Lo ou trwazyenm pwen Mosyon, lafors lord e lape pou pran tou mezir pou asire ki tapaz i redwir dan nou kominate e lape i rennyen.

Petet lo sa pwen mon ti a zis petet demann loter Mr Onorab Georges, pour donn nou en pti pe apersi e en kontrandi lo la kantite ka petet ki nou annan Ankour an se moman, zis pou nou ganny en nide ki nou pe dil avek e ki gravite sa problem tapaz.

E dabor lo mon kote *Chief Whip* e *LOTO* in fer byen sorti byen tou bann keksoz ki annan. Mon krwar mon'n demann lapel tou zabitan

annou respekte, annou annan respe pou lezot. Mon a dir ou mersi Mr Speaker.

MR SPEAKER

Mersi Onorab. Onorab Henrie. I annan 2 Onorab Henrie non?

HON GERVAIS HENRIE

Non, Mr Speaker, mon pa'n konpran. Mersi Mr Speaker. Bonn apre midi tou dimoun sirtou bann zabitan distrik Mont Buxton. Mr Speaker mon'n swiv deba depi bomaten e mon apresye bann komanter ki'n ganny fer.

E mon ava dir depi retour miltiparti i annan bokou ki'n ganny fer pou sey adres size tapaz dan nou pei. Ler mon pe dir bokou in ganny fer in plito term bann Lalwa ki'n ganny pase, bann regilasyon, Lasanble Nasyonal depi premye ziska 6enm, in adres sa size a plizyer repriz lo nivo kestyon sipor ki Lalwa ki zot in pase e mon rekonnnet alor ziska la zefor ki'n ganny fer.

E mon osi rekonnnet bann kontribisyon ki 7enm Lasanble pe azoute ankor lo la. An dizon sa, imen par son natir toulstan nou pou sey trouv en fason pou nou pa ekoute. E alor mon prezantasyon mon pa anvi koz lo dimoun dan distrik, mon anvi adres spesifikman bann *public servant*.

Ler mon pe dir bann *public servant* nou konnen poudir dan pei ozordi i annan diferan Lalwa ouswa regilasyon ki sipoze pe kontrol tapaz;

Beach Control Act ti ganny revize an 2010,

Environment Protection Act ki 6enm Lasanble bokou nou ki la ti ladan, nou ti pase an 2016.

Environmental Protection Noise Emission Standards Regulation 1999,

Amplification of Sound and Playing of Music Control Regulation 1976, e i ti ganny amande an 2001. E osi i annan en Polisi lo restoran ki *Cabinet* an 2012 ti aprouve.

Now, letan mon dir sa lalis ki mon'n pas ladan, be i annan bann Antite Gouvernman ki nou koman Lasanble Nasyonal e la mon rezwenn Onorab Manm Elekte Roche caiman.

I annan bann Antite par egzanp; *Property Management Company*, Lapolis, *Public Health Authority*, kot Sanniter i baze, Minister Lanvironnman avek *Seychelles Licensing Authority*.

Ki nou donn zot en Bidze toulezan pou zot et anfors sa bann regilasyon ou Lalwa. Nou koman Manm Lasanble Nasyonal koman politisyen, nou pas Lalwa, nou fer *oversight* lo zot, zot vin la, nou

demann zot kestyon swa nou table bann kestyon pandan lannen ou pandan Bidze nou demann zot ki zot pe fer.

E zot dir nou en pake zafer. Be la realite nou koman politisyen la anndan annou demann nou lekor en kestyon. Ki dernyen fwa par egzant zot ti resevwar en *call* avek enn sa bann antite, en zofisye dan enn sa bann antite ki mon'n dir ki'n dir nou poudir;

Be dan ou distrik ki mannyer sityasyon tapaz i ete? Kwa ki nou kapab fer pou travay avek ou, pou amelyor sor ou bann zabitan ki ou reprezante?

Ki dernyen fwa ou'n ganny en *call* ki'n dir mon pe vin fer en vizit mon oule ou vin avek mwan pou nou kapab vwar sityasyon lo teren ki mannyer i ete? Ki dernyen fwa nou koman politisyen nou'n gannyen sa demann? 0, larepons i 0!

E mon pe koz koumsa avek en pe lannwiyans, mon tre annwiye ek sa bann *agencies*, sa bann *MDAs* akoz nou koman Manm Lasanble Nasyonal, nou donn zot tou zouti neseser, nou donn zot Lalwa, nou donn zot *S.I*, nou donn zot Bidze.

Kwa ankor ki zot oule nou fer pou zot? Vin sers zot dan zot biro tyonbo zot lanmen anmenn zot lo teren? Non, mon pa pou fer sa mwan. Akoz

ou bezwen konn ou louvraz, mwan mon konn sa ki mwan.

Me ozordi mon pe dir ou bann *public servant* ki zer sa bann zafer silvouple ekout nou koman Manm Lasanble Nasyonal ki reprezant pep Seselwa, nou pe dir ek zot poudir dan nou kominote i annan diferan form tapaz ki pe deranz nou trankilite.

Non selman nou Seselwa, Onorab Sathya Naidu in fer referans avek en rapor ki *Sustainability for Seychelles* avek CEPS, ti fer e zot *interview* serten touris ki'n vin Sesel. E in dir poudir get sa nou'n vin Sesel pou nou repoze me nou ganny deranze avek tapaz lanmizik lo lans.

E zot dir dan sa rapor si nou ti anvi tapaz lanmizik nou ti ava al dan en *disco*, nou'n vin pou ekout tapaz laroul.

Be sa Lendistri Tourizm la, sa bann dimoun laplipar nou marse i Lerop, e Lerop zot standar lavi presyon lavi i bokou. E zot vin Sesel pou repoze, retir stres. Alor nou bezwen fer atansyon avek sa zafer tapaz ki kontinyen.

Donk Mr Speaker mon pledwari ozordi i pou bann *public servant* ki zer sa bann Lalwa avek regilasyon, pou asire ki serten keksoz i ganny adrese pou fer ki tapaz i redwir dan nou kominote, tapaz lanmizik, tapaz transpor,

tapaz dan ban zafer konstriksyon.

E i annan serten keksoz ki mon krwar zot merit fer. Zot merit pe *monitor* e rapporte ki kalite tapaz nou pe annan de tanzaot. Ki bor zot ete dan kominote e kwa ki ganny fer pou adrese?

Zot bezwen dir nou, eski zot annan ase *staff* pou fer sa bann travay? Eski zot annan ase lekipman? Mon rapel ti annan en konversasyon nou ti fer isi dan 6enm Lasanble, kot Ansyen Minis Maurice Loustau-Lalanne ti vini ti vin koz lo sa bann lekipman ki mezir *decibel* la, e i ti dir nou poudir zot napa ase - non?

So si zot santi poudir Lasanble i dwatet ed zot pou demann en pe plis larzan lo zot par, nou ava fer li, nou pe ofer sa, sa soz ozordi la. Zisteman zot bezwen dir nou ki kantite Seselwa zot santi poudir pe ganny tro ekspoze avek polisyon tapaz, sirtou lo bann landrwa ki annan *Elderly Home* par egzanp.

Zot bezwen dir nou kwa ki pe ganny fer atraver par egzanp Minister *Lands and Housing*, pour dan bann *Housing Estate* ki nou pe konstrir. Kwa bann keksoz ki pe ganny fer dan son *design* pou protez nou popilasyon? Par egzanp nou kapab met bann miray ki vin parey en *sound barrier*.

Akoz Roche Caiman par egzanp kot sa *highway* i ete, i deranz bann dimoun, eski nou pe mazinen sa? Sa pa nou Lasanble ki merit pe fer akoz nou pa bann arsitek nou, mon pe dir ankor. Bann *public servants* zot bezwen konsider sa dan zot bann *design*.

Eski zot pour restrikte par egzanp serten devlopman dan bann kominote ki pou dir be tel garaz ou pa kapab vin fer la, akoz ou fer tapaz avek *wielding*, sepaman kwa ki afekte dimoun?

Donk sa i zot responsabilite pou zot konpran ki kalite rankont ki seselwa i fer ki afekte dimoun, rankont familyal, parti laniverser, rankont dan travay bann lezot aktivite e ki mannyer nou ankouraz Seselwa kote pou fer, kan pou fer e dan ki fason nou kapab fer li.

E Mr Speaker mon ava termin lo sa rapor ki Onorab Sathya Naidu ti fer referans avek, e i annan bann propozisyon kler ki ti ganny mete devan ansyen ladministrasyon, pour dezormen pei i sey *take onboard* e ki alors sa zafer tapaz a lonterm i ava redwir.

Par egzanp enn ti dir poudir Lotorite i merit anforsi Lalwa egzistan. E mon'n pas dan en lalis sa bann Lalwa avek regilasyon ki annan, e osi

entrodwir bann pli sever pou protez drwa sitwayen. Mon souliny drwa sitwayen.

Lalwa i merit anpes dimoun servi lanmizik amplifye lo lans e lezot landrwa piblik ki ouver. In annan propozisyon pou entrodwir Lalwa ki kler, mon repete kler e ki reglement volim pou zwe lanmizik dan transpor.

Zot in deza dan loto en boug par deryer zot pe zwe lanmizik i sakouy sa loto ki ou ladan? Ou devan li ou, i sakouy ou e tapaz ki sorti dan masin loto ki'n ganny modifie pirman pou fer tapaz akoz i kontribye pou fer dimoun sourd, sirtou zanfan.

Lot propozisyon se pour kontrol lenportasyon sistem lanmizik ki'n *design* pou fer tro bokou tapaz e bann akseswar ki servi pou modifie transpor pou fer tapaz. I annan osi propozisyon pou dir be konstrir en landrwa spesifik dan sak kominote kot bann dimoun i ava kapab ale pou fer zot parti.

E Ladministrasyon Distrik, pa Ladministrasyon Distrik, me plito Sant Kominoter, i ti ava en bon landrwa pou dimoun al fer parti detanzaot, olye ki sa bann *building* i reste vid e pa servi pou redwir nwizans dan kominote.

E zot in osi propoze dan sa rapor pour ranforsi Lalwa pou kontrol son anliny avek standar Eropeen.

E sa zafer standar Eropeen i pa'n vin ladan par azar li parey mon'n dir, akoz nou'n dir pli gran marse touristik se Eropeen e zot ekspekte en keksoz ki an liniformite avek sa ki zot, zot abitye avek.

E anfet Eropeen lakantite ki vin Sesel i 3 ou 4 fwa plis ki nou popilasyon Seselwa, alor annou pa pran sa koman en keksoz zot pe enpoz lo nou.

E finalman Mr Speaker sa rapor i rekomande, ki i annan plis bann kanpanny ledikasyon piblik, lo fason ki tapaz i afekte nou lasante partikilyerman lanmizik ki for, ki mannyer i kapab afekte nou zorey fer nou sourd, anpes nou dormi e apre sa stres i deklans dan bann keksoz konplikasyon lasante.

Alor ozordi mon krwar Lasanble Nasyonal nou pe fer en lapel ankor avek brans egzekitiv atraver Minister Lanvironnman, atraver Minister Zafer Entern, atraver Minister Finans ki ansarz (SLA) pou pran sa bann keksoz ki nou pe dir a ker.

E mon swete ki ler sa nouvo ladministrasyon i met sa bann mezir an fors, nou pa dir pe diskriminen, pe *harass*,

nou pa dir okenn Minis ouswa Prezidan i diktater, letan nou koman Manm Lasanble nou'n demande ki Gouvernman i pran bann aksyon, pou fer sir ki drwa sitwayen i ganny proteze dan Sesel.

E mon fini ankor, mon enplore avek bann *public servant* ki nou donn zot Lalwa, ki nou donn zot Bidze. Ekout nou, vin travay avek nou dan kominote pou fer sir ki Sesel enn fwa pour tou, nou sanz kondisyon e standar lavi nou bann sitwayen ki tapaz i vin en keksoz lepase.

E ki nou konn kapab servi li dan en fason ki nou pou apiy ek pyetin lo drwa personn. Me ki an menm tan nou pa pe afekte kalite lavi pep Seselwa. Mersi Mr Speaker.

MR SPEAKER

Mersi. Onorab Bistoquet.

HON ROSIE BISTOQUET

Mersi Mr Speaker. Bonzour Mr Speaker Mr Speaker i annan diferan kalite tapaz dan lemonn antye menm Sesel, i annan tapaz ki dou, tapaz ki egzotik, tapaz ki annan lakontantman, tapaz ki sokan, tapaz la per, tapaz lafreyer, tapaz soufrans, tapaz douler, tapaz anglouti, tapaz spirityel.

Loter Mosyon in konsantre lo logmantasyon nivo tapaz, ki destabiliz sistem imen, zannimo ek

lanatir. Syantis in trouve ki lavi modern in vin plizanpli tapaze, swa tapaz trafik, tapaz sorti kot restoran, bar, *night clubs* menm tapaz aeryen parey *helicopter* ou avyon.

Pou tande i annan differan fakter ki par egzanp Lanmerik in montre akoz dimoun in ganny ekspoze avek tapaz for. Malgre isi Sesel nou pa ankor ariv sa nivo pou detekte tou tapaz, tou lakoz tapaz ki dimoun i fer zot pa tande.

Me nou kapab dir ki statistik in dir ki laplipar lanmor ki'n arive set avek maladi leker. En dimoun i ganny ekspoze avek tapaz for, pou pandan en serten peryod letan, i koz tou nerf son zorey fatige e rezulta se perdi son sans pou tande Mr Speaker.

Dapre en rapor letid pibliye par (WHO) anba tit '*Make Listening Safe*', i ti estimen ki en bilyon zenn dimoun dan lemonn antye, i a risk pou perdi zot sans tande, akoz bann danze pratik ki ekout ladan parey *headphones*.

Plis ki 43milyon zenn ant 12 a 35an pe viv avek bann dezabilite pa tande. Sa letid in ganny fer parmi sa bann zenn sorti dan pei devlope, e osi pei ki mwen devlope.

Ladan poursan ti ganny ekspoze avek bann son tapaz

for, an servan zot prop lekipman odyo elektronik e 45 poursan bann ki ti ganny ekspoze avek bann son tapaz for dan *nightclubs* ouswa dan *discotheques* ouswa dan bar.

Mr Speaker parey loter Mosyon in dir tapaz i en vre menas pour enport ki sosyete, sirtou tapaz komersyal. Lentansite ou tapaz for, i ganny mezire par bann nivo met tapaz e en limite tapaz i ganny dekrir koman frekans *decibels*.

En tapaz akseptab pou en imen i ant 60 a 70 *decibel*, sa nivo i sirtou ant konversasyon normal ant 2 ou pis dimoun. Mr Speaker tapaz domestik i anmenn laenn e diskisyon dan fanmir e sirtou dan vwazen e osi dan kominote e dan nou sosyete.

Avek devlopman resan dan nou pei i annan dimoun ki'n fer lakaz obor pti laferm ou obor pti laferm e son vwazen ki'n konstrir *guest house* dan bor. Ki nou trouve?

Sanmenm sa vwazen *guest house* i en novo vwazen i konplent son kliyan ou li menm li, zot pa kapab dormi aswar akoz tapaz zannimo, tapaz bef, kabri, poul ek lezot e menm tapaz lisyen tou lannwit.

Malgre sa prop pti fermye pe debrouye pou anmenn en bouse manze lo latab son fanmir, tapaz fer zanmi vin

lennmi, vwazen fase ek kanmarad i fer menm parfwa grankouto mele, gard pa kapab tir lasasen.

Mr Speaker en lot group tapaz se tapaz irbanizasyon. Irbanizasyon i arive kot plis dimoun sorti dan leo, mon pa pou nonmen kote isi Sesel nou tou nou dan leba. Pou vin dan lavil swa in vin ganny en flat ouswa en lakaz par egzanp Perseverance, Roche Caiman, Anse Aux Pins e lezot.

Alors sa bann gran group dimoun dan en bann *housing estate*, i naturelman ogmant popilasyon e bann distrik ki pros ouswa bann distrik ki dan lavil. Sa bann mouvman i ogmant nivo devlopman dan *housing estate*, sirtou i annan devlopman lekol, laboutik, bazar, Kordgard, legliz e lezot ankor.

Dan sa menm landrwa konmela nou war en kantite aktivite anti-sosyal parey lavant drog, labi lalkol, prostityon e lezot akt endesan.

Pandan sa dernyen deseni nou'n menm temwanny lavi dan en bann *housing estate* ouswa dan flat kot dan tou kwen pei kot bann zabitan pa pe viv an armoni ek kanmarad, akoz diferan form tapaz. Tapaz zoure, tapaz kankan, tapaz lager, tapaz lanmizik for, tapaz kriye.

Menm i anmenn lisyen eran ki aboye sirtou aswar.

Sa bann zabitan zot bliye poudir i annan bann dimoun ki malad, bann pti baba ki sorti maternite ek zot manman, zot fatige zot bezwen repo ;- bann etidyan ki bezwen etidye sirtou la dan sa bann letan ki nou dan nouveau normal, kot zot bann etidyan isi dan lakour e osi bann vye dimoun ki pe repoze.

Dan bann sirkonstans parey, gard i monte desann pou met lape ek lord. Eski i pa ti vo mye war sa bann Lapolis fer plis lezot programm dan distrik, olye pran plis zot letan pou pran karantenn *speaker*, lanmizik kot sirtou bann *housing estate* ?

En lot tapaz Mr Speaker ki nou osi nou fer fas avek se tapaz transportasyon. Tapaz sorti dan tou kalite transpor lo semen, lanmer e aeryen. Lasante transpor prive lo nou larout isi Sesel i bokou pou nou pti popilasyon. Parkont bann transpor GS, *Crane*, *caterpillar*, *pickups*, ek lezot ankor.

Nou osi bezwen bann transpor pou sov nou lavi e osi nou propriete parey lanbilans, *Fire Brigade*, transpor *Fire Brigade* ki osi anmenn tapaz sirenn ki aotvwa pou demann semen.

Me tou sa bann transpor i osi kontribye en kantite tapaz

lo nou larout piblik. I paret mwan ki i annan nou bann frer ek ser, ki osi azout lo sa nivo tapaz lo nou larout piblik par met bann gro *speakers* dan zot loto e zwe lanmizik, ki fer leker nou zabitan bat pli for e dekilibre nou zorey.

Sa i en gran menas pou nou sosyete, kot tapaz i detrir lavi en Nasyon. Isi Sesel nou annan en sel *Airport*. Bann zabitan Pointe Larue parey mwan menm nou osi nou fer fas avek tapaz avyon lannwit koman lizour, tapaz elikopter parey mon kanmarad in dir taler.

Tou zabitan sa distrik in fini konnen lekel avyon ki pe apoze, lekel ki pe dekole par son, son tapaz. Pli move ler avyon kargo i pran kontrol nou *Airport* i annan plis tapaz.

En lot tapaz Mr Speaker se tapaz rekreadyonnal. Mr Speaker mon lentervansyon in fini kouver tapaz lanmizik. Be sa pa pour osi fer mwan dir en pti mo lo gro problem ler nou Seselwa i fer parti.

Parti lanniverser, parti batenm, parti Premyer Konminyon, Lakonfirmasyon maryaz, menm si konmela i rar, tapaz lanmizik i komans depi bomaten ziska tar dan lannwit, i komans depi *sunrise* ziska *moonlight parties* i kontinyen.

Partou lo lans dan wikenn, sa bann zabitan pa

kapab repoze e akoz tapaz lanmizik. Menm

konversasyon zot pa kapab fer dan zot fotey, ouswa dan zot pti lakour. Tapaz lanmizik i for e ranpli zot lakaz e zot pa kapab repoze menm dan tar dan lannwit.

Nou bann sitwayen aze in ganny ase. Sa bann gard i osi de plwaye pou fer sir ki nou kominote i reste trankil. Omwen pandan sa, en nouveau *COVID* in fer son mark osi kot lans in pli trankil ki labitud. Me pa i gou ler nou tann zis sa tapaz laroul pe kraze lo lans, avek en pti kafe anba lavarang dan Dimans apre midi?

Lezot lafet se Nwel ek Lannen kot tou Seselwa i kontan fete. Malgre isi Sesel nou pa tir petar pandan Nwel ni flez, me nou frer ek ser ki tranble kominote avek bann petar ton, kot tou le lannen sa i sok nou zabitan e menm zannimo. Sa i ilegal e ki Lalwa pe fer pou sa?

En lot tapaz Mr Speaker se tapaz endistriyel. Mr Speaker tapaz konstriksyon i anmenn en gran lenpak lo nou Nasyon, sirtou ler bann travay konstriksyon i ganny fer dan wikenn. Son marto, son dril, tol pe kloute, gro masin parey *excavator*.

Kot i pli grav ler sa bann konstriksyon i ganny fer, dan bann kominote kot i annan bann dimoun ki reste

domestik. Pov sa bann malad, trwazyenm-az in ganny kosmar.

En lot tapaz endistriyel ki fofil dan nou kominote se tapaz lanmin. Ankor zabitan Pointe Larue la i lo zot ant i, ler ou tann sa gro tapaz “*boum, boum, boum!*” “Ler lanmin i pete lo L’Ile Du Suet fondasyon lakaz i mate, lakaz i tranble, lakaz i fele, louvers i grennen, zannimo domestik i maron.

Tapaz lanmin i pli gro tapaz ki zabitan i fer fas avek isi dan sa kwen Mahe. Mon konn menm en pe dimoun ki'n bezwen al trete pou sok e lefe psikolozik e menm ganny malad leker. Dapre Minister Later lanmin ti devret arete depi 2006.

Me ki nou'n war ozordi 15an apre 2021? Eski sa i legal? Lanmin i ankor pe tire toulezour. En lot tapaz ankor dan Pointe Larue bann zabitan sirtou dan leo Anse Francois, i annan en tapaz *PUC* sirtou kot i annan sa tenk *STP* kot tapaz i roule bomaten ziska aswar.

En lot tapaz preski toulezour Mr Speaker i annan zannimo domestik parey sat, lisyen. Zot tapaz aboye, zot tapaz mwele sirtou lisyen maron dan tou distrik tou le swar, i anpes bann zabitan fer en bon sonmey apre en long travay dan lazournen.

Pa zis sa Mr Speaker, bann zabitan i annan ki annan

larivyer kot i reste i toulstan ganny *disturb* tou le granmaten depi 3er bomaten ziska soley leve, avek tapaz sa bann gro grenwir sirtou bann mal ki *disturb* bann vwazinaz avek zot bann leokri *kwenk, kwenk, kwenk!*

Pou konklir Mr Speaker mon pou siport sa Mosyon, akoz letid in montre ki polisyon i osi kontamin nou lanvironnman naturel. Polisyon i pran laform kemikal, lenerzi parey tapaz, lasaler e lalimyer.

Malgre tou imen i viv dan tapaz, me tapaz ki an plis i pa zis *disturb* en imen, me osi zannimo kot i afekte zot sistenm pou reprodiktiv, me pli grav i andomaz aktivite imen toulezour e osi nou lasante.

Nou zorey pa'n devlope pou *filter* sa bann tapaz for, nou zorey i kapab pran selman en serten kantite son ki i pa pou ganny andomaze. Okenn tapaz ou son frekans tre o ki pli o, dapre ki (*WHO*) in rekomande i pou desir nou tanbour zorey e a lafen nou pou vin sourd.

Tapaz for ki toulstan dan nou lanvironnman i sanz konportman en imen i fer li vin agresiv, i fer li pa dormi sirtou aswar, i santi li fatige, ganny depresyon, i ganny tansyon. E sa bann sentom i pou devlop maladi leker ou menm ganny

latak leker premature ki sa i vin fatal.

Mr Speaker pou asire ki nou popilasyon i reste an bonn sante nou bezwen nou tou pran nou responsabilite sirtou bann lenstitisyon, pou fer sir ki tapaz an ekse i ganny kontrole.

Me sa i pa vedir ki bann zenn ki kontan zot lanmizik pa kapab annan en letan lwazir pou zwen zot bann sanson pou *enjoy zot famous artist* prefere.

Zot kapab servi *headphones* oubyen fer li dan en fason annord baze lo en konprenezon avek *Community Leaders* avek Gouvernman ki pa toulstan kantmenm i pa pou vin fasil. E osi annan en landrwa spesifik ki met a zot dispozisyon pou fer zot defoule.

Alors Mr Speaker mwan mon pou siport sa Mosyon pou asire ki nou pep i pran zot responsabilite, Lalwa pran aksyon avek sa ki'n dezobeir pou nou pti pei, i annan mwens tapaz kot nou tou nou viv e rezouir nou drwa koman imen.

Annou pa detrir nou lasante ek tapaz dek ki nou'n perdi nou sans pou tandem i pa pou zanmen e zanmen retournen. Mersi Mr Speaker.

(APPLAUSE)

MR SPEAKER

Mersi. Byen, nou a bezwen aret la pou permet bann travay Komite ki pou pran dan midi edmi. I reste mwan 6, 7 Manm pou koze, donk- pardon? wi Onorab Cosgrow ki oule dir? Atann, enn a lafwa silvouple. Onorab Cosgrow.

HON WALLACE COSGROW

Mr Speaker mersi. Mon ti a kontan si zis ou dir nou si nou, konmsi lekel ki pe vini, akoz si nou lo la, pou fer sir nou lo lalis. Mersi.

MR SPEAKER

Tre byen, tre byen wi. Bon lide mon annan Onorab Aglae, Onorab Cosgrow, Onorab Andre, Onorab Loizeau, Onorab Hoareau e Onorab Arissol. Onorab Samynadin i ladan, e ou osi?

Byen, tou dimoun i egal, tou Manm i annan privilez koze. Mersi nou ava pran break e nou ava rezwenn 2er. Mersi.

(BREAK)

MR SPEAKER

Bonn apre midi tou dimoun. Bon nou kontinyen avek deba lo Mosyon Onorab Georges e nou ava arriv kot Onorab John Hoareau.

HON JOHN HOAREAU

Mesi Mr Speaker. Bonn apre midi Mr Speaker. Bonn apre

midi tou dimoun a lekout. Mr Speaker Mosyon ki Onorab Georges in anmennen ki baze lo tapaz lanmizik kriye, tapaz transpor e zannimo, i an 3 parti.

I demann nou pour ki bann *citizen* i respekte lezot, i pa deranz vwazinaz, dezyenm parti Gouvernman pou fer tou sa ki i kapab pou met bann mwayen legal an plas, pou *deal* avek tapaz. E trwazyenmman i demann lafors lord ek lape pou pran bann mezir pou redwir tapaz.

Mr Speaker i enportan ki nou konpran byen kisia tapaz. Tapaz i en form polisyon se pour sela rezon ki sa Lalwa ki gouvern la kantite tapaz, i prensipalman trouve dan *Environment Protection Act*.

E en polisyon par definisyon se, ler ou desarz swa kemikal oubyen laform lenerzi dan lanvironnman, ki vin koman en nwizans oubyen i vin e en nivo ki menas lasante piblik. Dan mon distrik mon fer fas ek bokou konplent dan mon lofis lo kote tapaz ki arive dan distrik.

Ou konnen i annan tandans pou krwar ki tapaz i ganny asosye avek bann dimoun ki petet mwen edike, ki dan lakominote. Me la realite i montre nou poudir i pa vreman leka, par egzanp i

annan Lotel Savoy ki obor Lotel *Sables D'Or*.

E an fas avek kot bann rezidan kot *Sables D'Or* i dormi i reste kot zot apartman i en restoran kot *Savoy*. E *Savoy* i fer sir i zwe lanmizik en pe for i *disturb* tou bann kliyan, sa lot madanm dan lotel *Sables D'Or* e finalman bann touris i bezwen sanz lokasyon.

E sa i en fason kot ou kapab dir poudir pourtan 2 lakonpannyen touristik, ti merit asize koz ansanm petet rod en solisyon pou en problem tapaz. E nou vwar poudir i vin a en nivo kot pli tar sa bann keksoz i bezwen al rod lapel Ankour.

Mr Speaker i annan osi problem *carpark* dan mon distrik ki bann zenn i servi souvandfwa pou sosyalize, parfwa zot servi zot lalkol la pou defoule e osi drog osi i ganny servi ennler.

E sa bann tapaz lanmizik ki zot vin avek zot bann, dan zot bann transpor i parfwa i deranz la kominote e bann dimoun ki reste obor sa bann *carpark* sirtou kot *La Perle Noire* i ete.

Mare Anglaise osi tapaz lanmizik obor lans i deranz bann dimoun dan lakominote Mare Anglaise ki souvandfwa dan zot apre travay ki zot in antre se zot pou zot pran en pti pe soupir ou kapab dir, me zot

ganny deranze bokou avek lanmizik.

Osi i annan serten *guest house* ki tou le wikenn i annan gro festen, menm dan bann lepok oubyen menm dan sa letan kot nou pe dir napa gran rasanbleman ki devret ganny fer. E la ou tann tapaz kriye tou sort kalite, bann madanm i kriye, bann zanfan i kriye e sa i deranz ankor tou bann dimoun dan lakominote.

Mr Speaker nou kapab vwar osi bann move desizyon ki Gouvernman ladministrasyon oparavan in pran, pou konstrir en stad lanmizik dan milye en landrwa rezidansyel, san fer okenn konsiltasyon avek sa bann zabitan, i fer ki nou pe kre en problem polisyon dan sa landrwa, nou pou kre en problem polisyon dan sa landrwa.

E parey nou'n ganny dir oparavan *Civil Code*, Lapolis i kapab sezi serten morso lanmizik, oubyen serten morso bann keksoz ki pe ganny servi pou fer tapaz si i annan dan la kominate. E sa i anba parey in ganny dir oparavan anba *Trouble de voisinage*.

E Lalwa ki protez lanvironnman *Environment Protection Act* seksyon 9 subsection 2, i dir ou; "no person shall emit noise in excess of noise emission standards

except where authorization has been granted by the authority."

So i kler ki anba sa Lalwa ki ti ganny administre oparavan par en seksyon Lapolis ki ti apel *Environmental Police* i kler ki sa Lalwa i la deza pour Lapolis servi.

Seksyon 4 i dir ou; "*a person who contravenes subsection 2 is guilty of an offence.*" E malerezman Lartik 3 pa al sitan an detay pou koz lo diferan sours tapaz.

Me malerezman la i nou letan ki nou pe koz lo sa Mosyon, i nou oule fer konnen petet bann ki kot *Attorney Zeneral* ki kapab *take-up* sa bann issues.

E anmenn en Lalwa osi ki en pe pli detaye lo kote tapaz ki kapab petet ganny servi pour dan en fason en pe pli efektiv ki ava pran kont dizon *noise, vehicle traffic noise, animal noise* e lezot keksoz ankor ki an se moman dan sa bann Lalwa i pa tro, tro kler parey serten in dir oparavan.

Mr Speaker tapaz i kapab anmenn en penaltı ziska R25,000 e 2an prizon. Sa anba S.I 49 dan bann standar ki'n ganny donnen dan en *schedule* ki par lao 60 *decibel* oubyen son lekivalans depi 6er bomaten ziska 11er diswar i en lofans.

Alor pou kapab met sa an aplikasyon, Lapolis oubyen

bann dimoun ki pe *custodian* sa Lalwa, i bezwen annan bann zouti enportan. Parey bann *decibel meter* pou zot kapab anmas sa bann tapaz. Bann *unit directional decibel meter* kot i kapab vreman dir poudir sa tapaz i sorti avek tel, tel landrwa oubyen avek tel sityasyon e la zot kapab anmenn sa keksoz Ankour.

San sa bann *decibel meter* i pou difisil pou kapab met an aplikasyon sa bann Lalwa ki mannyer i ete.

Mr Speaker dapre zournal Nasyon dan *l'archives* Me 2017, dan 2 mwan in annan apepre 30 konplent ki *Environmental Police* ti bezwen entervenir. Dan sa lepok ti annan sa ki nou apel sa *Environmental Police* parey mon'n dir ki ti *custodian*, en pti pe sa bann Lalwa Lanvironnman ki gouvern tapaz.

Me ler ou pe gete pa bokou bann ka ki'n ganny met Ankour, me petet serten aksyon in ganny pran kot serten dimoun in ganny fer pey lanmann, me pa tou ka ki'n ganny met Ankour.

Me ler ou get osi lo kote Linyon Eropeen bann souris enternet ou kapab vwar poudir 25 poursan popilasyon Lerop par egzanp, i eksperyans en *reduce life quality* akoz tapaz.

Me isi Sesel nou pa ankor fer pou get ki nivo tapaz i

reduce nou bann life quality. Be selman nou out nou konpran, nou konsyan ki fason tapaz i afekte la kominote oubyen nou bann dimoun.

E i osi mansyonnen poudir sa i kout *taxpayers* apepre €13 a 38bilyon par lannen zis pour bann kou medikal ki asosye avek tansyon, stress, sourd, malad leker ensidswit.

So sa, en letid en pe dan sa *genre* osi ti ava bon ti a ganny fer Sesel, ki nou ti ava kapab konnen ki kantite lenpak tapaz i annan lo nou bann dimoun.

An konklizyon Mr Speaker, mon ti a kontan osi demande ki Gouvernman atraver Minister Lanvironnman i lans en letid konpreansiv lo lenpak tapaz lo tou bann zabitan. E osi entrodwir bann *noise sensitive areas*; par egzanp lo bor bann lekol, lo bor bann lopital.

Mon ti a kontan osi petet atraver sa Mosyon, ki serten bann standar i ganny re vizite so nou revwar Lalwa Lanvironnman dizon nou revwar sa bann standar, e enkli tapaz zannimo e domestik e tapaz veikil.

Mr Speaker an terminan mon ti a kontan osi si i annan posibilite pou re entrodwir sa Lapolis Lanvironnman, ki zot ti *custodian* sa bann Lalwa e

fer sir ki tapaz i ganny dil avek e bann lezot ka lensidan polisyon, ki mon krwar bokou dimoun in koz en pti pe in elabor en pe lo lezot keksoz.

Lezot form polisyon osi ki kapab ganny met anba kontrol, ki anfen ki nou sitwayen nou ava viv en pti pe pli byen ek kanmarad.

E parey Mosyon in demande lo son premye bout, avek respe ki nou bezwen respekte nou bann lezot dimoun. Nou ava kapab ansanm viv en meyer lavi. E avek sa Mr Speaker mon remersi ou.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonn apre midi Mr Speaker. Bonn apre midi tou Onorab e tou dimoun ki a lekout.

Mr Speaker zis an pasan komansman mon ti a kontan remersi Onorab *Leader Lopozisyon, Chairman FPAC*. Mon kontan ki in *raise* sa *issue* konsernan *Air Seychelles* bomaten.

E mon oule felisit li pou li swiv sa ki Prezidan Ramkalawan in dir dan son *interview* avek Nasyon.

Parkont mon en pti pe dezapwente Mr Speaker, i tre regretab ki menm demann ti

ganny fer par *Vice-United Seychelles* lo sa menm size dan en *press release*, e sa pa'n ganny lir lo SBC. Sa an pasan Mr Speaker.

E mon kontan ki Onorab *Leader Lopozisyon* in lev sa size pour ki i kapab ganny *deal* avek. Mr Speaker an dizon sa mon'n pran laparol apre midi koman en Manm nou Lasanble Nasyonal, e mon santi mon privilezye pou mon kapab koz en pti pe lo sa Mosyon lo sa topik ki pe ganny diskite depi bomaten ozordi dan Lasanble.

Mon osi pran laparol koman en Ansyen Minis pour Lanvironnman. Dabor bokou bann Manm letan zot in koze bomaten, zot in fer referans lo lanvironnman lo bann Lalwa Lanvironnman ki regle nivo tapaz dan nou kominote partou.

Mr Speaker dan mon parkour pandan 2an edmi koman Minis Lanvironnman mon'n zwenn en kantite bann dimoun ki'n petet vin konplent ouswa ki'n met zot bann sizesyon devan konsernan sa zafer tapaz.

E zis pour note ki i annan en seksyon Onorab John Hoareau atraver ou Mr Speaker, ki *deal* avek sa bann zafer tapaz dan Departman Lanvironnman e en Lapolis Lanvironnman. E zot ankor an egzistans.

E bokou bann ka par egzant dan lepase ki mwan mon'n *come across*, mon'n refer avek sa seksyon kot zot, zot al *investigate* e zot annan bann *decibel meters* kot zot kapab petet mezir tapaz ler zot ganny bann konplent e zot fer sa travay.

Parkont zot fer sa travay a en ler 8er 4er kot petet pa toultan ki sa bann *disturbance* sa bann tapaz pe arive. Souvandfwa tapaz, *disturbance* i arriv dan wikenn ouswa apre ler travay kot sa bann zofisye pou le moman zot pa pe travay e zot depen bokou lo Lapolis, lo servis Lapolis pou kapab ede pou *tackle* bann sityasyon ler i arive.

Me solman i annan sa bann dimoun e i annan en kantite ka ki mon konnen dan lepase zot in *deal* avek. Me parkont petet kantite ka i en pti pe *overwhelming* pou zot.

E petet la avek sa diskisyon ki nou pe fer dan Lasamble e avek ban novo sansibilizasyon ki nou devret pe fer. Petet nou ava kapab ed sa *unit*, ed Minister Lanvironnman pou kapab deservi en pi pe pli byen zot manda.

Mr Speaker parey nou tou nou konnen Sesel i en pti pei. Siperfisi teren i enn ki limite e bezwen ganny partaze pour diferan keksoz, diferan aktivite.

Nou bezwen lespas pou lozman, nou bezwen lespas pou tourizm, nou bezwen lespas pou lendistri, lenfrastriktir sosyal e lezot aktivite ankor.

Tou sa ki mon'n nonmen i bezwen koegziste lo sa pti ros dan milye Losean Endyen, ki nou apel Sesel. Mon komans koumsa Mr Speaker akoz ler ki nou pe debat lo sa Mosyon, mon krwar i enportan ki nou met keksoz dan perspektiv, e ki nou esey konpran tou nou sitwayen.

Konpran zot dezir pou anmize, zot nesesite pou travay e debrouye, nesesite *enjoy* zot propriete osi. Ler ki nou sey konpran tousala Mr Speaker nou bezwen kapab konpran ki mannyer nou fer tou sa ki mon'n nonmen dan en fason rezonnab. Lakle ouswa mo enportan dan tousala se *reasonableness*.

E mon krwar Loter Mosyon i familye avek a term koman en Avoka. Se sa ki mon krwar ki bezwen dam sant nou diskisyon ozordi. Sa dimoun ki bezwen fer en aktivite i bezwen fer li avek en serten nivo rezonnab.

Sa dimoun ki santi li afekte dan en fason ou en lot, li osi i bezwen egzers serten rezonabilite dan son fason reakte. Bokou Onorab ki'n koz avan mwan in admet ki i annan tousord kalite tapaz.

Dan sosyete ozordi lavi ki mannyer i ete, lavi ki mannyer pe deroule i fer ki nou viv avek tapaz. Tapaz i la nou viv ek tapaz.

E i annan menm referans avek sa ki *WHO* in rapporte, savedir ki nou viv ek tapaz. Parkont koman imen nou egzers serten rezonabilite mon kapab met ki koumsa. Akoz nou konpran ki i annan serten aktivite i fer serten nivo tapaz.

Sa ki pa normal Mr Speaker, se ki ler tapaz i eksesiv e i pa rezonnab. E se sa ki mon krwar sete lespri par deryer Mosyon anmennen par Onorab Georges.

E sa i fer mwan Mr Speaker vi lo dezyenm parti Onorab Georges konsernan Gouvernman, pou asire ki tou Lalwa i reglement i an plas pour *deal* avek bann, ki kontinyen deranz lezot dan kominate avek tapaz.

E la mon oule met lanfaz lo lefe ki parey bokou Onorab i dir, i annan en kantite bann Lalwa ozordi ki'n ganny met an aplikasyon.

Nou'n koz lo *Civil Code*, nou'n koz lo *sorry Penal Code*, *Civil Code*, nou'n osi koz lo Lalwa Lanvironnman spesifikman *Noise Emission Standards*.

Bann standar, bann Lalwa i la, Gouvernman in met an plas petet i annan en nesesite ozordi avek levolisyon

nou sosyete i annan en nesesite pou revwar. E dabor mon fek aprann en pe letan pase la, detrwa semenn pase, ki i annan Lalwa ki pe vini an term ler.

Zot pe re aranz sa ler ki dimoun i *operate* e ki serten aktivite ki fer serten tapaz i kapab ganny fer. So i annan Lalwa. I annan ase lenstans ase keksoz ki nou kapab servi pou *deal* avek bann sityasyon tapaz eksesiv, e mon anvi *stress* lo sa mo eksesiv.

Petet ki nou bezwen fer, nou bezwen vvar kapasite dan bann lenstitisyon ;- par egzanp Lapolis, Minister Lanvironnman e bann diferan lenstitisyon ki dil avek sa bann *issues* pou revwar kapasite, get si zot ase staff, si zot annan ase teknolozi pou kapab *deal* avek sa bann sityasyon.

Akoz bann Lalwa ozordi i demande, i egzize ki ou kapab kantifye or *quantify* sa konplent e dir poudir tel tapaz i desot tel kantite *decibel*. Par egzanp in ganny fer resorti Lalwa in dir 60 ziske en serten ler, apre i desann 50ekek ziska en serten lot ler.

So bann keksoz i la, e nou bezwen kapab donn sa bann dimoun, petet si bezwen plis *staff* donn sa bann dimoun resours, si bezwen annan en novo fason travay nou konnen poudir tapaz i fer apre ler. Alors petet fer bann

dimoun travay dan bann letan ki plis problem i arive.

Me solman pwen ki mon oule fer resorti la se ki i annan lenformasyon, i annan lenstans kot nou kapab *deal* ek sa bann zafer e ki nou bezwen petet revwar sa bann fason dil avek. Ler nou pe koz lo lafors, lord ek lepe pou pran tou mezir pou asire ki tapaz i redwir dan kominate e ki lepe i rennyen.

Mon santi ki Gouvernman i bezwen dan pe egzekit sa ban lawa zot bezwen servi bann Lalwa ki an plas. E bann zofisyen pe ganny sarze pou enplimant sa bann lawa i bezwen kontinyen ganny ekipavek zouti parey mon'n dir, *training* neseser.

Souvandfwa nou war kot dimoun i konplent poudir zofisyen Lapolis i vin kot zot i vin *attend to* serten konplent, petet lafason ki sa bann keksoz i ganny *deal* avek, i pa neseserman la fason ki nou bann sitwayen ti ava kontan sa bann keksoz i ganny *deal* avek.

So i enportan ki nou, nou kontinyen debat lo sa bann zafer. Nou kontinyen koz lo la. Nou kontinyen rod meyer fason pou ki nou kapab *empower* bann dimoun i pe travay ek sa bann Lalwa pou zot kapab deservi nou popilasyon.

Deservi nou bann sitwayen dan en fason en pe pli byen ki nou ava annan less, mwens sa bann konplent ki ozordi nou pe tande dan nou sosyete e ki merit Onorab Georges anmenn en Mosyon devan Lasanble.

So avek sa 2 pti mo Mr Speaker mwan mon ti a kontan dir ki poudir ler nou pe egzekit bann diferan Lalwa ankor enn fwa, ki nou egzers li byen avek kosyon e ki nou pa antre lo drwa petet bann dimoun pou zot kapab defoule, pou zot anmize, pou zot kapab fer zot aktivite ekonomik.

Me solman mon pe enplor sa bann dimoun osi ki ler zot pe fer zot bann aktivite, osi annan en regar lo bann dimoun ki viv otour zot, bann lezot biznes, bann lezot keksoz ki *happen* otour zot *area*. Avek sa Mr Speaker mon a remersi ou pou laparol e nou a esper pli tar. Mersi.

MR SPEAKER

Mersi. Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun. Bonn apre midi mon bann zoli dimoun dan distrik Bel Ombre ki pe ekout nou Mosyon.

Mr Speaker letan mon'n ekout Onorab Cosgrow koman en Ansyen Minis ki ti ansarz

tapaz en lepok, lenpresyon ki mon'n gannyen i pa'n fer naryen li, zis in note poudir ti annan bann Lalwa an plas ki kapab *deal* ek tapaz. E la ozordi koman en Manm Lasanble i vini i repas lo sa bann menm Lalwa e i dir ek nou kwa ki ou krwar nou devret kapab fer.

Se pour sa rezon ozordi nou'n vin o pouvwar, pou nou fer sir ki tou sa bann Lalwa ki Minis Cosgrow sa letan, pa ti *deal* avek Mr Speaker nou, nou pou bezwen fer sir ki nou Gouvernman avek nou Minis ki la nou bezwen *deal* avek sa zafer tapaz.

Ki Mosyon nou pe loz lo la apre midi se tapaz, Mr Speaker kisia tapaz? Zot dir mon en lepok Sesel nou ti annan en zoli landrwa ki ti apel Shakara, gran *Trilliano*, Finley Roselie, *City*, Lapay Galer.

Zot dir mon sa bann seri landrwa bann dimoun ki en pe pli aze parey Mr Speaker menm, loter Mosyon, mon mazinen Serzan pou rapel e bon pe zot, zot rapel. E sa bann letan zot ti donn en bal zot. Cosgrow pa ti ankor ne li, Minis Cosgrow, zot ti donn en bal.

Dan pei zot dir mwan sa letan ti gou, parske zot sa letan ler zot ti ankor zenn zot ti annan landrwa pou zot al defoule, (pa ale espere !) Zot ti

annan landrwa pou zot kapab defoule, zwenn dan wikenn, bwar en pti labyer, kominike avek zanmi.

Be ozordi napa sa Sesel. Akoz napa sa Sesel? Parske zot dir ek mwan pli gro tapaz ki ti egziste sete le 5 Zen 1977, ki letan ti annan en '*boum*' parey Onorab taler in dir, Onorab Bistoquet in dir en '*boum*', ti annan en '*boum*' le 5 Zen 7'7. E sa ti en tapaz ki ti fer tou dimoun per.

Zot dir mwan ti annan en '*boum*' kot radyo Sesel ti annan en bonm ki ti pete. Sa in fer dimoun per, ti annan en bonm *Reef Hotel* '*boum*' ki ti fer dimoun per.

E tousala bann bonm ki ti ganny mete dan sak vakwa Mr Speaker in fer ki tou sa bann zoli landrwa ki mon'n mansyonnen taler kot ou Mr Speaker, kot Onorab Georges bann ki ne pe pli vye ti ale pou al defoule, in perdi dan nou pei.

Tou sa bann landrwa in fermen. Prezan ki in fer letan in fermen? Sa in fer ki letan tou sa bann landrwa in fermen, sa Gouvernman ki ti la in kontrol tou sa bann keksoz li, in anmenn tou rasableman dan distrik.

In fer sir si ou vin dans "taba dan bonnen kare ki donn maloker we", ou vin dans dan Sant Sosyal Bel Ombre. Si ou vin dans "anmenn ou

banyen pti madanm avek sa pannyen," ou bezwen vin dans li dan distrik Anse Etoile - ok?

So Gouvernman in kontrol tousala ki tousala in fini dan ladministrasyon distrik oubyen dan Biro Brans. Prezan tou sa bann landrwa *Shakara city* la, in fermen li. Prezan ozordi nou bann zenn ki la, la. Ki ankor byen *fresh* ankor zenn, kote li i ale pou defoule prezan li?

Kote li i ale pou li defoule pou li enjoy son lekor? Sel *discotheque* ki nou annan dan Sesel ozordi pli zoli *discotheque* i zwe pli zoli lanmizik i dan distrik St Louis. Sa se *Barrel*.

Anse Aux Pins zot dir i annan enn i fer en pe tapaz laba zot apel li *Katiolo*, ki bann zenn i kontan i ale. Ok, kot mon aprann Onorab Georges ti premye DJ ki ti zwe laba. Sa letan i ti ankor en zenn garson zot dir mwan seve ti bat lo ledo. Tou bann lanmizik *sharp* li ki ti zwe.

Mr Speaker sa ti sa lepok, ti sa lepok. Sa lepok in fini e sa lepok ti annan son kalite tapaz. Ti annan zon tapaz, so kalite tapaz. Me lenportans avek tapaz se respe. Sa ki Mosyon pe demande.

Mr Speaker mon'n konmans koumsa parske mon krwar i enportan koz lo Mosyon Tapaz pour ki nou

bann zenn laba deor zot pa vvar nou koman en Lasanble ki nou'n sot 35an, nou'n sot 40an, nou'n sot 50an. Prezan nou pe lager ek zot akoz zot, zot ankor zenn e zot pe rod landrwa pou defoule.

Fodore pa ki nou bann zenn i mal konpran sa Mosyon, zot bezwen konpran ki Mosyon pe anmennen en Mosyon pou nou kapab ede redwir tapaz dan la kominote e osi dan pei.

Me parkont sa ki Mosyon pe demande se sa ki si mon annan mon loto, mon'n modifye mon loto, mon'n pran en spiker ki groser en larmwar mon'n met dan en loto. Mon kapab fer mon loto pou mwan, me lenportans ki tapaz ler ou kodifye ou loto, pa modifye la kominote, pa modifye distrik Bel Ombre akoz ou, ou'n modifye ou loto.

Modifye ou loto, e fer ou tapaz pou ou, sa ki Mosyon pe demande. Pa bezwen *disturb* Distrik Bel Ombre akoz ou, ou'n modifye ou loto, Mosyon pe demann sa.

Si in ariv Vandredi ou annan ou 4 zwer, ou'n anvi rod en bout lans, i pa vedir ki Au Cap i annan pli zoli lans dan Sesel non, Au Cap i annan bann lans ki aksesib pou nou kapab servi, i pa vedir ki Au Cap i annan pli zoli lans.

Me si ou'n kontan pou al Au Cap en Vandredi avek ou

bann zanmi dan transpor ou kapab ale sa mosyon pa pe dir ou pa al Au Cap dan ou transpor avek ou 4 zanmi li non, pa sa ki sa Mosyon pe dir ou.

Mosyon pe dir ek ou si ou anvi al Au Cap, al Au Cap ek ou 4 zanmi anbark dan ou transpor, debarke lo en bout lans *relax* ou lekor, bwar ou pti *drinks* trankil. Me zwe ou lanmizik pou ou, ler ou Au Cap ou bezwen konsyan i annan lakaz, i annan bann vwazen ki reste la.

Alor sa ki Mosyon pe demande, fodre pa bann zenn ki pe ekoute zot krwar poudir nou pe anpes zot anmize, pa sa ki Mosyon pe demande. Anmize, me fer li avek responsabilite. *Knowing* ki ou annan drwa lezot dimoun osi pou ou respekte, observe laba deor.

Be letan mon pe koz lo tapaz, annou al en kou Bel Ombre dan mon distrik. Letan Onorab Lemiel i dir poudir dimoun Bel Ombre i vin Anse Royale. Anse Royale i en zoli distrik e pa blyie Mr Speaker sel landrwa ki annan *fun park* Sesel se Anse Royale.

Be ler mwan mon anvi al fun park kot mon ale mon pa kapab al Bel Ombre, akoz napa *fun park* Bel Ombre. Alor mon mont dan sa zoli distrik Onorab Lemiel laba dan *fun park* mon ale mon asize.

Be sa ki Onorab Lemiel pe dir avek nou zabitan Bel Ombre, ler nou vin dan *fun park* pa pran nou latab dan salon pou vin avek. Pa vin avek 12 sez pou vin anmenn kot li, pa anmenn nou domino. Parske sa i fer dezord, i fer tapaz apre gard i mele.

Ou vin Anse Royale, vin avek ou fanmir i annan lans i en *fun park* asize trankilman *relax* ou lekor trankilman *relax* ou lekor, pran *fresh air* tranp ou lipye, get dan losean.

Sa i ok, sa ki Mosyon pe demande. Mosyon pe dir annou pa fer dezord, annou pa fer tapaz, be respekte osi lezot lakominote ki dan trou.

Prezan mon al en kou dan mon distrik Bel Ombre, Bel Ombre nou tapaz toulstan Mr Speaker i konsantre kot bazar, la kot bazar. La mon kontan SFA in met bann foto, pe 1 bare byento avek lasenn, pou annan en ler antre, en ler sorti. So pou napa personn ki pou kontinyen kal la pou fer dezord.

Prezan sa ki enteresan ek sa tapaz bazar Mr Speaker tou bann dimoun ki sorti dan leo i desann li, zot kot zot fanm ek zot piti, zot televizyon, zot nouvel kot zot, zot. Zot desann zot vin la bor lanmer kot bazar.

Prezan zot vin fer tapaz e zot blyie poudir bann vwazen ki reste la obor, li i annan

zanfan li, i annan dimoun aze li, li in sorti kot li, li in kit tou son zafer kot li trankil byen annord li. I vin fer dezord la bor lanmer san mazinen poudir i annan lezot vwazen ki reste la.

Nou pa kapab kontinyen koumsa. Si mon sorti kot mon mon'n met mon lakour annord. Mon pa kapab vin fer dezord dan lakour obor landrwa dan landrwa piblik, pou mon *disturb* lezot vwazen. Mwan mon'n konpran sa ki Mosyon Onorab Georges pe demande.

Alor kot bazar nou pou bezwen annan en lord ki nou'n deza komans mete. Pour ki bann vwazen ki aze, ki malad, ki annan en dezabilite ki annan zanfan zot drwa i ganny respekte zis parey sa enn ki'n kit son madanm, son msye trankil anler laba dan leo, e li in vin bor lanmer.

Mon desann pli ba, Mont Simpson li i annan en tapaz lisyen. Kantite lisyen, i annan dimoun parey Onorab Georges in dir. Nou Seselwa parfwa sa ki nou kontan fer se, si mon vwazen i annan en lisyen, ou al gete" arr be pa i zoli ?" La ou osi ou al fer en demars pou ou gannyen, ok.

Si mon vwazen i annan pti pwason dan lakour mon osi mon bezwen rod *aquarium* rod pti pwason met ladan. Si mon vwazen i annan 4 sat, mon osi

mon bezwen rod sat. Be sa bann zafer si ou rode ou bezwen sonnyen. Ou pa kapab fer zanfan apre tap tou laport.

Zannimo domestik osi parey si nou rode, nou pa kapab prezan zis kit li dan labondans, parske i fer tapaz pou lezot vwazen.

Kot Saint Roch en madanm i anvoy mwan en mesaz la, i dir mwan Mr Arissol St Roch kot legliz i annan zis en sel vwazen ki annan lisyen. E li son lisyen i *disturb* tou vwazinaz dan St Roch. Mon sorti St Roch Mr Speaker mon antre Beau Belle.

Beau Belle i enteresan li, Beau Belle nou annan zis ne sel *disturbance* nou Beau Belle, Beau Belle nou annan zis en sel msye, sak fwa i bwar son bout bwar Mr Speaker i debout dwa semen piblik i zour Prezidan Larepublik son vant plen.

Ler i fini zour Prezidan Larepublik i zour *MNA* Elekte son vant plen. La i dir mwan mon vilenn, dernyenrer i dir poudir la ozordi mon annan larzan parske mon vann drog. Tousala i dir, parske ler in bwar son bwar, le i fer sa msye Speaker i zwe son lanmizik for e i *disturb* tou vwazen dan la kominote obor li.

Sa i bann tapaz ki nou bezwen arete, e ler mon pe dir sa la, mon kontan letan

Onorab Georges son dernyen bout Mosyon i koz an term Lalwa. I enportan pou met Mr Barbe koman Komisyoner, Mr Songor, Mr Dacambra, tou bann lezot zofisyé zot konpran sa bann sityasyon ki arive dan distrik pou zot zisteman pran aksyon.

Parske letan ou annan en soular, en dimoun ki pa responsab dan la kominote i pas son letan menas bann lapwentman konstitisyonnél parey Prezidan Larepublik. I en keksoz serye sa, i en dezord, e i en tapaz.

E sa bann dimoun i bezwen ganny *deal* avek Mr Speaker. Se sa ki Mosyon pe demande. I enportan pou nou montre respe. Si ou zour en lot dimoun, ou pe zour en lot dimoun, ki Prezidan ki ou vwazen ki ou ser sa osi i en mank respe.

Nou bezwen viv byen dan lakominote parey Mosyon Onorab Georges pe demande, parey nou tou nou'n koz lo la. Sa mon krwar i bann keksoz ki nou bezwen *deal* avek pou nou arete dan nou pei e pou nou pa kapab kontinyen soutire sa bann ensinifyan.

Me tapaz dan distrik Bel Ombre Mr Speaker, i annan psi sa ki konsern bann konstriksyon ki mon'n tann koz lo la. Ki napa ler komanse, napa ler fini. Spesyalman dan wikenn.

Nou annan nou bann garaz ilegal ki kontinyen fer tapaz akoz i pe *grind* son loto, i pe trenn en sa ki lev loto avek la ki fer en kantite tapaz li osi, i trenn sa depi Silhouette i anmenn ziska Anvil zis pour li met anba son loto, ok ?

I annan en biznesmenn in *call* mwan i dir mwan Lari Bazar, li in pey son *license*, i pey son *tax*, i annan son biznes. Be i pa tann son kliyan koze, parske parfwa ler bann lezot mizisyen santer i vini i met zot *speaker* lo *pavement*, zot zwe for e li i pa tann son kliyan dan laboutik. E li i ganny *disturb* konman en dimoun ki pey son *tax*.

Tousala i bann tapaz ki egziste Mr Speaker. E mon krwar i bann keksoz ki nou bezwen *deal* avek parey Mosyon pe dir. Me parkont sa ki nou, nou bezwen se ki nou bezwen ranforsi, pou fer sir ki Lalwa i an zour. Sesel i enn bann pei ki mon'n obzerve, mon fek pe dir avek Onorab Henrie obor mwan.

Nou annan en kantite Lalwa nou. Lasanble avan nou, Lasanble konmela, Lasanble apre, zis nou pas bann zoli Lalwa. Be lenplimantasyon Sesel i zwe en gran rol, en gran rol enplimant Lalwa, nou annan en kantite.

Me nou bezwen fer sir ki sa bann Lalwa i ganny *deal*

avek byen. Me tapaz dan distrik parey nou'n dir i en keksoz ki konsern nou ou. I konsern tou vwazen. I konsern Lotorite an zeneral. I konsern nou koman en kominote e i konsern nou koman en pei.

Me mon repeete parey mon'n komanse, Mosyon pa pe dir ki nou pa ganny drwa anmiz nou lekor. Mosyon a pe dir mon pa ganny drwa fer mon lanniverser, mon Premyer Konminyon, mon Lakonfirmasyon. Pa sa ki Mosyon pe dir.

Mosyon pe dir ki letan ou fer ou levennman la avek restriksyon *COVID* pa sipoze annan okenn levennman, ler ou pe fer ou levennman ou bezwen fer li byen, an mazinen ki i annan lezot ou vwazen ki reste obor ou.

Parfwa sa vwazen ki telefonn gard i fer vin kot ou, akoz ou pa'n envit li. Si i ti dan parti i ti pou dir "met ankor 2 ledan nou pa tande deor !" Me ler i pa la i telefonn gard i pe dir ou *disturb* li.

Sa i nou imen sa nou koumsa nou, ler li i pe met son dife ozordi ou pa telefonn gard ou, ler ou bril en kou ou salte li i telefonn gard. Akoz li ki i fer ek son salte, i met la lo bor miray, i veye ler gro lapli i tonbe i pran e i zet dan rigol.

Pou li sa i don fason netway son lakour. Be ler i met

dife li i telefonn gard. Sa i nou vwazen, sa i nou fason fer koman Seselwa. Me selman sa ki nou pe demande parey nou pe dir, anba nouveau fason fer, nou bezwen fer li byen.

Nou bezwen fer li avek Lalwa e nou bezwen nou koman bann Lezislater kontinyen edik nou pei, edik nou pep poudir sa fason fer nou pe fer la nou bezwen balans li, redres li pou nou kapab fer li byen.

Mr Speaker mon ava aret la parske i annan en kantite keksoz ki'n ganny dir. Mon ti a kontan felisit Onorab Georges parey in ganny dir en Mosyon brav, parske li i sorti dan distrik Mamelles, mon pa konnen si i pou kapab mont Mamelles tanto la.

Oubyen i ava esper semenn prosen letan keksoz i ava kalmi en pe. Akoz Mamelles i en distrik ki annan en, i napa bokou tapaz Mamelles, mon krwar zot annan en pti gin tapaz konpare ek lezot distrik zot.

Me Mamelles parey nou konnen i en zoli distrik, me selman Bel Ombre parey zot konnen nou osi nou en zoli distrik. Nou annan bann zoli dimoun dan distrik Bel Ombre.

Mon ti a kontan ki nou bann zoli dimoun pa bezwen al *Fairy Land* pou al fer tapaz dan lezot distrik, pa bezwen

Port Glaud pou al fer tapaz, nou kapab ale, parske nou annan nou drwa anba Konstitisyon pou nou mouvante, pou nou sirkile.

Be annou respekte bann distrik avek zot kominate ki toultour nou parey letan nou al Au Cap kot bann lans i aksesib, ki pa neseserman zoli parey lezot distrik.

Mr Speaker avek sa detrwa mo, mon ti a kontan remersye ou e mon pou donn Onorab Georges *full* sipor pou ou Mosyon. Mersi bokou Onorab Georges.

MR SPEAKER

Mersi Onorab. Bon nou a swiv par Onorab Andre. Annou sey mazin limit letan silvouple pou nou kapab terminen.

HON CLIFFORD ANDRE

Mersi Mr Speaker. Bonn apre midi tou Manm Onorab. Bonn apre midi tou dimoun ki a lekout. Mr Speaker sa Mosyon devan nou i enn ki tous tou kous sosyete, i tous tou distrik.

Mon krwar se sa akoz mazorite Manm pou koz lo la, akoz nou tou nou'n ganny bokou *calls*. Kot bann zabitan pe konplent swa tapaz masin koup zerb, swa tapaz loto dan en *carpark*, ouswa menm tapaz ki'n ganny fer an rezulta bann parti ou aktivite ki pe

ganny fer swa lo lans, swa dan lakaz li menm.

Mr Speaker mon dakor avek sa Mosyon, me selman mon annan serten konsern ki mon ti a kontan met devan.

Mon annan en let sorti, mon'n ganny *email* Mr Speaker le 30 Me ti ganny anvoye par en zennnonm. I tonm dan lasosyasyon, i di mon i en *administrative member of the local car audio community*.

Mr Speaker e sa zenn homme in dir mwan ki i konpran, mon mazinen kekfwa i annan lezot Manm osi in ganny sa *email* sorti kot sa garson, Mr Pillay, in dir mwan ki i konpran ki poudir i annan bann Lalwa ki an plas.

E sa zenn garson in osi dir mwan serten keksoz ki mon santi ki nou bezwen konsidere e Gouvernman i bezwen pran konsiderasyon sa bann eleman.

Sa zenn garson i dir mwan ki i pa dan drog, e in pran son lenvestisman, oubyen i annan en group manrmay ki kontan lanmizik loto, ki zot in pran zot lenvestisman zot in al envestir dan sa bann lekipman pou met dan zot loto.

E i annan bann zenn osi ki'n envestir dan fer bann, oubyen dan ouver bann laboutik ki anmenn sa bann lekipman pou sa bann zenn.

So sa i en keksoz pozitiv akoz i pe fer en kontribisyon dan lekonomi e zot pa pe al dan bann move lenfliyans ki annan.

Me ki li in dir mwan, se ki zot santi ki zot napa en lespas. Onorab Cosgrow in koz lo *coexistence of* bokou keksoz ki en Gouvernman i bezwen pran konsiderasyon.

Me zot, zot pe rod en lespas kot zot kapab ale zwe zot lanmizik, e lezot i kapab vini get sa enn dan sa loto ki i annan. Mon pa konn sa bann mark ki i annan so gete akoz sa enn i pli bon, sa enn i pli bon.

E fer zot bann pti diskisyon e an menm tan ki zot pe reflesir lo lavi e gete ki mannyer zot pou bouz devan e fer zot kontribisyon dan sosyete.

Mon dir sa Mr Speaker, akoz mon santi parfwa menm si nou dir ki poudir responsabilite en lot i komans kot enn in fini, me parfwa sa bann zenn i santi zot, zot pri akoz menm si zot anvi respekte drwa sa lot.

Me zot napa sa lespas ki pou permet zot responsableman al defoule, oubyen al zwe zot lanmizik oubyen al zwe zot lanmizik pou zot kapab gete kote zot kapab fer pli byen.

So i enportan menm letan nou pe dir sa, ki

Gouvernman nou konsider sa koegzistans ant responsabilite avek drwa ki en lot i annan.

Akoz nou pou toulstan annan en problem, si nou napa sa lespas oubyen nou pa rod sa *medium*, ki sa bann keksoz i kapab ganny fer.

Mr Speaker sa i enn lo lanmizik, tapaz, me mwan mon vreman konsernen letan mon tann bann loto ki'n ganny modife.

Bokou nou in koz lo la, en loto ki'n ganny modife e si i pe *overtake* ou par ler sa tapaz ki i fer oubyen sa mouse ki i mouse, ou menm ou sote ki ou ganny drwa fer en aksidan kan pa neseser.

So i enportan ki zot gete sa bann zenn manrmay, zot drwa i pou zot, zot loto i pou zot parey Onorab Arissol in dir, zot ganny drwa fer sa ki zot anvi avek zot loto.

Me selman zot bezwen pran konsiderasyon ki lo semen piblik i annan lezot dimoun. I annan manrmay ki pe aprann *drive*. I annan dimoun ki'n li, i annan madanm ki dan en loto. So zot bezwen pran sa responsabilite ki zot pa fer sa bann kalite modifikasyon ki koz serten problem.

I annan bann moter ki ennler i pase ou krwar pe tir fizi Mr Speaker i tape detrwa fwa e ou sote dan ou loto. So sa i kapab koz en sityasyon

kot parey mon'n dir en aksidan i arive.

I annan bann tapaz ankor Mr Speaker ki ganny fer kot lakaz, mon'n sibir sa, en keksoz ki'n arive avek mwan personnelman kot en fanmir ti pe fer en parti. Napa problemm parti i *ok* ou pe zwe ou lanmizik menm si in al apre 11er diswar napa problemm.

Me letan ou komans kriye dan sa *micro* ki vin en problemm. Ou pe sey repoze kot ou, ou pa fer souvan me selman sa zour letan i pe fer prezant sa kriye 2er bomaten prezant ou *dir ok*, silvouple be vin get en kou ki pe arive?

Lotorite vin get en kou, Lapolis vin get en kou, letan i arive Lapolis Mr Speaker, e la mon pou demann nouvo Komisyoner Lapolis pou edik ankor bann zofisyen Lapolis ki letan ou'n ganny lenformasyon, ki ou pa vin dir sa dimoun kote ou'n ganny lenformasyon, apre i kriy dan *microphone* aswar 2er bomaten pou ou tande tou.

So i bann keksoz Mr Speaker ki en pti pe pa efreyan, me selman sa Lotorite ki sipoze annan konfidansyalite i al anmenn sa sityasyon kot dimoun, prezant dimoun i kriye la i a kapab dormi aswar ek son fanm. Be non, i pa ki mannyer i devret ganny fer.

So sa i bann keksoz ki enportan. Mr Speaker mon ti a kontan dir ankor Anse Aux Pins nou annan bann problemm ki enorm. Lo Chetty Flat i en konsern tou bann zabitan ki reste laba.

E mwan dan sa konteks Mr speaker, akoz mon'n tous lo la, se akoz napa en zour ki mon pa ganny en mesaz, en *WhatsApp*, en telefon, en *text* ki pe dir mwan ki mannyer zot soufer. Mon konpran parey nou'n dir laliberte pou nou eksprim nou lekor, e nou konstitusyon parey nou'n dir i donn nou sa loportinite pou nou defoule, pou nou anmize.

Me selman lo en kominote kot i annan lezot dimoun, bann ki aze, bann ki zenn, bann ki *middleage*, bann ki pe al travay ki pe kontribye dan no lekonomi. I enportan ki letan nou zwe nou lanmizik oubyen, al zwe nou lanmizik en lot landrwa.

E si nou pe zwe lanmizik aswar dan en kominote kot i annan bokou dimoun ki pe al travay, bann ki aze i en problemm. Alors mon pou demann avek sa detrwa dimoun, oubyen sa group dimoun, ki fer sa kalite aktivite pou silvouple konsider a bann lezot zabitan ki reste lo Chetty Flat.

Bann ki al kot *playground* Anse Aux Pins e zot fer tapaz, ankor zot pa

neseserman dimoun Anse Aux Pins Mr Speaker. Parey in ganny dir kekfwa i sorti Bel Ombre, Anse Royale apre zot al kot zot kanmarad.

Me antretan ler zot pe ale sorti Bel Ombre pou al Anse Royale zot pas Anse Aux Pins zot arete, zot fer serten aktivite ki koz tapaz pou bann dimoun ki la.

E sa i ganny fer dan bann ler kot dimoun i sipoze pe dormi, i annan *curfew* 11er. Be selman still apre 11er diswar Mr Speaker i annan tapaz ki pe ganny fer lo *carpark*, kot *Reef Golf Club* ankor mon'n ganny enformen ki i annan bann aktivite ki pase - endesan si oule, ki si anmenn tapaz.

Nou'n tann Onorab Bistoquet ki'n dir nou bann diferan kalite tapaz ki annan. Me i annan serten sa bann tapaz ki ganny pratike lo *carpark* kot *Reef Golf Club*, e i neseser ki Lotorite i pran bann aksyon ki apropriye, pou fer ki sa bann kalite aktivite i ganny diminyen.

Mon pe fini Mr Speaker mon konnen petet i annan lezot pou koze. Me selman mon pa pou rat sa sans pou mwan dir i annan bann dimoun aze, zot bann zenn fiy in vin kot mwan, i dir mwan zot manman pa kapab dormi, i malad e i annan tapaz lisyen dan vwazinaz.

Mon konnen nou'n pas en Lalwa lo pou *regulate* bann ownership of lisyen dan nou Lasanble. Me i enportan pou sa Lalwa ganny aplike e ki bann dimoun osi ki annan zannimo nou tou nou konnen nou pou bezwen annan lisyen, pou protez nou propriete par ler.

Me selman annou fer li dan en fason ki soutenab e ki i pa pe *disturb* sa bann dimoun ki aze, ki pa kapab repoze e zot tansyon i kontinyelman monte, e ki zot bezwen annan, zot vin en *strain* lo nou sistem lasante.

Mr Speaker avek sa detrwa mo mon ti a kontan dir avek loter Mosyon, mon'n dir taler ki mon enn pti pe konsernen, pa konsernen, me selman soke ki en ansyen *DJ* parey Onorab Arissol in dir, kot tapaz kekfwa ti enn son bann nesesite dan lepase ler i ti en premye *DJ* Katyolo.

Annefe Katyolo i Anse Aux Pins, i ankor enn bann *disco* pli renonmen ki i annan Sesel. Me selman la akoz *COVID* nou pa kapab pratik sa, li osi i en landrwa kot i bezwen ganny reformen pour ki tapaz kekfwa pa al dan vwazinaz, pou fer serten *disturbance* ki annan serten dimoun ki konplent.

Avek sa detrwa mo Mr Speaker mon oule reasir loter

Mosyon ki mon pou donn mon full sipor sa Mosyon.

Me selman nou bezwen osi dir avek Gouvernman ki i annan bann mezir oubyen bann facilite ki li osi i bezwen met an plas, pour fer ki bann aktivite tapaz i ganny *regulate* tre byen dan satisfaksyon tou lede parti ki konsernen. Avek sa mon oule remersi ou Mr Speaker.

MR SPEAKER

Mersi Onorab. Onorab Aglae.

HON EGBERT AGLAE

Mersi Mr Speaker. Bonn apre midi tou Manm Onorab e tou dimoun ki a lekout.

Mr Speaker dabor mon ti a kontan remersye Onorab Sandy Arissol pou edik son zabitant Bel Ombre pou zot pa tro vin *disturb* bann dimoun Port Glaud dan wikkenn laba Port Launay. E vis versa mon ti a dir bann zabitant Port Glaud osi pou pa al *disturb* zabitant bel Ombre kot bazar Bel Ombre laba silvouple.

Mr Speaker si mon pou rann zistik a sa Mosyon ki Onorab Georges in met devan ozordi, i annan en eleman petet ki mon ti a kontan azoute. I annan 3 laspe fondamental dan sa Mosyon ki pe refer sorti. Premyerman se; enn respekte lezot dan vwazinaz, dezyenm i koz lo

Lalwa e trwazyenm ranforsi lord ek lape.

E mwan si mon ti pou azout katriyem se sa bout responsabilite. Mr Speaker mon dir sa akoz parey Prezidan ti koze yer ladres pou Lendepandans, nasyonal in fer mansyon pou nou vin pli responsab.

Avan mon abord size li menm li Mr Speaker, mon krwar i enportan pou nou piblik osi konpran ler nou pe koz lo tapaz, kwa sa tapaz, kisia tapaz, ki mannyer ou defini tapaz.

Akoz i annan diferan form ki nou kapab dir en tapaz. Par egzanp en lakle i kapab sorti dan mon lanmen i tonm, ater i fer en tapaz, e eski sa i ale sa tapaz ki nou pe koz lo la ki annwiyan?

So Mr Speaker baze lo sa, lorganizasyon enternasyonal in mansyonnen poudir sa ki zot apel *noise pollution*, se ki bann tapaz ki ganny kalibre ouswa ki ganny mezire ki par lao, komans par lao 65 *decibel*.

E i in pli pertinan ouswa en pti pe pli danzere ler i mont 75 e pli fermal i dir ou kot ou laba ou kapab osi perdi ou sans tande le i sot 120 *decibel*.

E parkont, Mr speaker mon ti a kontan dir avek Onorab Labonte poudir nou annan enn sa lekipman ki mezir *decibel* Sesel e sa i kot Minister Lanvironnman, ki

mon santi ti devret dan lanmen en lafors ki enplimant Lalwa e sa se Lapolis.

Mr Speaker diferan kalite tapaz i ganny koze par diferan kalite aktivite. Bann *main* konsern bann aktivite ki nou souvandfwa pe fer fas avek sa i tapaz ki relye avek trafik, i annan tapaz aeryen.

Mon siport mon koleg Onorab Gabriel ki enn son distrik Pointe Larue ki pe sibir mon krwar plis tapaz.

E si ti annan en konpansasyon mon krwar ti devret al kot zabitan Pointe Larue akoz *Airport* i koz zot, *quarry* i kot zot, *processor quarry* laba kot i fer makadanm i kot zot menm.

Zot annan langar *helicopter* tousala Mr Speaker i Pointe Larue e par sarz mon mo pou zot kontinyen bann zabitan Pointe Larue, malgre zot pe viv dan tapaz.

Mr speaker nou osi nou annan tapaz lie avek bann fakter konstriksyon. Nou annan ki relye avek bann aktivite lwazir parey bann *catering*, bann *night life*, bann fasilite *entertainment*, e osi i annan tapaz ki relye avek zannimo.

Me Mr Speaker Lefe ki nou, nou pe koz lo tapaz nou pa anvi zis koz lo tapaz. I akoz i anmenn avek li serten konsekans lo lasante imen. Premyerman tapaz pou sibir

konstaman regilyerman lo en baz lentalval kontinyel i kapab annan lefe lo ou abilite fizik.

I kapab, in montre poudir i annan azitasyon dan ou sistem respiratwar, ou tansyon ou *BP* i monte, ou ganny latet fermal, e souvandfwa osi i annan posibilite ki i annan serten dimoun i kapab ganny latak leker.

I osi annan son lefe lo nou lasante psikolozik, kot ou devlop bann *stress*, ou devlop lafatig e parfwa osi ou devlop sa ki nou apel bann *anxiety* bann enkyetid en sanzman dan ou latitud osi akoz ou pe, ou pa pe ganny sa repo, ouswa sa trankilate ki ou merite apre ki ou'n fer serten aktivite ou menm.

E osi i anmenn serten lefe lo ou lekor. Par egzanp sa abilite pou ou dormi byen sirtou kot i annan bann aktivite ki deroul aswar, kot ou souvandfwa tapaz pe anpes ou ganny sa sonmey ki ou neseser.

E i montre ou poudir dan lannwit en dimoun pou li kapab at least pran en bon repo i bezwen *at least* zwir si i annan en tapaz i bezwen anba 40 *decibel*.

Me eski sa i lefe ki nou ou nou pe fer fas avek? I annan dimoun pe dormi li byen dan son konfor pa pe ganny *disturb* ek okenn tapaz. Me parkont

zeografikman ouswa ekolozikman kot en dimoun i reste i kapab pe sibir li bann diferan tapaz.

E tousala Mr Speaker, i ban eleman ki mo krwar nou bezwen pran li a zour me osi nou bezwen osi annan en balans ler nou pe pran sa size. Akoz nou pa kapab azir zis en kote pou blanm zis en kote, san ki nou osi aport serten solisyon ki neseser pou nou kapab dir be la nou'n *struck the right balance*.

Mr Speaker mon dir sa premyerman, bokou lanfaz in ganny mete avek lanfaz trafik sirtou bann dimoun ki pe modifie loto. Me mon osi mon'n koz ek serten bann dimoun ki dan sa laliny, me zot met zot serten pwen devan, akoz i pa zis zenn ki fer sa bann aktivite modifikasyon ni annan adilt osi ki ladan.

E zot in fer resorti poudir i vre ki parfwa i annan ki azir irresponsab, ki ler zot in fer zot modifikasyon zot oule fer serten kalite *show-off* partou e la zot antre dan la kominate e zot komans fer tapaz bomaten, apre midi e aswar sirtou pandan wikenn.

Me dan lot kote i annan serten group lantouzyazm ki zot, zot annan sa responsabilite ki zot pe demande ki zot annan en transpor ki modifie e zot ti a kontan annan en landrwa

apropriye, pou zot kapab fer zot aktivite e ki zot pare pou zwenn ansanm.

Mon krwar sa i en solisyon ki nou bezwen aport zot e Gouvernman i bezwen ekoute, pour ki sa bann dimoun i kapab ganny en landrwa kot zot a vann zot keksoz zot menm, pa larzan *taxpayers money*, zis donn zot en alokasyon m, en landrwa e la zot ava fer zot bann, - rod zot reveni lo lafason ki zot kapab *at least* annan en landrwa.

Akoz zot ler i di ou wikenn zot a kapab ouver zot lanmizik ki mannyer zot oule, zot kapab *rev* zot *silencer* mannyer zot oule san *disturb* okenn kominate.

Mr Speaker osi sa problem tapaz i en problem enterzenerasyonnel mon kapab dir. Akoz mon dir sa? Akoz i annan diferan kou saz diferan kous zenerasyon ki sirtou ler ou ankor zenn, ou ankor vibran, ou ankor annan sa lafors, ou ankor annan sa lenerzi pou ou anmize bomaten ziska granmaten.

E ou, ou santi poudir ou kapab ale. Me solman i annan en group dan milye ki li in dir be mwan mon'n arete ek sa bann zafer, mon'n sirmont sa, mon'n pas ladan. E mon krwar la in ler pou mon donn en lape, mon anvi repoze.

E apre i annan en lot zenerasyon ki li i dir be mwan mon pa anvi tann okenn tapaz akoz laz ki mon'n arive mon krwar mon nesesit annan en repo anpe zis ka lwe mon dernyen zour.

So nou bezwen pran kont sa ban diferan gap dan laz ki egziste, pou fer ki nou anmenn lazistis dan sa zafer tapaz. E osi tradisyonnelman Mr Speaker, koutim Seselwa dan en sans sirtou parey dan Sanmdi bokou zot ti kontan zwe zot lanmizik ler zot pe netway lakaz. Malgre lakaz pa ti tro pre ek kanmarad.

Me sityasyon lozman in sanze. Ozordi i annan bokou *flat* ki fer ki sa balans nou pa kapab anmennen ozordi, ki tou le Sanmdi si nou al Perseverance, tou dimoun i deside netway son lakaz, i ouver son lanmizik. Byensir Onorab Bastienne pa pou ganny en lape laba i pou bezwen pe entervenir.

So kot nou pe arive avek revolisyon lavi, mon krwar nou bezwen anmenn sa balans lo lafason e nou tou nou bezwen *être* realistik. Sa ki ou ti fer 15an, 20an pase i pa neseserman pou marse ozordi, i pa pou neseserman dan lavantaz ozordi.

So nou bezwen annan sa bon zizman nou menm. Mr Speaker i annan tapaz osi ki pe relye avek devlopman, e ler

mon koz devlopman byensir pei i ptipi.

Sesel nou napa ase later e tou ou bann devlopman pou bezwen obor kanmarad a lavenir parey ler nou get dan rezyon nor, rezyon santral lakaz i enn lo lot, bann batiman i enn lo lot. Konpare vek dan lakanpanny dan sid was.

Me selman nou pe war poudir devlopman pe bouz ver dan sid, dan sid was nou pou war poudir prezan sa *density* pou redwir, e lakaz pou obor kanmarad. E i pou fasil pou enn konplent selman si i annan okenn *disturbance*.

Me pour mwan sa ki enportan Mr Speaker, i annan serten analiz ki nou bezwen pran ki an kont ki enportan se lo en baz komersyal ler nou pe fer nou devlopman.

Si i annan serten dimoun ki ti pe fer son aktivite plis ki 15an, 20an pase e ou. Ou'n vii ozordi ou'n aste sa bout later obor li, prezan ou war poudir sa aktivite ki sa dimoun pe fer i vin, i pe *disturb* ou, mon krwar la in bezwen annan sa balans kot nou bezwen koze, nou bezwen diskite avek Lotorite.

Si ou ti pe plante ouswa ou ti pe sonny zannimo e ou'n vini ou'n deside vin fer en pti lotel en pti restoran obor mwan byensir pou annan serten konsekans e la nou pou

komans mont lo lipye kanmarad. So i bezwen annan sa bann refleksyon.

E Lotorite *Planning* osi ler nou pe fer *land use plan* mon krwar i enportan pou nou desifre sa bann keksoz san anpeste. Akoz ou annan, akoz parey nou'n pas Lalwa *Right to Property* nou koz lo la dan *Civil Code* san ki nou *infringe* lo drwa en dimoun zour i son propriete i 100poursan. So i bann refleksyon osi ki nou bezwen anmennen pou nou kapab,

Mr Speaker lo tapaz ankor i annan sa lot ki apel *public nwizans*. Mon krwar sa i enportan, sirtou ler i arriv lafen di mwan, nou ganny peye, sa ki groupe dan bann *spots* kot zot *park* e la ou war poudir ler in tap 2 lefe in mont dan latet.

E la nou *get overboard* nou ouver lanmizik ouswa nou komans sa ki pe zoure pou zoure, sa ki pou ensilte. Sa bann keksoz koumsa, mon krwar nou bezwen koman en pep vin pli responsab, nou pa pou kapab akoz i pe anvoy en move limaz sirtou lo lakominote.

E ler tranze i pase i p war nou pe fer sa bann kalite aksyon koumsa i pou get nou dan en lot fason. So nou bezwen kapab si nou'n bwar nou bwar *être responsab*. E parey sa ka lantouzyazm ki ti

koz ek mwan, ler lefe i mont dan latet lanmizik sa ki si ou ti abitye ouver lo 10 ou pa tro tann li zot bezwen ouver li lo 20.

I bann kalite rezonnman mon krwar ki nou bezwen gete e elabor lo la. Mr Speaker pou konklir....

MR SPEAKER

Onorab ou pe al en pe long la.
Mersi.

HON EGBERT AGLAE

Mon pe *wrap-up* Mr Speaker.

MR SPEAKER

Ok.

HON EGBERT AGLAE

Pou konklir, mon krwar i enportan ki si nou anvi en kominote ki an bonn, viv an bonn sante, ki an bonn sante kot nou kapab pas bann legzanp. Pa nou tou ki ganny privilegez pou reste lo montanny avek en gro kare later i annan ki bezwen reste dan flat, later i limite.

Me sa ki enportan se pa kot ou pe reste, se ki mannyer ou konport ou dan sa lanvironnman kot ou pe reste vizavi avek ou vwazen, ou vwazin ki dan sa kominote. Mon krwar nou tou nou bezwen kanmarad a en pwen dan lavi.

So si nou konnen nou annan nou gro lanmizik, si

nou anvi sonny nou zannimo, si ou konnen ou zanfan, ou pti zanfan i anvi vin en santer, ou anvi rod en *set lanmizik*, en *set drum*, gitar *amplifier*. I annan son moman apropriye ek son landrwa apropriye.

Ou pa kapab depi sanmdi bomaten 8er ziska 2er bomaten ou leve, ouver ou lanmizik, ou fer tapaz. Ou pa kapab ou, ou menm si ou en kontrakter oule sirtou Sanmdi kot tou dimoun i la kot lakaz, ou pou oule komans galere, ou pou le komans kloute, oule komans sye bomaten ziska aswar. I pa apropriye.

Si ou annan en konstriksyon pou ou fer, zi ou fer li, fer li dan lazournen, me ler i ariv 6er diswar mon krwar i rezonnab poudir be la mon bezwen arete.

I menm parey osi pou bann motoris bann ki pe modifie zot transpor annou konsyan poudir nou pa touse lo semen.

I annan dimoun ki annan problemm lasante, i annan zanfan ki annan serten dezabilite zot bezwen annan serten trankilite.

I annan dimoun i malad avek tapaz, e tansyon i pa en zwe, e si ou pe ganny sibzektif konstaman avek bann tapaz enorm byensir i en danze pou lasante nou tou.

Avek sa Mr Speaker mon krwar ki mon pou siport sa

Mosyon. Me selman nou bezwen osi aport serten solisyon. Par egzanp Mr Speaker i annan bann solisyon ki bann pei in anmennen par egzanp avek ...

MR SPEAKER

Ou ti pe konklir non?

HON EGBERT AGLAE

... wi Mr Speaker mon pe konklir mon pe zis elabor en pti keksoz enportan la, par egzanp lentrodiksyon bann veikil ibrid elektrik, sa i ede redwir tapaz.

Ozordi avek modernizasyon i annan bann *noise insulator* ki nou kapab mete dan bann *buildings*, i ganny servi. Gouvernman dan serten pei in adopte bann landrwa ki in mark *noise free zone* pou rezon lanvironnman, in *earmarked*.

So tousala i bann keksoz ki enportan e osi Mr Speaker fodre i annan en *leisure* rea pou nou bann zenn al defoule. Tou kou napa, tou kou nou pou war dan bann pti trou pou park pou fer tapaz. Mersi Mr Speaker.

(APPLAUSE)

MR SPEAKER

Mersi. Onorab Loizeau e o Onorab Letourdie a swiv.

HON NORBERT LOIZEAU

Mersi Mr Speaker. Bonzour tou Manm. Bonzour tou dimoun a lekout. Mr Speaker, sa Mosyon anmennen par Onorab Georges i en Mosyon tre byen, malgre i annan en pti dezavantaz pou bann ki pa kontan lord. Parey Onorab *Leader Lopozisyon* taler ti dir, sa Mosyon pou nou koman bann *Leaders* politik i bon, me osi i kapab kout nou en pti pe ser. I kapab fer nou perdi en pe popilarite, i kapab fer nou perdi en pe sipor.

Me mwan mon konnen ki Onorab Georges in vin avek sa Mosyon a bonn fwa. Akoz Onorab Georges li se pa sipor ki i pe rode, se en meyer lavi pou tou dimoun, pa zis pou en serten e sa i enportan.

Mr Speaker, ler mon'n ekout tou bann dimoun koze, mon ti annan serten pwen mon'n bezwen met dekote. E pwen ki mon vwar zot in *stress* plis lo la se, lo bann tapaz lo bann *housing estate*, Mr Speaker.

Ler mon'n ekout serten koze Mr Speaker, i fer mwan rapel ti annan en letan dan mon lavi mon ti frekant Roche Caiman. Mon ti annan enn mon zanmi, mon *partner* ki nou ti dan biznes, son madanm ti reste Roche Caiman. Alors mon ti bezwen laba, pou vin sers li pou al travay.

Me son madanm dan son zalantour Mr Speaker, zis li ki ti siport Lopozisyon sa letan e tou son vwazen, ozordi in sanz en pe. Tou son vwazen ti lot kote e li i pa ti kapab koze li. Nou tou nou konn li, Larenn Karya, zot ti dir li Larenn Karya.

Parfwa Mr Speaker, sa pwa lanmizik ki pe zwe sak kote, zis pou gognard li akoz li i siport en lot fason. Mon pa pe fer politik, zis mon pe koz keksoz ki'n arive. Ti enkrwayab.

Ti arive parfwa ki dan *week nd* mon ti bezwen vini vin sers son imsyé ek li, ek son zanfan. Bouze al Bel Air akoz i ti pe ganny tro bokou, Mr Speaker. E ler mon la Mr Speaker, i fer mon mazin bann *housing estate* dan mon distrik Bel Air. Nou pa'n ganny eparnye ek sa nou Mr Speaker.

Dan nou bann *housing estate* dan nou distrik Bel Air i enkrwayab, Mr Speaker. Ozordi, taler mon'n tann Onorab Georges dir ki i annan Lalwa ki dirize pou bann dimoun ki dan Gouvernman, si zot fer serten nwizans, ki kapab *deal* ek zot.

Mr Speaker, dan flat Bel Eau, i annan en ou imsyé i travay dan Gouvernman, i annan en *flat* ki en dimoun i les zot vini, son zanmi. Zot fer tousort kalite dezord

weekend. Sa pli gro latet ki annan Sesel zot donn Mr Ramkalawan, Mr Speaker. Napa kalite maltrete ki zot pa maltrete.

E dimoun lo flat e la mon ganny en *text* mon'n avoy kot Onorab Arissol, en dimoun in *text* mwan in dir mwan "Onorab *please* mansyonn sa nou'n ganny ase!" E ler mon pou sorti laba Bel Eau Mr Speaker, i fer mwan mazin anba Stevenson *Delhomme* Road, kot ti annan en moman ti annan en zofisyel lapolis, li i zwe son lanmizik. Anler kot mon reste, kot Pa Sinon, nou tande.

E ler i *disturb* dimoun. Dimoun i telefond mwan. Nou telefond gard, ler gard i monte lanmizik i bese, ler gard i ale lanmizik i re vin ankor. E pou mwan sa Mr Speaker, i annan dimoun i kapab ankoler, ler ou pe *disturb* sa vwazen, ou pe *disturb* mwan *MNA*.

Akoz mwan ler mon pe dormi 1er bomaten, 2er bomaten kot mwan. Mon telefond i sonnen, aprezan nou *MNA*, zot kapab *call* nou nenport ler. Si nou pa pran zot ankoler. 3er, 4er bomaten nou bezwen leve pran telefond pou nou kapab *deal* en *issue* kot serten pe fer tapaz.

E la Mr Speaker, permet mwan al lo en lot pwen. Mon'n tann Onorab Aglae in koz lo *Planning Authority*. Dapre

konpran i annan en landrwa Nouvelle Vallée i annan en etranze ki'n aste en later, li i annan en *discothèque*. En *discothèque* dan son *bassement*, i zwe lanmizik dimoun *Nouvelle Vallée* mon tande in ganny ase.

Ziska dernyenrer ler dimoun i konplent, mon tande i annan konpansasyon in peye, i oule aste landrwa sa dimoun ankor, zis pou li kapab fer son tapaz. Mon demande *Planning Authority*, ler sa dimoun ti pe vin reste la, ti napa lo son plan *comme quoi* pou annan en *discothèque* dan bafon ki pou *disturb* dimoun?

Mr Speaker, tousala se bann keksoz ki nou bezwen revwar. E ler mon get tousala Mr Speaker, i montre nou ki dan lepase in annan en dezord total, en dezord total dan nou pei.

E la permet mwan fer zot konpran ki rezon ki mwan ek tou lezot dimoun Bel Air ti pare pou vin fer sa sanzman Gouvernman?

Nou ti anvi fer sa sanzman Gouvernman pou nouvo kapab vin met en pe lord dan en dezord ki ti annan. Me avek sa Mr Speaker, nou koman bann politisyen, mwan koman *MNA* distrik Bel Air, mon ganny kritike pou sa. Mon a eksplik ou akoz.

Mr Speaker, dernyen fwa ler Komisyoner Lapolis ti vini,

mwan mon ti dir avek Komisyoner Lapolis *comme quoi* i annan en laboutik obor lekol Belonie ki pe vann bwar 6er bomaten, avan ler e apre ler. Mr Speaker, ti annan dimoun, ti annan menm dimoun ki'n akonpannyen mwan dan sa lager pou nou fer sa sanzman, pou met lord dan en dezord ki ti annan, zot ankoler ek mwan, Mr Speaker.

San pran an kont Mr Speaker, ki lenkonvenyans sa pe anmennen pou serten dimoun lo serten blok flat anba Roch Lane.

La aktyelman mon'n ganny en *text* ki en madam in *call* mwan in dir mwan i bezwen telefonn gard, i annan dezord anba Roch Lane. E dezord Roch Lane Mr Speaker, i en dezord ki i annan en group dimoun ki fer. Ozordi si en dimoun anba Roch Lane i *call* lapolis, i annan serten dimoun i vini, Mr Speaker, mon annan portre ki en lot dimoun dan en lot *flat* in tire, kot i pe vini, i pe ekri lo miray, "aret *call* gard tel soz." Mr Speaker.

Mon pa pou dir, i vilenn ki in ekrir lo sa miray. Mon'n anvoy portre Kordgard. Ziska ozordi naryen pa ankor arive.

Sa bann dimoun pe martiriz. Mr Speaker, *weekend* 1er, 2er bomaten Mr Speaker, mon ganny *call* e ler sa bann dimoun pe enteronp sa bann dimoun, i pe enteronp

mwan osi ki pe sey rod en pti repo, Mr Speaker. Akoz 1er, 2er bomaten ou pe ganny en *call*. E la mon anvi Mr Speaker, ki Lotorite i tann nou.

Ki bann zofisye Lapolis si pran zot responsabilite. I annan menm zofisye lapolis Mr Speaker, ki partisip dan sa bann zafer e ler dimoun i *call* gard, vi ki ou ki reste le dan sa *estate*, gard i *call* ou vi ki ou en zofisye lapolis.

I dir ou, entel mon tande i annan tel keksoz pe arive la anba. Eski i vre? Li ki la li osi pe fer ansanm, i dir non. Gard pa monte.

Mr Speaker, tousala pe arive. Pli boner Onorab George in dir ki i annan en ta lalwa ki egziste pou plis, en bann letan passe. In koz Lalwa Lanmizik, 11er i sipoze fini, arete. Si mon byen. Pandan *week end*, konze piblik, ou pa sipoze pe fer bann travay, bann travay ki *disturb* dimoun.

Ozordi Mr Speaker, eski sa bann dimoun ki pe fer sa zot konnen i annan sa? Zot pa konnen. E nou ki nou fer koman bann Lotorite pou fer zot konnen ki sa i mal ki zot pe fer?

Akoz i annan bokou sa bann dimoun Mr Speaker, zot pa get televizyon, zot pa swiv Lasanble, zot pa get nouvel. Zot obor semen. Pourtan i

annan 7er bomaten i obor semen pe vin tap laboutik pou ganny en bout bwar ouswa pe tramp pou en bout drog.

Kan 7er bomaten zom i sipoze pe al dan en lanplwa. E ler nou koman bann Lezislater nou vini nou dir zot. Zot dir nou, nou pe ensilte zot. Mr Speaker, mwan mon ganny sa. Mwan mon ganny sa.

E lo bann *estate*. Onorab Henrie in fer sorti en keksoz, me selman ler i annan en fot ki in fer, in dir mwan rektifye sa. Ler i ti pe koz i ti dir i pa pou koz lo lakominote, me plito i pou koz lo bann *public servant*. Bann dimoun dan *public service*, kan sa bann dimoun dan *public service* zot reste dan kominote. In dir mwan fer sa koreksyon.

E parfwa zot telman byen avek sa bann dimoun dan sa kominote ki zot pa dir naryen, akoz souvandfwa parfwa zot osi zot dan sa parti. Zot osi zot dan sa parti. Welele pe ganny fer, zot pa dir naryen.

I enportan ki nou pran nou responsabilite. Prezidan Larepublik ler i ti pran labar i ti *stress* lo la. I ti dir ki nou tou nou bezwen pran nou responsabilite. Si mwan mon reste dan en blok *flat*, i annan en dimoun i *disturbed* nou. Nou tou ki reste dan sa blok *flat* nou merit vin dir li e ou ape *disturb* nou. Mr Speaker, personn pa dir naryen.

Zot oule toultan Gouvernman fer en keksoz. Zot osi koman en kominote zwenn ansanm. Zwenn ansanm, vini, koz ek sa dimoun, di li nou pa *happy* ki ou pe fer, nou osi nou reste la.

Mr Speaker. Nou'n koz lo groupman.

MR SPEAKER

Onorab ou kapab pa al tro long *please*. Nou bezwen.

HON NORBERT LOIZEAU

Ok. Mr Speaker, de dernyen pti pwen. Nou'n koz lo groupman. Nou kunnen groupman ler i annan groupman i annan en pe tapaz.

Dan mon distrik i annan groupman Mr Speaker e mwan ou krwar mon pa ti a kontan dan sa bann groupman mon osi. Mon osi mon *enjoy* sa Mr Speaker. Dan letan eleksyon nou'n dan groupman, nou ti bwar, nou'n *enjoy*. Mon en dimoun ki abitye. Apre nou *match basketball* nou vin lo *court*, nou fer en pti groupman.

Me selman la in dir nou, nou pa kapab fer groupman. E mwan koman sa dimoun ki *MNA Bel Air* mon pa kapab ganny trouve dan en groupman. Kan nou Gouvernman in dir nou, nou lasante in dir nou, nou pa kapab fer groupman.

Alors mon pase ki sa bann dimoun zot konpran, pou annan ase letan pou nou fer groupman. La annou reste se nou pou nou kapab *deal* ek sa pandemik.

Mr Speaker, lanmizik dan loto. Ti annan en moman dan sizyem Lasanble *Leader Gouvernman* sa letan ti annan en zafer i ti pe fer konsernen sa bann dimoun pou ganny en landrwa pou zot kapab ale, fer zot *car show*. Kree zot *trail* kot zot pou fer zot *speeding*, zot konpetisyon, pti graden.

Me la mwan mon pe enplor avek *Gouvernman* si nou kapab aske zot pou zot kapab annan zot landrwa pou fer zot zafer, ki en fason ler zot vin lo semen, nou ava *deal* ek zot ler zot lo semen, Lotorite konsernen, Lapolis a *deal* ek zot.

Mr Speaker, mon pa pou kapab san koz lo lisyen. Ozordi dan mon distrik nou annan en problem lisyen eran parey serten in dir. I ansan dimoun i rod en lisyen, lisyen i ganny piti, i kit dan semen.

Ozordi kot Bel Air Store premye dimoun ki ou vvar 2 lisyen ki dir ou bonzour avan ou antre devan laport. Dan peron pou mont anler kot nou dir Dan Rousay, dimoun aswar nepli kapab monte. Pou ki sa bann lisyen, mon pa konnen.

I annan en madam, madanm Savy i malad akote, madanm Rita Savy. Ki ti osi en Manm, premye Manm Fanm Lasanble dan Sesel, i pa tro byen. I pa kapab repoze ek sa bann lisyen, i pa kapab asiz lo *bus stop*. Lisyen 7er in fini pran kar lo *bus stop* dimoun i pe pou asiz lo la pangar zot a ganny en pis ek zot *or*. Mr Speaker, tousala se bann keksoz ki bezwen ganny gete.

Lo kote piknik. Mr Speaker, piknik lontan nou ti al piknik ti napa lanmizik. Lontan nou ti al piknik an fanmir, nou ti manze, bwar. Ozordi si ou napa en *DJ* ou piknik pa gou.

I bezwen annan en *DJ*, piknik pa fini 6er. Piknik i fini minwi. Tousala se bann keksoz ki nou bezwen vin gete. Lanmenm ler i enteronp bonn vwazen akonte.

Mr Speaker, dernyen mon anvi dir avek Onorab Audrey Vidot, in fer en deklarasyon avek *Leader Gouvernman*, ki i pe enplor li koman *Leader Gouvernman* ki annan lavwa sa *Gouvernman* nef pou fer sir ki sa *Gouvernman* i met bann Lalwa pou nou kapab *deal* ek sa bann sityasyon.

Mon anvi dir li wi, mon siport li pou nou fer sa akoz sa bann Lalwa depi lontan i ti merit an plas sa bann Lalwa, me selman nou'n annan en

Gouvernman ki'n napa sa volonte pou fer. Senpleman akoz pangar nou a perdi en pe sipor isi.

Me nou sa Gouvernman ki la nou pa pe mazin perdi sipor dan okenn landrwa nou. Nou, nou pe mazin, akoz dan nou kanpanny eleksyon nou ti dir ki Sesel i bezwen ganny dirize *according to the rule of law*. E nou koman en Lasanble lo nou kote e koman sa novo Gouvernman ki ganny dirize par Mr Ramkalawan, nou pou fer sir ki Sesel i ganny *rule according to the rule of law*. Mersi Mr Speaker.

(APPLAUSE)

MR SPEAKER

Onorab Letourdie. Eskiz mwan dernyen entervenan pou Onorab Samynadin. Sorry ki ou'n tonm dernyen ozordi.

HON JANY LETOURDIE

Mersi Mr Speaker. Bonn apre midi tou dimoun.

MR SPEAKER

Annou sey pa al tro long silvouple. Ok, Mersi.

HON JANY LETOURDIE

Mon a sey fer vit Mr Speaker. Mr Speaker, o komansman *Dieu* ti kree lesyel ek later. Lizour ek aswar. Later ti zis en

landrwa *vast* koumsanmenm e i ti vid. Avek ou permisyon Mr Speaker, eski mon kapab demann bann Onorab, sey mazinen sa kalite trankilite ki ti egziste ? Mr Speaker, manke ti fer per sa kalite trankilite.

Dieu ti kontinyen avek son bann kreasyon, delo dou, delo sale, zARB, plant, zannimo e a lafen i ti kree zom ek fanm. I ti donn zot lentelizans e dominasyon lo tou bann kreasyon lesyel, later e lanmer.

A la la Mr Speaker, depi sa zour trankilite ti pou ganny menase. E se pour sa rezon ki ozordi zour Onorab *LGB* i bezwen anmenn en Mosyon pou dir be zot annou tenir en kou. Nou pe al en pe tro lwen, nou pe fer ditor nou lekor, nou lanvironnman avek nou prosen.

Sa Mosyon Mr Speaker, i senpleman pe demann nou pou pran konsyans lo nou ban fason fer, swa par ekspre oubyen enkonsyanman ki dezagreab e alors pou fer en zefor pou nou amelyore.

Mr Speaker, nou konnen i enposib pou elimin bann son naturel, akoz i form parti nou lavi toulezour. Laklos lekol i bezwen sonnen, laklos Lasanble osi. O kontrer Mr Speaker, nou a deside ki pou fer avek sa laklos. I bezwen sonnen. Avyon i bezwen leve,

apoze. Lo semen transpor i bezwen sirkile, bann lizin i bezwen fonksyonnen. Lanmizik i bezwen ganny zwe e dimoun e zannimo i bezwen elve zot lavwa pou zot kapab eksprim zot lekor, eksetera, eksetera.

E alors la nou tonm dakor ki tapaz i en son. Be kan ki i vin tapaz Mr Speaker? I vin tapaz letan sa bann son i an ekse, i tro for, i enteropan. I annwiyan oubyen iritan ziska en dimoun i vin enkonfortab.

Plizyer lefe negativ i kapab arive akoz tapaz, e sa i enpakte plizyer milyon dimoun toulezour.

Mr Speaker, i annan sa *quote* ki dir pou determin labote i depan lo sa lizye ki pe gete. Nou kapab dir sa osi pou tapaz. Akoz par egzanp Mr Speaker, mwan koman en dimoun ki kontan lanmizik, mon lanmizik *hard rock* i kapab *ok* avek mwan. E sirtou pli ou ekout li pli for, pli i pli gou.

Onorab Georges mon konnen ou pa pou tro *mind* pou ekoute, me tandis ki ou Mr Speaker, mon pans pa ki si ou pou kontan. En lot legzanp ankor Mr Speaker, pou serten dimoun ki reste obor *Airport* oubyen obor laliny blan en *highway* parey kot mwan mon reste, i kapab pa en problem pou li avek tapaz avyon oubyen tapaz avek tou sa

bann kalite transpor ki'n modifye. Me pour lezot sa i kapab vin en kosmar.

Parey mon'n dir o komansman mon prezantasyon, tapaz pou toulstan egziste e definitivman i pou ogmante, akoz i annan tou kalite sanzman ek devlopman.

Me pa akoz sa Mr Speaker, ki nou pa devret pran konsyans a son bann lefe negativ e alors i neseser pou edik nou popilasyon. Ki swa ou en dimoun ki *ok* ek tapaz oubyen ou pa *ok*, lefe i reste ki i pou afekte ou en fason ou en lot. Sirtou si sa bann tapaz i souvan dan ou zorey e i la pou bann gran peryod letan.

Polisyon tapaz parey i ganny apele, i ganny konsider koman en lennmi envizib, akoz nou pa pe pran an kont li, me i pe fer son lefe dousman, dousman lo nou lasante san ki nou pe realize.

I en problem enorm akoz i deranz trankilate lespri en dimoun, sirtou dan lenstans kot sa dimoun i pe dormi. Ou kas son sonmey e alors la ou depriv li son repo.

Mr Speaker, lefe ki *Dieu* prezan in donn zonm ek fanm lentelizans, sa i permet nou kapab reflesir lo bann konsekans nou bann aksyon ek lenvansyon. E alors nou kree bann mezir ki pou esey soulaze oubyen rektifye letan

sa sityasyon i vin en problemm pou nou.

Me i regretab pou dir ki serten dimoun pa pe respekte son prosen akoz i kontinyen fer tapaz ki pou afekte son vwazinaz, malgre ki i annan serten mezir e kondisyon ki la an plas pou esey kree en lanvironnman akseptab.

Sa bann sityasyon Mr Speaker, i arive toulezour e en kantite legzanz in ganny sorti ozordi dan sa Lasamble ki mon pa pou repete. Me Mr Speaker, i annan en legzanz ozordi mon pou bezwen rakont zot, akoz sa sityasyon tapaz.

Letan ki mon ti prepare pou fer sa Mosyon, mon ti pe prepare detrwa zour pase. Be manrmay dan mon vwazinaz ti vreman bonbard mwan avek en bon doz tapaz apepre 3erdtan. Apenn 20 met avek mon lavarang, avek *carpark* kot zot ti pe anmize. Lanmizik, sanson avek ladans ti'n roz ater la.

E pa setou Mr Speaker, prezan zot pou sant pli for ki lanmizik parey Onorab Lemiel in dir, sirtou ler ti pe zwe en sanson ki zot kontan. Bann sanson modern la.

Mr Speaker, ki mon fer? Mon ferm laport ek lafnet, e mon al asiz lot kote kot nou dir par deryer lakaz. A la, la ler mon al laba, prezan tapaz modifikasyon transpor i

komans bonbard mwan. Napa landrwa pou taye. I koumsa.

Mon ti annan en lot opsyon. Lot opsyon sete antre dan lasanm ferm tou laport avek lafnet. Me eski i devret koumsa. Alors ou konnen ki mon ti fer? Mon ti al par mon baro, alors mon ti al get sa pti *show* ki ti pe deroule. *Cannot beat them, yeah.*

Loter Mosyon ek lezot entervenan Mr Speaker, in koz lo Lalwa ki pa morde e nesesite pou elev zot nivo pou kapab *deal* avek lofans polisyon tapaz. Sa mon antyerman dakor e mon antyerman siporte. E Mr Speaker, permet mwan mon ti a osi kontan viz en pti pe mon lentervansyon ver bann keksoz ki Gouvernman i fer. Setadir ler mon pe dir lo bann desizyon, oubyen move planifikasyon parfwa ki'n ganny fer me ki apre in osi vin en *hazard* pou nou popilasyon.

Mr Speaker, se pa ki mon anvi retour dan lepase. Me mon zis anvi aport a latansyon lo bann keksoz ki sa nouveau Gouvernman, i devret pe konsidere pou evite fer menm lerer.

Apre en pe letan ki nou bann zabitan Roche Caiman ti'n byen enstale dan nou lakaz, la mon pe koz sirtou bann ki reste obor semen depi Providence ziska kot Palais De Sport. Nou ti pas en move

karder, en move leksperyans polisyon tapaz ek lapousyer letan ki konstriksyon pou fer plis *lanes* lo *highway* ti arive Mr Speaker.

Pou en gran peryod letan nou lakaz ti ganny vibre, nou zorey ti kornen e lentyer Nou lakaz ti ranpli ek lapousyer, san konnen kote nou ti pou ale pou ganny rekour. Akoz kantmenm mon ti sey ekrir let parti let pou bann Lotorite konsernen pou rod sekour, me i ti tonm dan zorey sourd.

Mr Speaker, nou lavi ti'n vin vreman en kosmar. Depi 8er bomaten ziska 5er apre midi e parfwa zot ti anmenn ziska pli tar. Sa son drile an partikilye ti'n rann nou lavi malere. Konbyen desibel ki ti pe penetre nou tanbour zorey e konbyen antre nou la ki'n malad, mon pa konnen Mr Speaker.

I annan plizyer legzanp kot bann desizyon pou fer konstriksyon in ganny aprouve par Lotorite *Planning*, me proteksyon bann zabitan ki reste dan nou zalantour, i ankor nil Mr Speaker.

Mwan mon kapab temwen plizyer lensidan ki'n arive kot *green line*, *help line* e tou lezot kalite *line* in ganny telefonnen, pou rapporte ki be depi Dimans ziska Dimans konstriksyon par bann gro lakonpannyen ti pe arive e pe kontinyen. Kestyon in ganny

anmennen isi dan 6enm Lasanble Mr Speaker, me i pa'n anmenn okenn fri

Sa bann laliny ki ou telefonnen, swa zot vini me naryen pa arive apre oubyen zot dir ou zot pe vini. Apre so long, bye bye.

Mr Speaker, apart bann Lalwa ek bann regilasyon, Gouvernman i kapab pran bann lezot mezir ki osi korek, pou asire ki polisyon tapaz i ganny tanporize.

Par egzanp konstriksyon miray oubyen lezot form separasyon parey Onorab Henrie ti pe sey dir taler, i devret mandatwar pou asir separasyon lekol ek bann landrwa rezidansyel, ki pre avek *Airport*, *highway*, lizin e bann lezot landrwa ankor ki prodwi bokou tapaz.

Bann lekol par egzanp Mr Speaker, petet a lavenir ti a neseser pou zot annan zot prop pano soler, koumsa zot ti a kapab zener zot prop lenerzi pou zot kapab servi *aircon*, e zot ti ava pli anfermen kot bann nwizans tapaz ki kapab kas konsantrasyon bann etidyan ti ava ganny evite.

Boundary walls: Dan bann *housing estates* Mr Speaker, i en lot fason pou kapab redwi tapaz e osi aport en pti pe *privacy* ant bann vwazen. Me pou bokou letan i domaz e sagren pou dir ki sa in ganny politicize e ki in fer ki

si ou ek nou e si ou pa ti ek nou ou miray pa ti pou ganny fer.

Mon demann sa nouvo Gouvernman pou silvouple pa zanmen e zanmen antre ankor dan sa kalite politik. Me pou plito met byennet nou sitwayen an premye !

(APPLAUSE)

HON JANY LETOURDIE

Mon Onorab, Onorab Vidot, mwan koman en madanm avek nou DA ki en madanm ankor, mon pou donn ou mon *full siper* e re dir avek sa nouvo Gouvernman la, fer en zefor spesyal pou nou kapab ganny *boundary wall* toultour Roche Caiman, sirtou kot tou sa bann *picket fence* in grennen e bann dimoun pe viv dan lenzirditan, pe ganny anoye avek tapaz. Mon donn ou *full siper* Onorab Vidot.

(APPLAUSE)

HON JANY LETOURDIE

Mr Speaker, bon planifikasyon i osi en faktre tre en portan ki pou ed bokou anver rediksyon polisyon tapaz. Byensir avek bon komunikasyon ant diferan akter konsernen, nou a kapab tonm dakor pou pa fer konstriksyon en *housing estate* avek en zoli lanvironnman, apre pli tar nou vwar en lizin elektrisite pe

ganny konstri. Oubyen nou vwar en *day care* ki pe ganny konstri obor en stasyon petrol an pli obor en gran larout.

Pou konkli Mr Speaker, mon ti a re lans en lapel avek tou bann travayer ki travay dan bann sekter dan bann lizin oubyen bann landrwa ki prodwi bokou, bokou tapaz pou a tou pri fer sir ki zot *protection, protective gears*, zot bann - (mon pe sey tradwir sa) Ki zot bann akseswar proteksyon i ganny aplike toulstan. E bann anplwayer, fer sir ki sa bann akseswar i toulstan a laporte pou sa bann travayer.

Ansanm Mr Speaker, i sa mo ki nou bezwen servi pou refer nou lanvironnman, trankilite e byennet nou sitwayen. Sakenn i responsab pou son prop aksyon e an menm tan mazinen ki tou aksyon i annan son reaksyon.

Nou kapab sorti venker si nou konsyan kan pou fer, kote ki ou kapab fer e ki limit ki ou kapab fer tapaz. Mersi Mr Speaker.

MR SPEAKER

Mersi Onorab. Onorab Samynadin.

HON KELLY SAMYNADIN

Mersi Mr Speaker. Bonn apre midi Mr Speaker, tou mon bann koleg Onorab, tou

dimoun a lekout espesyalman zabitan Au Cap.

Mr Speaker, tapaz i ganny konsider koman bann son eksesiv ou endezirab ki kapab okazyonn bann lefe nwizib anver lasante imen, lo en kominote e menm lanvironnman an zeneral si i mal ganny zere.

An definitif i ganny konsidere koman en form polisyon e en danze malgre son envizibilite e se pour sa rezon ki mon pe afirm mon siper anver sa Mosyon.

I pa normal pou Lotorite *Planning* donn permisyon konstriksyon en *warehouse* dan en landrwa rezidansyel e tapaz masin i ganny tande ziska tar aswar pandan *weekend*. E menm bann gro kommisyon i monte/desann letan ki bann zabitan i bezwen zot serinite e repo. E la mon pe koz lo lapar bann zabitan D'Offay Estate, Au Cap.

I pa normal pou en transpor park obor en laboutik dan en landrwa rezidansyel e zwe lanmizik a en volim tre o. I fer mwan mazin Mr Vidot dan Au Cap santral ki tanzantan i donn mwan en pti *call* pou raport bann tel lensidan.

I pa normal pou konstriksyon en *quarry* ganny aprouve dan en landrwa rezidansyel. E i osi pa normal pou bann dimoun sorti Bel

Ombre i vin fer tapaz lo nou zoli lans Au Cap.

(APPLAUSE)

HON KELLY SAMYNADIN

Malgre sa Mr Speaker, nou bezwen admet ki tou problem i annan en solisyon. Tou resaman parey plizyer mon bann koleg mon ti ganny kontakte par Mr Joseph Pillay, reprezantan en group fanm ek zom antouzyazme ki konsider zot koman bann *Car Audio Lovers* e sa i en regroupman dimoun diferan laz ki konpri en mazorite zenn.

I ti met devan mwan ki i pa ditou dan zot lentansyon pou kree okenn distraksyon tapaz dan lakominote, an vi ki zot osi zot form parti sa menm kominote e parmi zot i annan ki annan zanfan e dimoun aze kot zot lakour ki pou zot frankilite i en nesesite kotidyen.

I ti osi fer resorti ki zot, in investir bokou pou kapab aste en transpor, an vi ki nou tou nou konnen ki avek kou lavi konmela pou tou dimoun ki kapab *afford* pou fer li. Deplis zot in osi depans en kantite pou enstal sistèm son dan zot veikil avek bi pou amelyor zot leksperyans mizikal.

Mr Speaker akoz sa, bokou zot i ganny konsidere koman bann fouter dezord, an vi ki i annan en serten group

ki toulstan la pou fer tapaz partou kot zot arive zis akoz i annan en sistenm lanmizik dan zot transpor.

Kominote *Car Audio Lovers* Sesel, ti a kontan asir Gouvernman ki okenn form tapaz ki ganny koz entansyonnaelman i devret ganny *deal* avek seryezman.

Ki i pa ditou zot lentansyon pou *disturb* personn avek lanmizik, e ki i mal pou estimen ki se tou dimoun ki posed en lanmizik dan zot transpor ki fer tapaz dan lakominote.

Demann ki zot pe fer anver Gouvernman avek bi pou kree en lavnir pozitiv pou nou bann zenn adolesan, pou ki zot ava kapab sirmont bann move lenfliyans ek pratik ki tour otour zot toulezour, se pou idantifye en *open area* lwen avek bann landrwa rezidansyel. Oubyen dan bann landrwa kot tapaz i konsidere koman en menas potansyel. Kot zot ava kapab zot osi zwir zot pasyon.

Mr Speaker, louvertir en tel landrwa, i ava kapab aport plizyer lenpak pozitiv pou lekonomi pei. Premyerman i pou ede dan kreasyon en fasilite pou anmas reveni, ki ava ede mentenir sa landrwa dan bon kondisyon dan plas ganny subsidize direkteman par Gouvernman. E dezyenmman i pou osi kapab

garanti louvertir pou bann *food vendors* agrandi zot biznes an vi ki sa i pou en fasilite kot zot pou kapab vin vann zot prodwi avek dimoun ki pou frekant sa landrwa.

Kominote *Car Audio Lovers* Sesel pe osi sizere ki dan evantyalite ki Gouvernman i deside en tel landrwa. Lotorite konsernen i devret pe konstaman *monitor* li avek bi pou asire ki sa landrwa pe ganny servi pou son vre *purpose* e garanti sekirite bann partisipan an akordans avek Lalwa ki an plas.

Zot osi anvi ki Gouvernman e lakominote an zeneral ki krwar ki en plan pou ban *car audio set-ups* ek lenportasyon i konnen ki sa i a kapab annan en lenpak negativ lo en group ki konpri de santenn zenn. Bann sitwayen anbisye ki pe osi travay pou ed lekonomi releve atraver louvertir e soutenans bann biznes, ki annan relasyon avek lenportasyon lekipman sonorite pour transpor. Ki an retour i kontribye reveni pou pei.

Finalman zot pe osi swete ki Gouvernman i konsilte zot pwennvi osito ki en plan *d'action* pe ganny met an plas an sa ki konsern zot bann rekomandasyon.

Mr Speaker, mon oule afirmen ki pa dimoun on lentansyon pou promot

oubyen ankouraz tapaz dan lakominote, me ki annefe bezwen tou parti konsernen i devret ganny pran an kont pou asire ki lape e trankilite i rennyen dan nou pei.

Mon pe osi pran sa loportinite pou demann Gouvernman pou rekonsider sa proze *quarry* Au Cap. Si i ankor lo latab an vi ki i ti en plan ki ti'n ganny etabli par Gouvernman avan.

Mr Speaker, malgre lenpak ki en tel proze pou annan lo lanvironnman nou distrik. Lotorite konsernen i bezwen pran an kont degre e nivo tapaz ki en tel proze pou anmennen anver bann rezidan Au Cap, pli prensipalman dan en landrwa rezidansyel.

Mr Speaker, mon pou termin mon lentervansyon avek ekstre en let sorti kot en zenn zabitan Au Cap ki petet i ava ganny servi koman en pwen refleksyon. E i al *comme swivan*.

“Nou pou bezwen aranz nou fason viv e vin pli konsyansye lo konsekans nou fason fer, lo zot dimoun toultour nou. Mon napa naryen kont lanmizik. Mon osi mon ekout lanmizik toulezour. Lanmizik i en kado ki Bondye in donn imen, i ed ou detann, diverti, medite, adore, selebre eksetera.

Me se ler ou zwe li for e ki tou dimoun, kontan pa kontan

i bezwen forse ekout sa ki ou pe zwe ki lanmizik i vin en kosmar pou lezot.

Avek sa Mr Speaker, mon pe re afirm mon sipor pou sa Mosyon. Mersi.

MR SPEAKER

Mersi Onorab. Onorab Georges nou'n arriv a lafen deba e nou a pas lo ou *summing-up*.

HON BERNARD GEORGES

Mersi Mr Speaker. Mr Speaker, mon a sey fer li pli kourt posib. Mon ti ava kontan, parey i nou koutim dan sa Lasanble, remersye tou bann Manm ki'n entervenir lo sa Mosyon.

Mon pa ti, mon ti konnen i pou sit en lentere partikilye akoz nou tou i tous nou sa size. Me mon'n emerveye par fransizm bann Manm, par levantay bann siz ki'n ganny aborde dan sa deba e per *depth* refleksyon ki sa size in sisite atraver bann lentervansyon. Mon remersi zot tou.

Sa Mosyon i kler i enn ki tous nou tou e i enn ki plis ki sa, se en Mosyon ki nou tou nou annan en serten par ladan e mon krwar se sa ki'n sorti atraver bann sizesyon ki bann Manm in anmennen, me osi atraver bann filozofi ki bann Manm in kapab kondanse dan sa Mosyon.

E mon dir sa akoz mon vwar annefe 3 mo ki'n resorti atraver nou lazournen ozordi ki kondans en pti pe sa ki nou devret pe fer.

Nou tou nou sezi nou problem, e nou tou nou konsyan lekel sa problem. Me nou'n kapab ozordi trouv en pti pe parey ler mon ti dan bann pti laklas lekol. Nou ti ganny dir ki dan ledikasyon ti annan 3 Rs. *Reading, Writing, Arithmetic.*

E la ozordi mon'n vwar egzakteman menm zafer. Mon'n vwar sorti dan sa deba, respe, responsabilite. E mersi Onorab Cosgrow, *reasonableness.* Ok. Respe, Rezonnabilite ek Responsabilite. E mon krwar se sa lakle sa ki nou, nou devret pa target dan nou pei.

Mr Speaker, i fer lapenn e i regretab ki nou'n bezwen pas nou en lazournen ozordi lo en Mosyon ki tou dimoun i konnen pe adres en keksoz ki evidan.

Nou annan telman travay pou fer koman en Lasanble Nasyonal, nou annan telman size, Lalwa, Mosyon, kestyon pou aborde. Ki ozordi nou'n pas en zournen pou fer dimoun entelizan dan nou pei, e nou annan en pep entelizan, konpran sa ki evidan.

Ki soley i lev deryer Il Au Cerf e i kous dan was. E sa se, mwan mon vwar regretab.

Nou tou nou konnen, tou Seselwa i konnen ki si ou zwe ou lanmizik tro for ou pou afekte dimoun dan vwazinaz. Si ou *drive* ou loto tro tapaz avek gro lanmizik ladan ek modifikasyon ki fer tapaz, i pou *disturb* lezot.

Akoz alors ki nou bezwen koman en nasyon retourn lo la, pas en lazournen pou koz lo en keksoz ki evidan e ki devan nou e anmenm solisyon ler bann dimoun ki devret pran zot responsabilite, annan respe pou zot vwazinaz e azir dan en fason rezonnab pa fer li. E se sa mon krwar ki enn nou problem dan sa pei.

Mr Speaker, mon bezwen abord bann size ki en pti pe dan mon konklyzon ozordi, ki en pti pe negativ. Nou kontan dir ki o nivo Lafrik nou menm nou ki premye devan lo swen lasante, lo kalite lavi, lo plizyer lendikasyon, lo plizyer keksoz. E sa i fer nou fyer, sirtou ki nou fek selebre nou laniverser nou Lendepandans.

Me nou osi malerezman annan gro problem sosyal dan nou pei, e nou pa devret dir akoz nou dan en zoli pei, akoz nou annan en onivo devlopman ki nou napa gro problem.

Nou annan en problem drog, nou pli gro serviter eroin, nou menm nou ki premye dan servi eroin, si pa Lafrik dan lemonn antye. Nou annan pli

o to ilezitimate dan lemonn. 8 zanfan dan 10 i ne an deor en maryaz oubyen en nwayo familyal Sen.

Nou annan probableman enn bann pli o to konsonmasyon lakol. E la ozordi nou'n realize atraver sa Mosyon ki nou annan en problem tapaz ki partou dan tou kwen nou pei.

E malgre ki nou en pei edike, ki nou en pep konsyan, fyere ki konnen ki tou sa bann keksoz i devan nou. Alors akoz ki nou'n ariv, akoz ki nou'n tonm dan sa sitasyon kot nou bezwen ozordi 33 nou, mon pa a kont ou Mr Speaker, akoz ou pa'n koze.

33 nou vin isi pou dir menm zafer e pou anmenn menm solisyon a bann keksoz ki aparan e ki evidan e ki Gouvernman apre Gouvernman, apre Gouvernman in sey *tackle* pandan en kantite letan.

Mr Speaker, permet mwan pou re met lanfaz lo sa ki nou'n dir tou lazournen ozordi. Sa bann zenn ki met zot moter an deor bann flat Kosovo, Eden Village e ki *disturb* bann dimoun ki dan *flat*.

Sa bann ki'n telman donn bal dan sa pli zoli distrik isi Sesel, ki zot konnen i Les Mamelles akoz i annan pli zoli *view point* anler Kannal Lanmor. Kannal Lanmor zot

in bezwen fer sa *view point* e mon *hope* ki pa ariv menm zafer dan ou distrik Onorab Lemiel, atraver ou Mr Speaker. Kot sa *parking* ki zot apel *jetty* ozordi, zot a bezwen fermen zis pou anpes dimoun pa vin la aswar pou *disturb*.

Kannal Lanmor in bezwen fermen zis akoz detrwa dimoun i kontan vini, donn bal, fer lanmizik aswar e *disturb* tou vwazinaz.

Silvouple, travay dan en fason ki sousye. Travay dan zot *flat*, met *tiles*, tipinen, pers trou pou zot *improve* zot lanvironnman, me fer li dan bann ler apropriye ler dimoun pa pe ganny *disturb*. Pa komans fer li 5.30 bomaten e pa fer li apre 10er diswar.

Mr Speaker, i annan en kantite keksoz ki nou kapab koz lo la. Mon ava koz lo 2. Mon annan en zanmi ki in desid en fwa, en bon pe letan pase konstri en lakaz obor en Legliz. Legliz ti la depi 100an. In deside vin konstri son lakaz obor sa legliz e apre in vini in konplent avek mwan, in dir ki dan Dimans bomaten i pa kapab dormi akoz laklos Legliz i lev li.

Ou vwar Mr Speaker, sa se bann dimoun ki konnen, me ki malerezman pa swiv zot prop lentwisyon. E mon mon'n mansyonn sa legzanp pou mwan anmenn en lot ankor akoz dan mon distrik e

mon konnen dan plizyer lezot landrwa i annan bann Legliz, e mon bezwen montre ledwa kot ledwa fodre ganny montre. Ki fer telman tapaz ki zot prezimen, mon mazinen ki Bondye swa i sourd, swa akoz kekfwa in ariv a en laz, oubyen i lwen, oubyen i telman lwen ki fodre ou kriye pou li tandé.

E mon konnen, dan mon distrik i annan dimoun ki bezwen viv avek sa tou *weekend*. Akoz nou bezwen fer sa? Akoz nou pa kapab ador nou Bondye dan en fason rezonnab. I pou tann nou li, menm si nou pa koze i pou tann nou. Akoz fodre nou kriye, nou fer tapaz pou li tann nou kot i ete. Akoz ki nou bezwen ozordi pe koz lo la ankor?

Mr Speaker, si nou retour lo nou pwen e nou dir avek nou popilasyon annan respe, annan responsabilite e azir dan en fason rezonnab, mon krwar nou pou arive lo sa size tapaz, lo sa size polisyon tapaz, me osi lo tou bann lezot size preokipan dan nou pei lo nivo sosyal e lezot, arive trouv en solisyon.

Onorab Vidot in demann mwan antan ki *LGB*, fer sir ki sa ki nou'n deside la ozordi i ariv devan Gouvernman e ki Gouvernman i pran li an konsiderasyon e i fer son bout. Onorab atraver ou Mr Speaker, mon donn ou mon

langazman ki ozordi menm, mon pou fer sir ki Gouvernman i tann sa ki nou'n deside ozordi, e sa ki nou pou al deside ler nou pran en vot e ki i anmenn son sipo ek son soutyen.

Nou koman *leaders* ozordi nou'n fer premye pa e nou pou fer premye pa, mon sipoze ler nou *endorse* sa Mosyon. Annou prezan met sa devan nou sitwayen, devan Gouvernman ek devan lafors lord ek lape pou zot fer zot bout. Mon remersi ou, Mr Speaker.

(APPLAUSE)

MR SPEAKER

Mersi Onorab Georges. *Leader Lopozisyon* ou anvi en dezyenm *round* deba?

HON SEBASTIEN PILLAY

Mr Speaker, sa mon pou pe abiz lo Lasanble, non. Sa ki mon oule, se ki permet mwan pou demann en klarifikasyon, en reasirans Onorab Georges avek ou permision.

MR SPEAKER

Si ou kapab fer li bref, wi.

HON SEBASTIEN PILLAY

Mon pou fer li tre bref. Ki a okenn ka, akoz mon'n tann serten Manm koz lo size dimoun ki pe eksprim zot lekor oubyen anver politisen

oubyen anver lezot. Ki an okenn ka, okenn ka, okenn *attempt* ki nou fer pou nou *dealek* tapaz, nou fer li dan en fason ki *genuine* e dan en fason ki nou pa pe nwir okenn form laliberte lekspresyon an giz ki nou pe *deal* ek tapaz?

Re asir nou ki sa i nou lentansyon, akoz nou lentansyon se fer sir ki nou tou nou kapab koegziste dan en kominate kot nou kapab eksprim nou lekor, wi. Me ki i annan respe, i annan tolerans e i annan konpasyon pou lezot dimoun. Mersi Mr Speaker.

MR SPEAKER

En mo lo la Onorab Georges.

HON BERNARD GEORGES

Mersi Mr Speaker. Mr Speaker, mon oule donn tou mon lasirans, sa i al san dir ki nou lo sa kote latab e sa Gouvernman ki o pouvwar ozordi se enn ki responsab, ki annan respe e ki rezonnab dan tou sa ki i fer e ki swiv Lalwa e ki pa depas Lalwa. Mersi.

MR SPEAKER

Mersi tou bann Manm pou zot lentervansyon, in en deba long, enteresan. Nou'n ariv ler pou nou vote. Manm ki an faver Mosyon Onorab Georges lev lanmen silvouple.

Mersi. Silvouple. Okenn Manm ki kont, zis pou fer sir. Non, mon krwar tou Manm in

vote. Tou Manm ki ti pou vote in vote, sa ki reste in *abstain*. Mersi.

Bon, lo kestyon Mosyon lo tapaz dan vwazinaz e bann mezir ki devret ganny pran anmennen par Onorab Georges, in ganny 28 vot pour, 0 vot kont e 1 abstansyon. Alors sa Mosyon in pase par Lasanble. Mersi bokou.

Bon, nou'n al en pe long lo sa sesesyon. Me nou pou re pran pou en lot pti sesyon travay e nou a fer li 4.35. Madanm Clerk, 4.35 silvouple, nou a re pran.

(BREAK)

MR SPEAKER

Thank you. Mon ti a kontan pran en moman pou *deal* avek en *item* ki'n fek tonm a mon latansyon pa tro lontan pase en 2ertan pase e sa se en *Right of Reply* ki'n ganny demande par Mr Michael Berlouis, *Chief Financial Officer, Air Seychelles*. Son let in ganny sirkile pou bann Manm parey Konstitisyon i demande. Si ou pa ankor gannyen, mon'n donn Madanm Clerk pou sirkile. Madanm Clerk si ou kapab anvoye letan nou pe koze.

Wi, dapre mon konprenezon Lartik 102(6) Konstitisyon, *Right of Reply* i ganny akorde pou bann keksoz ki bann Manm i dir dan

Lasanble. Mon pa vvar ki i mete spesifikman ki i aplik pou bann *statements* ki Minis i fer. Sa *Right of Reply* ki mon annan devan mwan i fer referans avek serten *statements* Minis, me selman sa size ti osi ganny komanter par diferan Manm Lasanble.

Alors mon'n pran li mon responsabilite pou aksepte sa *Right of Reply* akoz Lasanble antye in ganny involve dan sa kalite statement.

Donk mon pou li serten paragraf sa *Right of Reply* ki mon krwar i kalifye koman en *reply* lo statement. I annan serten paragraf ki mon pou pas lo la e mon a endike e zot a vvar dan kopi ki zot a annan lekel sa bann paragraf ki mon krwar i pa aplike pou en *Right of Reply*.

Bon let Mr Berlouis i lir koumsa;

Dear Honourable Mancienne, per Section 102(6) of the Seychelles Constitution, having been aggrieved by a statement made with regards to the finance and records of Air Seychelles during the debate of the 22nd June, 2021, we would like to avail of our right to provide a written reply to yourself to be circulated to Members of the Assembly and read at the next sitting.

Specifically, the statement we would like to make, makes reference to the

following (paraphrased and translated) and I quote; -

"Between 2016 and 2018 Air Seychelles had USD142m which cannot be accounted for and for which there are no records at finance as to what the money was spent on. As a result, taxpayers have lost USD 142m and have nothing to show for it. End of quotation.

As members of Air Seychelles executive management and the finance team, we are all responsible to ensure the proper management of the company's financial resources. We have done this to the best of our abilities and experience and have always been governed by a Board of Directors which include a majority of Government dominated Directors including a representative of the Ministry of Finance at all times.

As per the Air Seychelles financial statements, the companies total annual operating expenses from 2016 until 2018 were between USD120 – 140m. It is therefore completely impossible for USD142m to go unaccounted for during the same period, as this would imply that an entire year's worth of cash was not spent on essential items required to maintain the day to day operations and pay staff.

In terms of internal finance procedures and safe guards at Air Seychelles, there is a clear segregation between receipts and payments teams, loading and authorization of payments for any outgoing funds, which requires dual signatures at all times. To ensure independent control when invoices are raised, the revenue collected by a team is segregated from that of the bank reconciliation.

Air Seychelles financial record including emails are kept electronically, independently of the Ministry of Transport and Ministry of Finance. These records, which cannot be deleted or altered by any staff member are kept, to best of our knowledge to the satisfaction of the Board and External Auditors.

Between 2016 and 2018 Air Seychelles was allocated a total of USD3.1m of public funds. USD 1.5m was committed in 2016 towards the cost of launching a direct weekly service to Beijing (PEK) whilst USD 1.6m was provided in 2018 for the redundancy of 133 staff members.

Over the last week we have provided all the supporting documentation related to the expenditure of the above funds to our Board of Directors and the Ministry of

Finance have independently confirmed the amounts.

In terms of the benefit to the country and the taxpayer; between 2016 and 2018 Air Seychelles paid over USD22m in direct tax and revenue contribution to the Government of Seychelles which included USD 6.8m through income tax and VAT.

Additionally, during this period, Air Seychelles carried 20% of the 1million visitor arrivals to Seychelles, additional economic benefits through staff salaries, spending with local supplies and tourism revenue brought in.

The above statement is made on behalf of the Air Seychelles Management team.

Sa ki mon'n lir i bann paragraf ki mon krwar i adres statement ki sa let in quote dan komansman.

Dan son let i annan 3 paragraf ki swiv ki koz lo son leksperyans personnel e lo son santiman an se moman ki i pe kit Air Seychelles. Sa mon krwar i pa relevan to son Right of Reply. Alors mon pe pas lo. Me mon a lir son dernyen paragraf ki annan en pe konklizyon ladan ;

Lastly I would like to thank my team, the Directors, the President, the Cabinet of Ministers and the National Assembly Members for all their

support and taking the time to listen and to understand the particularities of very complex industry and company over the last 4 and a half years. I am proud of what we and the team have accomplished together despite some very trying time.

I've learned a lot and though extremely stressful I have enjoyed every day of my last 4 and half years at Air Seychelles. I will miss my colleagues and the Air Seychelles family greatly. I cannot put into words how disappointed I am that after 4 and a half years, this letter is how I would end my last days at Air Seychelles.

*Signed,
Yours Sincerely
Michael Berlouis.
Chief Financial Officer.*

Bon, Onorab Pillay mon pa pou pran deba lo la. Mon pa pou pran deba. Wi, ki matter of privilege?

HON SEBASTIEN PILLAY

Mersi Mr Speaker. Mr Speaker, mon oule raise en matter of privilege akoz sa larepons ti ganny donnen apre kestyon ki Onorab Woodcock ki en Manm Lasanble, ti demann Minis e kot Minis ti fer en alegasyon. E i ti dir, pa en alegasyon - i ti dir ki napa okenn rikord pou prouve ki sa bann larzan in ganny depanse

e bann sonm ki i ti quote ti \$142.

MR SPEAKER

Wi, be pa al dan statement, dir mwan ki ou matter of privilege.

HON SEBASTIEN PILLAY

Well mon matter of privilege i relate ki mislead Lasanble Nasyonal. Dan son statement ki in fer, Minis in dir ki napa okenn rikord e sonm ki Minis in nonmen baze lo sa ki sa Senior Management team pe dir nou la, Mr Speaker, i pe dir Minis in nonm nou en sonm R2.5bilyon.

R2.5bilyon ki amount to \$142m ki'n sipoze unaccounted for avek Air Seychelles. E pou mwan sa i en gross, injure konmsi, kont Lasanble Nasyonal. E mon krwar petet ou devret demann Minis pou tender en formal apology avek Lasanble Nasyonal pou mislead Lasanble.

MR SPEAKER

Mon a reponn ou lo la.

HON SEBASTIEN PILLAY

Mersi Mr Speaker.

MR SPEAKER

Mersi. Parey ou'n dir ou osi ou pou tret sa size dan FPAC, alors ou ava annan en forum pou egzamin serten keksoz. Mwan mon pa pou al an

konparezon pozisyon Mr Berlouis avek pozisyon Minis. Minis in fer son *statement*, Mr Berlouis in demann en *Right of Reply*, mon'n lir sa *Right of Reply*, mon pa pe al an zizman ant enn oubyen lot. Mersi bokou sa i termin sa item.

Onorab Georges mon konnen i en pti pe tar dan lazournen. Me selman mon pa anvi konpletman sot nou *agenda*. Alors mon pou demann ou pou komans avek ou Mosyon lo *Treaty on the Prohibition of Nuclear Weapons*. Onorab Georges ou annan laparol.

HON BERNARD GEORGES

Dakor Mr Speaker. Mersi bokou Mr Speaker. Bonn apre midi ankor enn fwa tou bann Manm. Mr Speaker nou a sey fer li kourt. Mon Mosyon, en *ratification Motion* i lir *comme swivan*;

In accordance with Article 64(4) of the Constitution, this Assembly resolves to ratify the Treaty on the Prohibition of Nuclear Weapons. Mersi Mr Speaker.

MR SPEAKER

Mersi Onorab Georges. Ou pou adres sa la kommela oubyen apre? Oubyen ou le nou segonde avan apre ou a adresse?

HON BERNARD GEORGES

Mon ti a kontan ki i ganny segonde, apre i ava adrese li en pti pe Mr Speaker.

MR SPEAKER

Tre byen, nou a ganny segonde silvouple. Onorab William.

HON WAVEN WILLIAM

Mersi Mr Speaker. Mon ti a kontan segonn sa Mosyon pou ratifikasyon sa Trete. Mon ti a kontan dir 2 pti mo lo la, me selman apre ki Onorab Georges in fer son pti lentervansyon. Mersi.

MR SPEAKER

Byensir. Ou kapab reste kot *lectern* si ou annan ase pasyans e Onorab Georges i ava prezant son Mosyon e apre nou a pas ou laparol. Onorab Georges.

HON BERNARD GEORGES

Mersi Mr Speaker, mon ava fer li kourt. Onorab William annefe pou koz en pe pli longman lo sa Mosyon akoz se li ki *Chair IAC*.

Mr Speaker, parey son non i dir sa se en Trete ki pe sey, ki pe annan koman son lobzektif fer ki bann zarm nikleer, i redwir e a en serten moman i disparet lo nou plannet later. Sa donk se lobzektif sa Trete ki devan nou ozordi.

Me mon bezwen dir detrwa mo pou met sa Trete en pti pe dan konteks Seselwa. Lespri deryer sa Mosyon parey mon'n dir, se ki en zour pou annan en probasyon total lo zarm nikleer. Lo *nuclear weapon*.

Zot pou ganny eliminé konpletman. Se sa lobzektif me parey nou konnen sa lobzektif i pa ou ariv ni ozordi, ni demen, ni lannen prosenn e tre probableman pandan *life time* bokou parmi nou.

Me i enportan kantmenm pou fer en premye pa. Akoz parey sa vye proverb Sinwan, annefe i pa en vye proverb sinwan ditou. Se en parol Mao Zedong. Premyer Prezidan Lasin modern, ki dir ki en traze mil kilomet i bezwen komans avek en premye pa.

E mon krwar se sa ki *Treaty on the Prohibition of Nuclear Weapons, (TPNW)* parey zot apel li, i annan koman son lentansyon. Se en premye pa.

E nou realize ler nou regard bann lobzektif sa Trete e ler nou regard bann sinyatir sa Trete nou ava imedyatman realize ki tou bann pei ki annan zarm nikleer pa'n sinyen.

Alors i pou en gro problem. E tou bann pei ki'n sinyen, non-selman zot napa zarm nikleer, me osi i tre probab ki zot napa lentansyon

annan oubyen kapasite pou annan.

E ler mon regard map lemonn avek bann pei ki pa'n sinyen, nou vvar naturelman Lanmerik, Lasin, Larisi, Lenn, Pakistan, Lostrali, Canada. Lamazorite Lerop, *L'Arabie Saoudite*. Donk en gran parti lemonn pa enterese avek sa akoz pou zot, zot deza swa bann *nuclear powers* oubyen bann *aspiring nuclear powers*.

Alors zarm nikleer parey nou konnen avek Iran ek *Corée du Nord* ki pe fer bann test konmela pa pe ganny redwi. O kontrer pli anpli plis dimoun ou plis pei i anvi vin parti sa *nuclear club*.

Donk si nou pe abord sa size ozordi, se avek en sel bi. Lespwar, setou sa ki nou pou vin kontribye avek sa. Se ralye otan pei ki posib, ti pti koman gran, pov koman ris e pa par pa, pa par pa parey parol i dir konmela. Pti pa, par pti pa. Nou pou arrive en zour kot nou destinasyon. Sa se premye pwen ki mon anvi fer parmi 2 pwen.

Dezyenm pwen, akoz nou. Akoz nou Sesel nou enterese pou ratifye sa Trete, ler nou konnen ki nou pou pez pa bokou dan balans. Mon krwar i enportan Mr Speaker, akoz nou nou'n en pei ki'n toulstan mentenir ki nou en rezyon *nuclear free* dan Losean Endyen, i ti Polisi nou Leta

pandan bokou lannen. E mon mazinen i ankor *still* plizoumwen Polisi nou Leta.

Nou en pei ki annan otour nou plizyer pwisans nikleer. Dan nor nou annan Lenn avek Pakistan. Obor nou la i annan *Diego Gracia* s i en baz Ameriken, kot i kler ki i annan zarm nikleer.

E tre probableman anler dan *Gulf* ou annan Izrael ek parey mon'n dir, Iran ki pe sey ganny son zarm nikleer. Azout avek sa, lefe ki Losean Endyen in vin en *zone* pa konfli, me kontestasyon ant Lasin avek Lenn. Lenn i anvi met son memiz lo Losean Endyen, akoz son non, akoz se son *zone* lenfliyans.

Me Lasin parey nou konnen, in deza antre dan nor Losean Endyen, *Sri Lanka, Maldives*, eksetera e i annan gran lenfliyans laba.

Alors nou'n vin en pei vilnerab e nou'n toultan vilnerab a zarm nikleer. Depi ler ki *Diego Gracia* in vin *Diego Gracia*, en baz nikleer. Sesel i o sant sa kontestasyon akoz parey nou tou nou konnen, si pa ti *Diego Gracia*, i pou Aldabra.

E se la kot baz Ameriken ti pou ete. E resaman nou'n annan sa deba Nasyonal lo Assumption. Me nou konnen ki Lenn in fini antre Agalega e pe fer en baz laba e Agalega i

zis apepre 500 a 600mil avek nou. I pa lwen.

Donk nou antoure si ou anvi avek bann pwisans nikleer. Epi nou annan *of course La France* ki annan en teritwar *La Reunion* dan nou rezyon. Alors Mr Speaker, i enportan pou Sesel montre ki li i pran kote sa bann pei ki anvi elimin zarm nikleer.

Akoz parey nou konnen, ler 2 pei i al dan en lager nikleer oubyen ler enn i tir en bonm nikleer, se plannet antye ki ganny afekte.

E la mon fer zot rapel en liv ki'n ganny ekrir dan bann lannen 1950 par en ekriven Ostralyen ki apel *Neville Shute*. I ti ekrir en liv ki ti apel *On the Beach*. Kot ti'n annan Lerop en lager nikleer e sa 2 Ostralyen. En msye ek en madanm ti pe asize lo en lans Ostrali pe esper radyasyon ariv kot zot.

Akoz zot ti konnen ki inevitableman, kantmenm Ostral ti lwen, kantmenm lager ti'n ariv dan en lot landrwa, to ou tar radyasyon ti pou ariv kot zot e zot, zot ti pou mor atraver en keksoz ki zot ti napa okenn rezilta lo la.

E mon krwar se dan sa loptik, ki nou bezwen vwar sa Trete devan nou e donk Mr Speaker, mon'n promet pou mon pa long. Mon'n deza pli long ki mon ti a anvi. Mon pe demann avek Lasamble pou

bann rezon ki mon'n donnен, annou siport sa Mosyon e annou montre avek sa bann gro pwisans nikleer, ki se pa sa lavenir. Lavenir se en lavenir lape kot i annan en proibisyon total lo zarm nikleer. Mersi Mr Speaker.

MR SPEAKER

Mersi. Onorab William ou annan laparol.

HON WAVEN WILLIAM

Mersi Mr Speaker. Mr Speaker, avan ki mon al lo sa Trete, mon ti a kontan pas en pti mesaz an relasyon avek Lasanble Nasyonal.

Mr Speaker, permet mwan lo non (*IPU*), ki Lasanble Nasyonal Sesel i form parti pou swet ou Mr Speaker e tou Manm isi prezan sa Setyenm Lasanble tou de bon e dan en moman refleksyon lo progre ki nou'n fer e lo kwa ki nou kapab fer an plis dan sa rol reprezentatif.

Atraver nou rol koman sa Lenstitisyon gouvernans ki sivre travay Egzekitif pou asire ki lentere pep Seselwa e zeson fon publik i ganny byen fer.

Ozordi Mr Speaker, i osi dat e mwan ki Lorganizasyon Miltilateral Linyon Enter Parlmanter (*IPU*) ti ganny kree. Le 30 Zen 1889, Lasanble Zeneral Nasyon Ini atraver en rezolisyon 2018, ti adopte sa

dat le 30 Zen koman sa zournen komemoratif Parlmanter.

Lasanble Zeneral Nasyon Ini dan son rezolisyon A/RES/72/278 i rekonnet rol Lenstitisyon Parlmanter dan plan nasyonal e stratezik e dan asir pli o nivo latransparans e rann kont o nivo nasyonal e stratezik e dan asir pli o nivo latransparans e rann kont o nivo nasyonal e o nivo global.

Pou sa lannen en linisyativ lanse par *IPU*, se sa kanpanny nonmen *I say yes to youth in Parliament*. Mon dir wi pou lazene dan Lasanble. Mon oule osi sezi sa lokazyon pou remersi tou Seselwa ki annan sa laz vote ki'n konfye nou tou isi sa manda reprezentatif le 25 Oktob 2020.

En zour istorik dan parkour politik Sesel parey nou selebrasyon 45enm laniverser Lendepandans Mr Speaker. Mersi pou zot konfyans e sipor, "Fer li nou Lasanble."

Mr Speaker lo non Komite IAC mon eksprim remersiman pou Sekretarya an partikilye, Sekreter Komite Zafer Etranzer e son bann lasistans pou nou kapab anmenn en rapor devan Lasanble Nasyonal avan ki sa Mosyon i vini pou ganny ratifye.

Mon osi remersi tou Manm *IAC* pou zot korperasyon e zot komitman lo kote *LDS* avek *US*. Mr Speaker, i enportan donn en pti rapor lo kote demars pou sa Trete ti komanse, ki ozordi i devan nou Lasanble Nasyonal atraver sa Mosyon.

Nou tou ki ofe ek listwar ger mondyal nou ofe ek bonm nikleer ki Ameriken ti large lo 2 lavil Zapon, nonmen Hiroshima avek Nagasaki. Nou ofe ek dega leksplozyon *Chernobyl* asosye ek sa bann dega. Se lenpak lo lavi imen, zannimo e sirtou sa lanvironnman ki nou depan lo la.

Globalman nou ofe ek bann tes ki ganny fer anba lanmer ouswa dan bann kwen lemonn ki izole avek vivan.

Prenon an kont lentansite catastrofik e dega asosye ek nikleer lo lavi ki eske ozordi serten kous popilasyon global ki'n ganny afekte pe ankor pe rod restorasyon an term konpansasyon avek lazistas.

In annan en kanpanny ki'n ganny anmennen atraver en mouvman linisyativ imaniter par bann pei ki pa posed ouswa konstri zarm nikleer dan Nasyon Ini.

Sa kanpanny ki ti pe annan lespwar dan abouti pou en ban lo zarm nikleer an 2015 dan Konferans Non-

Proliferasyon zarm nikleer pa ti le ka, Mr Speaker.

Malgre 160 Pei Manm an 2015 ti siport sa linisyativ dan Konferans, ti napa konsansis. En Komite travay Nasyon Ini ti ganny kree pou kontinyen negosyasyon ki ti konpri Alzeri, Brazil, Lendonezi e Sid Sidafrlik parmi lezot pei, ti persevere pou annan en ban lo zarm nikleer, Mr Speaker.

Dan trwazyenm rankont negosyasyon sa komite an *Genève* an 2016, sa komite atraver en rapor final ti ganny adopte ki ant 2016 a 2017 ti fors Lasanble Zeneral Nasyon Ini pou pran en pozisyon pli sibstansyel.

Vote ti fini pou en ban zarm nikleer, 68 pei ti vot pour, 22 kont e 13 abstansyon. 9 parmi sa bann pei ti annan ouswa pe prodwi zarm nikleer enkli bann ki ti tonm anba parasol pei Azyatik, Lanmerik. Zot ti *boycott* parey loter Mosyon taler in mansyonnen.

Mr Speaker, apre 2 volim negosyasyon entans New York, le 7 Zilyet, Trete kont Zarm Nikleer ti ganny adopte. Sesel a son tour ansanm ek 8 lezot pei tel parey *Angola*, *Antigua e Bararde*, *Benin*, *Brunei*, *Dar Es Salaam*, *Quinea Bissau*, *Myanmar*, *St Lucia e Timor-Leste*. nou ti siny sa lagreman.

Mr Speaker, Trete li menm i defann bann pei manm ki form parti sa Trete pou devlop, teste, prodwi, evante, annan posesyon, stoke, transfer ouswa resevwar, kontrol lo zarm nikleer ouswa lezot lobze eksplozif nikleer.

I defann zot pou servi ouswa menas pou servi sa bann kalite zarm. Zot osi ganny defann pou stasyonnen, enstale ouswa deplwayman zarm nikleer lo zot teritwar ouswa dan okenn dediksyon ouswa kontrole.

Trete i fer provizyon pou Pei Manm pou annan en lagreman konpreansiv sofgard minimonm ek Lazans enternasyonal atomik lenerzi.

Pou la premyer fwa i demann osi pei manm pou fer provizyon pou lasistans pou viktim e restorasyon lanvironnman ver bann afekte ek zarm nikleer, ki ganny teste ouswa servi.

Sesel ti partisip dan negosyasyon sa Trete Nasyon Ini, New York an 2017 parey mon'n dir, i ti form parti 122 pei manm ki ti vote an faver pou sa ladopsyon.

Mr Speaker, Komite IAC i pran an kont e note ki mazorite sa bann pei ki pa'n siny sa Trete i bann pei Manm Nato ouswa bann pei Azyatik ki tonm anba parasol nikleer Lanmerik.

Komite i rekonné ki sa bann pei ki pa'n sinyen e ratifye sa Trete, zot pa pou kapab ganny kontrole ouswa rann kont lo zot aksyon an deor gid sa Trete. Ki fer ki gid sa Trete pou vin zis en zafer senbolik e enferyer, ver sa demars global pou dezarmeman.

Sepandan Sesel i rekonné sa zefor iniversel, kontinyel pou ralye pei depi 2018 pou sinyen e ratifye sa Trete o pli vit posib. Pti pei Sesel ek pe resours e potansyel diversifikasyon lekonomi ki anvi agrandi son leta rezilyans, i bezwen donn sipor.

Akoz atraver sa bann tel aksyon iniversel, Sesel i ganny rekonné e i ganny lentansyon parfwa spesyal ek Lorganizasyon Miltilateral, Rezyonal e Bilateral ver son devlopman sosyoekonomik, Mr Speaker.

Finalman, se pour sa rezon ki sesel i kontinyen promot lape e sekirite globalman. Son Polisi Zafer Etranzer i fonde lo sa filozofi 'Zanmi ek tou pei en lennmi a personn'. Tou i permetab, me pa tou ki benefisyab Mr Speaker.

Mon remersi Bondye pou lasazes e pridans ki i donn nou bann Dirizan avek en tel lapros ki benefisyab e konstriktiv, faver Bondye ek

son lagras pou lo nou e Sesel pou reste touzour sa pei beni. Tou laglwar i pou Zezi ! Mersi Mr Speaker.

(APPLAUSE)

MR SPEAKER

Mersi Onorab William. I annan Manm ki ti a kontan entervenir? Onorab Pillay, wi.

HON SEBASTIEN PILLAY

Mersi Mr Speaker. Mr Speaker, sa Mosyon i en Mosyon tre enteresan e ase *straight forward* akoz i en keksoz ki mon krwar la anndan nou 100poursan dakor lo la.

E i dan nou natir Seselwa pou nou dakor avek akoz nou afinisyon e si ou le, nou latasman avek lanvironnman nou pei. E si i annan en keksoz ki annan en lenpak si oule, pli destrikatif ki kapab annan, se pa zis en lenpak en zarm nikleer.

Parey listwar in montre nou, sa ki ti arive an Hiroshima ek Nagasaki. Me menm ler i *involve* en servi, servi teknolozi, teknolozi lasyans nikleer pou fer lenerzi.

Par egzanp letan nou ti vwar sa Tsunami ki ti frap Zapon e son *nuclear power point*, Fukushima e lenpak ki sa i annan lo lanvironnman e menm Chernobyl parey nou'n vwar e nou'n swiv.

In menm annan bann seri televize ki'n ganny fer lo la, lenpak ki sa i kapab annan. E toulstan si ou en dimoun ki swiv e ki aprofondir e ou regard sa bann portre, ou demann ou lekor konmsi, zanmen ou le vwar sa arive avek Sesel.

E mon krwar se sa ki *at the back of* nou lespri toulstan Seselwa. Zanmen nou pou oule en keksoz koumsa i arive Sesel. E i en kwensidans enteresan ki nou pe koz lo en size, akoz nou ti'n kapab annan, *end-up* ek en baz lo enn nou bann zil ki nou adore nou tou, e ki nou reve koman Seselwa pou nou ganny loportinite pou nou ale vizite.

E toulstan ler mon regard bann zanfan ki ganny bann konpetisyon *eco-school*, ki'n al vizit sa bann zil. En keksoz ki mon dir avek bann ki pandan mon letan ki mon ti pe travay dan ledikasyon, se ki ou'n ganny en loportinite inoubliyab pou vizit enn bann landrwa pli zoli o monde. E sa nou konnen nou tou se Aldabra.

E nou konnen listwar Aldabra se ki ozordi nou ti pou kapab pe asiz dan sa Lasanble e pe koz lo Aldabra e i ti kapab annan en baz militer lo Aldabra.

Me in annan en konba ki'n ganny anmennen par plizyer dimoun, notaman

Prezidan France Albert Rene avek lezot dimoun ankor. Bann *MPs* dan Parlman Angle.

Mon rapel letan nou fer listwar lekol ti annan Mr Huxley e ti annan en lot dimoun ankor. Ti annan 2 zot e mon rapel ti annan en *saying* ki ti ganny dir ki Gouvernman Angle sa letan ti dekrir e zot ti dan parti Lopozisyon.

Ti dekrir zot e zot ti dir ki Aldabra parey sa bann dimoun dan Parlman, i annan zis bann *giant tortoises* e bann *boobies*, ki ti bann zwazo sa letan. Mon krwar mon korek lo la. Mon *recollection of* listwar i ase korek.

So, pou mwan sa Mosyon i en Mosyon ki bezwen ganny siporte. Nou bezwen siporte akoz sa i *goes to every fibre of our being* koman Seselwa. Nou le sel pei dan lemonn ki'n kapab annan en relasyon avek Larisi pandan letan *La Guerre Froide* e osi annan en baz militer Ameriken lo nou teritwar.

Sa koegzistans ki nou'n nobou mentenir koman Seselwa e nou abilite - malgre nou ti pti, nou abilite pou nou *walk the tight rope of international diplomacy so to speak*, si ou kapab apel li koumsa, i en keksoz ki fer ki i pa etonn mwan ki ozordi Lasanble pe bezwen met *sa final stamp* lo kote nou stand.

Me osi lans en mesaz. En mesaz ki mon asire ki tou Manm Lasanble isi i dakor e ki sertennman lo kote nou isi lo kote *United Seychelles*. Menm atraver bann dokiman ki *underpin* bann prensip fondamantal nou parti parey nou Konstitisyon ;- ki zanmen pou annan en baz, en *foreign power* lo okenn nou bann zil, lo okenn nou bann teritwar.

Sa i en keksoz ki enportan e mon tann Onorab Henrie pe mangonnen, mon pa konnen ki i pe konplent laba.

Me sa ki enportan i se ki nou kot nou ete, stratezikman nou trouv nou e *mover* Mosyon in fer sa pwen. Mon krwar petet li menm i pa'n sezi lenportans sa pwen ki in fer. Lenn lo en kote, en pwisans militer. *La France, La Réunion*, en lot pwisans militer. Lanmerik e *NATO, Diego Gracia*.

Enn bann pli gran groupman lafors militer. E byensir Lasin osi ki koegziste ek nou dan Losean Endyen. E nou, nou la nou Sesel. E nou sa ki nou oule se ki nou toulstan mentenir ki menm atraver nou teritwar, i napa transbordman bann materyo brit ki kapab al ver *uranium enrichment* ki kapab al ver fer turn *uranium into weapons grade materials*, ki kapab ganny servi dan okenn lenstriman lager oubyen

okenn lenstriman zarm destriksyon lamas parey zot apel sa.

Weapons of Mass Destruction. (WMDs). Sa i en keksoz ki nou bezwen kontinyen lager, kontinyen fer sir ki i annan surveyans. Akoz i annan i kantite transbordman ki ganny fer dan nou rezyon. I pa ase pou nou ratifye sa Konvansyon e nou dir "be ki rol ki nou annan pou zwe la nou?

Nou annan en rol pou nou zwe akoz nou teritwar i sitan *vast* e en kantite keksoz i ganny transporte oubyen transborde dan nou teritwar.

E sa nou bezwen fer sir poudir en lanfaz ki nou bezwen ganny mete, ki nou landrwa i reste en *zone* kot okenn sa bann transbordman sa bann kalite materyo pa devret kapab ganny fer.

E sa i en keksoz ki nou devret, si nou prezimen nou'n *achieve* li. Me si nou pa ankor, nou bezwen fer sir nou fer li e met lanfaz lo pou nou kapab fer li.

I en Mosyon ki mon konsyans pa pou zanmen permet mwan vot kont, akoz mon krwar dan lavi. Mon pa krwar dan servi okenn fason agresyon, servi en *weapon of mass destruction* pou detri okenn dimoun, oubyen okenn keksoz. Oubyen dan okenn fason servi sa kalite

destriksyon pou anmenn en solisyon, akoz i pa pou zanmen ede.

So, Mr Speaker, mon krwar ki *it's fitting* ki nou pe fini lazournen avek en tel Mosyon. En Mosyon ki kapab kolektivman anmenn nou tou ansanm koman en Seselwa. Anmenn nou ansanm koman en Lasanble pou pran en pozisyon ferm kot non-proliferasyon, materyo brit oubyen zarm nikleer.

E mwan mon krwar sa i en bon keksoz pou nou, i en bon keksoz pou Sesel e i en keksoz ki bon pou Sesel. Mwan sertennman mon pou siport e mon asire mon bann lezot koleg lo kote isi pou osi siporte. Mersi, Mr Speaker.

MR SPEAKER

Mersi Onorab Pillay. Onorab Georges ou ti a kontan fer en *wrap-up*?

HON BERNARD GEORGES

Very briefly Mr Speaker. Mersi bokou. Mr Speaker, mon krwar i apropriye pou en lot rezon ki nou pe abord sa size ozordi, se ki lo en zour kot nou'n pas tou lazournen pe koz lo tapaz, nou pe ratifye en Trete ki viz bann bonm atomik ki fer pli gro tapaz ler zot pete.

Alors mon krwar nou'n ariv a en, plito ler zot ekspoze, eskiz mwan. Mon a servi en *parliamentary language* e

donk i apropriye ki nou pe fer sa la ozordi.

Me en lot keksou ki mon krwar i enportan pou nou rapel se ki en zarm nikleer i egziste avek en sel bi, e sa se pou dir avek lennmi sa enn ki annan sa zarm, se pou dir li nou annan sa ki nou apel *mutually assured destruction*.

Si ou pez ou bouton, mon osi mon pou pez sa ki pou mwan. Pa zis mwan ki pou mor, ou osi ou pou mor. E mon krwar pwen ki fodre nou fer sorti se ki ler sa 2 lelefan pe lager, se nou gazon isi Sesel ki pou ganny kraze.

E se sa enn bann rezon akoz ti pti ki nou ti pti, lwen ki nou lwen, nou devret pe met nou pti 5sou dan sa balans pou fer ki en zour ki apel en zour, sa ki pou dan nou kote balans, i ava pli for ki sa ki lo lot kote kot i annan bann zarm nikleer.

Alors pou sa premye pa, Mr Speaker, mon remersi Lasanble davans. Akoz mon konnen ki zot pou siport sa Mosyon e mon remersye ou pou sa dernyen parol. Mersi.

MR SPEAKER

Mersi Onorab Georges. Nou a pran vot lo sa Mosyon. Manm ki an faver lev lanmen silvouple? Madam Clerk, mon krwar tou dimoun in vote.

Mersi, lo kestyon vot pou ratifye, *vote to ratify the Treaty on the Prohibition of Nuclear Weapons*. 27 Manm in vot pour, 0 kont e 0 abstansyon. Alors Mosyon in aprouve par Lasanble. Mersi bokou.

Byen mon krwar nou bezwen aret la ozordi e mon a swet zot tou en bonn *fin lasemenn* e nou a met nou pare pou re zwenn Mardi prosen, 9er. Mersi.

(ADJOURNMENT)

Verbatim Report

NAS Sitting

Wednesday 30th June, 2021